

## Sepinien xa diamu te Matiu

*?Visi iaxa tetis vanuvei ak?*

Melele xa Iesu tepol kokot ni pispisien nan xil e di tetal rerat mesien ra moletin xil hao, moletin xil holu di latehusili. E melele nen ak, Iesu di tekakao e taon te hal Kapaniam, e tepus Siu tei xa di teleh takis ra Siu sav xil tangan vasa ni vaha mi kavmen te hal Rom, hisen Matiu Livae.✧ Tumulen xa xi tetisi di biteni xa melele xa Iesu tepusi e tekesi, vatei takes, xi testokovein polien nan e tehusil xati. Di, e melele xa Iesu tehe ut nesao, Ninin Eo mei tepolu e Matiu e eloheoh sav xil mun. Ma lateha latehithiten longongen hos usil Iesu Kristo mi moletin xil.✧ Matiu tetis vanuvei ak usil meulien na Iesu e huram 63 AD (huram 63 tetutou ni poten na Iesu).

*?Visi iaxa tevuli vanuvei ak tetiamu?*

Matiu tetis vanuvei ak teha mi mol-Isrel xil vengani holu e xil latake reitin ti xa Iesu iaxa be xi xa Hi tehit xati tetiamu tangan isa ni imei. Misak ni, Matiu ien tehei tangan vapisen ni xa holesok xil xa provet xil te Vanuvei Eo Matu latehit lelen ni usil rin te meien, meulien, e mea rilomunen na Iesu mei tehe reitin.

*?Matiu tetis vanuvei ak veneh?*

**Matiu ien tehei tangan vapisen ni xa meien na Iesu tehusil xat naha xa Hi tehit xati usil meien na suv toto xa isa ni imei tangan vatutou ni mol-Isrel xil** - Matiu tetis kuh holesok

---

✧ :: Mat 9:9    ✧ :: Pol 2:4,43

xil xa testal e meulien na Iesu e tepisen ni xa di nggusil naha xa provet xil tetiamu di latehit lelen ni e Vanuvei Ei Matu:

Iesu texo vatimol na Ebrahim✧ e tehusil hitxatien xa Hi tepol ni tetela✧ tangan “vatimol nan xil lihe suse te tuxolxatien na Hi iha mi vanut moletin xil vus te ut etan.”

Iesu texo vatimol na suv toto Deved✧ xa tehusil hitxatien xa Hi tepol ni tetel Deved✧ tangan “lelaxatien na ngan xil xa listal e vatimol nan iha vuma ... hoxalite teni ihe tovuol.”

Iesu, ninen tehe atul maxoe tei xa takil ti mu tiramue✧ texoni ngan taxa Hi tehiti xati texo provet Aesea.✧

Iesu, tepot e metimal te hal Betlehem✧ texoni ngan taxa Hi tehiti xati texo provet Maeka.✧

Eilep tatei xil xa latehur kilakilen texo suse na hitu xil latexo ist e latemei e Isrel tangan lalang ves “tuvava xa latpesi be suv toto na Siu xil”✧ vengan xa xil latepus hitu nan mei testal texoni ngan taxa Hi tehiti xati texo provet Balam.✧

Tuvava Iesu teha tete kantri te hal Isip vuteili✧ texoni ngan taxa Hi tehiti xati texo provet Hosea.✧

Sion Baptis mei misak mesen suse na Iesu✧ texoni ngan taxa Hi tehiti xati texo provet Aesea.✧

Iesu tepisen ni xa xi pipin tangan vahur polien na Hi texo sexien xa temaen Sion tebaptaes ni.✧ Hi tepisen ni xa temaal pupu ven, e

---

✧ :: Mat 1:1 ✧ :: Sen 22:18 ✧ :: Mat 1:1 ✧ :: 2Saml 7:13 ✧ ::  
 Mat 1:18 ✧ :: Aes 7:14 ✧ :: Mat 2:1 ✧ :: Maek 5:2 ✧ :: Mat  
 2:2 ✧ :: Nam 24:17 ✧ :: Mat 2:14-15 ✧ :: Hos 11:1 ✧ :: Mat  
 3:1-3 ✧ :: Aes 40:3 ✧ :: Mat 3:16-17

tetutou ni ngan ak, Iesu teha tepol kokot ni polien nan xil.

Melele xa Iesu tehur sakpisien xil texo he Temat,✧ tepisen ni xa Iesu tenamot ti e tesaen, e tesoh kat tetel sepinien na Hi.

**Matiu ien tehei tangan vapisen ni xa Iesu be-mei tangan vapisipi mi moletin xil usil naha istal e meulien nae melele xa Hi mei ihe suv toto nae** - Matiu teling pispisien xil na Iesu ladi e vanut pispisien lim (5):

E hu tei, Iesu tepispisi mi moletin xil usil sexien xil xa momal tangan moletin xil lihuri melele xa Hi mei ihe suv toto e meulien nae.✧

Iesu tepispisi ni xa sakpurunien xil e melengien xil te xeih ti imei e meulien na ngan xil xa Hi mei be suv toto nae.✧

Iesu tepispisi ni mi moletin xil usil sexien xa Hi mei ihe suv toto na moletin xil.✧

Iesu tepispisi usil visi iaxa be eilep mak mu e ngan xil xa Hi be suv toto nae.✧

Iesu tepispisi usil sakpurunien e melengien xil te xeih xa ti imei mi ngan xil xa Hi be suv toto nae.✧

**Matiu ien tehei tangan vapisen ni xa Iesu tehur xeihen texo Hi xa mili xeihen savsav xil e ut etan** - Matiu tetisi xa Iesu “tetal rerat mesien xil vus ra moletin xil.”✧ Xi tetisi mun xa Iesu tepol ni temak tangan vasak ni naha xa Hi tehiti lelen ni texo provet Aesea✧ mei vahe reitin.✧

Iesu tehur xeihen teli mesien leporsi;✧ mesien

---

✧ :: Mat 4:1-11   ✧ :: Mat 5:1-7:29   ✧ :: Mat 10:1-42   ✧ :: Mat 13:1-52  
 ✧ :: Mat 18:1-35   ✧ :: Mat 24:1-25:46   ✧ :: Mat 4:23  
 ✧ :: Aes 53:4   ✧ :: Mat 8:17   ✧ :: Mat 8:3

xa ri moletin mat;✧ mesien xa moletin ven  
 mitin;✧ e teli mesien savsav xil mun.✧  
 Iesu tehur xeihen tangan vahol rerat ninin tesa  
 xil vahe reling moletin xil.✧  
 Iesu tehur xeihen tangan vasak ni votiang e oei  
 lalolong xat raen.✧  
 Iesu tehur xeihen tangan vasak ni ngan xil xa  
 lamat, mei lamea rilomun ra maten.✧  
 Iesu tehur xeihen tangan vasak ni ngan xil xa  
 vurangexil bon, mei lalongeong rilomun, e  
 ngan xil xa labe vut, mei lasepin.✧  
 Iesu tehur xeihen tangan vasak ni ngan xil xa  
 metexil tevar mei laketeh rilomun.✧  
 Iesu tehur xeihen tangan vasa anien mi moletin  
 xil holu vatel anien xa hokorong tang.✧  
 Iesu tehur xeihen tangan vakakao e ramut oei.✧  
 Iesu tehur xeihen tangan vasa halesil vaha ni  
 neta ngan.✧

**Matiu ien tehei tangan vapisen ni xa vat xil  
 na mol-Isrel xil latesin pispisien xil na Iesu e  
 iexil ti tenavei laling neketen nae en e lavusil  
 xati** - Melele xa Iesu tepol kokot ni polien nan xil,  
 mol-Isrel xil latemaal ven. E melele xa di tepol  
 teha vuma, vat xil na mol-Isrel xil latesin ni e  
 latepol ni texeih mini.

Vat xil na mol-Isrel xil latehit tamal ti melele xa  
 Iesu tesepin e rin na Hi tehiti Hi naketeh ti mun  
 nasa mi moletin xil ve tesaen nae xil.✧

---

✧ :: Mat 8:13; 9:6 ✧ :: Mat 8:15 ✧ :: Mat 8:16; 9:22,35; 12:13,15;  
 14:36 ✧ :: Mat 8:16,33; 9:33; 12:22; 15:28; 17:18 ✧ :: Mat 8:27  
 ✧ :: Mat 9:25 ✧ :: Mat 9:29,33; 12:22 ✧ :: Mat 21:34 ✧ :: Mat  
 14:25; 15:36 ✧ :: Mat 14:25 ✧ :: Mat 21:19 ✧ :: Mat 9:3

Vat xil na mol-Isrel xil latehit tamal ti xa Iesu di teanien tetel moletin tesa xil.✧

Vat xil na mol-Isrel xil latehit tamal ti xa moletin xil holu latemaal pupu ve holesok xil xa Iesu di tepol ni.✧

Vat xil na mol-Isrel xil latehit tamal ti xa Iesu tenahusil xat sexien matu nae xil ti.✧

Vat xil na mol-Isrel xil latehit xeihen na Iesu texo Temat.✧

Vat xil na mol-Isrel xil latehit tamal ti xa Iesu di tesel xat xil ve sexien nae xil.✧

**Matiu ien tehei tangan vapisen ni xa sakpurunien xil e maten na Iesu tehupil xat naha xa Hi tehiti xati tangan istal** - Matiu tetis kuh holesok xil xa testal e sakpurunien e maten xa Iesu tehuri. Xi tepisen ni xa holesok xil ak tehupil xat naha xa Hi tehiti usili texo provet xil tetiamu e Vanuvei Eo Matu.

Hi tehiti xati✧ xa vat xil na mol-Isrel xil lisiin Iesu.✧

Hi tehiti xati✧ xa moletin xil linalong kil ti pispisien nan xil.✧

Hi tehiti xati✧ xa Iesu iloh ixo dongki tei ixoni suv toto tei melele xa mei istal e taon te hal Serusalem.✧

Hi tehiti xati✧ xa timue hos tei na Iesu xa di lateanien vituei, xi vari iaxa isa rati ihe he elu nan xil.✧

Hi tehiti xati✧ xa lixal rat meulien na Iesu ni silva mani ihe hanutap tei e he xalu mun (30).✧

---

✧ :: Mat 9:11 ✧ :: Mat 9:34 ✧ :: Mat 9:14; 12:2,14; 15:2 ✧ ::  
 Mat 12:24; 16:1 ✧ :: Mat 19:3; 21:23,46; 22:15,23,35; 23:1-39 ✧ ::  
 Sam 118:22-23 ✧ :: Mat 21:42 ✧ :: Aes 6:9-10; Sam 78:2 ✧ ::  
 Mat 13:13,34 ✧ :: Sak 9:9; Sam 118:26 ✧ :: Mat 21:4-11 ✧ ::  
 Sam 41:9 ✧ :: Mat 26:23-24 ✧ :: Sak 11:12-13; Ser 19:1-13; 32:6-9  
 ✧ :: Mat 26:15; 27:3

Hi tehit xati✧ xa moletin xil na Iesu lilesae  
 relingi.✧  
 Hi tehit xati✧ xa melele xa lilepis Iesu e kot,  
 linapol ni ti namal mini e litela tangan ha  
 lihasi imat.✧  
 Hi tehit xati✧ xa melele xa liso hisit sepinien eah  
 iha xat Iesu, e xi itat votei.✧  
 Hi tehit xati✧ xa moletin xil liti e likus valnaon.✧  
 Hi tehit xati✧ xa liti xat Iesu ite eivave e liso daes  
 tangan liseti eising nan xil.✧  
 Hi tehit xati✧ xa melele xa maruru iat Iesu, xil  
 lisa uaen xa mikon mini.✧  
 Hi tehit xati✧ xa moletin xil lingue xat Iesu e  
 lisisi tangan itutou ni xi tasen.✧  
 Hi tehit xati✧ xa Iesu ihur longpangasien itel  
 moletin tesa xil e isis ve ngan xil xa di lapurun  
 ni.✧  
 Hi tehit xati✧ xa istokovein Iesu melele xa xi ti  
 ilong pangas xi.✧  
 Hi tehit xati✧ xa liling tiei na Iesu ite rute xa di  
 ladihin ngan xil xa holesok nae holu ladi en.✧  
 Hi tehit xati✧ xa namaen ni Iesu ti nate von  
 maten, e tiei nan navolel ti e vul.✧

*Vatit nenemien tei te vanuvei ak de Matiu 5:17*

Iesu pispisi mi moletin xil bit, “Munanemi ti  
 munahit inou namei tangan naso rerat rae xil  
 na Mosis del pispisien xil na provet xil vaha. !  
 E-e, tamak ti! Natamei ti tangan naso rerat xil.

---

✧ :: Sak 13:7   ✧ :: Mat 26:31   ✧ :: Aes 53:8   ✧ :: Mat 27:1-2  
 ✧ :: Aes 53:7   ✧ :: Mat 27:12   ✧ :: Aes 50:6   ✧ :: Mat 26:67;  
 27:30   ✧ :: Sam 22:14-18   ✧ :: Mat 27:35   ✧ :: Sam 69:21   ✧ ::  
 Mat 27:34   ✧ :: Sam 22:7-8   ✧ :: Mat 27:40   ✧ :: Aes 53:12   ✧ ::  
 Mat 27:38   ✧ :: Sam 22:11   ✧ :: Mat 27:46   ✧ :: Aes 53:9   ✧ ::  
 Mat 27:60   ✧ :: Sam 16:10   ✧ :: Mat 28:6

E inou namei tangan nisak ni naha xa rae xil ak di lasep usili mei istal ihe reitin.”

*?Naha iaxa di e vanuvei ak?*

1. Meien na Iesu nggusil xat naha xa Hi tehit xati. (Mat 1:1–4:11)

*E provins te hal Kaleli*

2. Iesu pol kokot ni polien nan e bit usil sexien xa Hi mei ihe suv toto na moletin xil. (Mat 4:12–7:29)

3. Iesu pisen xeihen na Hi xa mei ihe suv toto na moletin xil. (Mat 8:1–11:1)

4. Moletin xil lasin ni tangan Hi mei vahe suv toto nae. (Mat 11:2–16:12)

*E suse vahe Serusalem*

5. Iesu bue xat moletin nan xil ve melele te xeih xil xa ti imei e xil. (Mat 16:13–20:34)

*E Serusalem*

6. Moletin xil lasin Iesu e iexil ti tavei tangan lavusili. (Mat 21:1–23:39)

7. Iesu pispisi mi moletin nan xil usil mea rilomunen nan e sakpurunien xil xa ti imei e xil. (Mat 24:1–25:46)

8. Vat na mol-Isrel xil lapol ni suse tangan Iesu vamat vaxo en. (Mat 26:1–75)

9. Maten na Iesu. (Mat 27:1–66)

10. Iesu mea rilomun ra maten e be ut nesao. (Mat 28:1–20)

*Vatimol na Iesu, Mesaea na Hi*

<sup>1</sup> Ngan ak be vatimol xil na Iesu Kristo,✠ xa tehe tei e vatimol na suv toto Deved tetiamu, xa tehe tei e vatimol na Ebrahim tetiamu.✠

<sup>2</sup> Ebrahim, xi tehe tame Aesak,✠

- xa tehe tame Siekob, ✧  
 xa tehe tame Sudah tetel tuneli xil. ✧  
 3 Sudah, xi tehe tame Peres xal Siera, xa ninexalu  
 Tamar. ✧  
 E Peres, xi tehe tame Hesron, ✧  
 xa tehe tame Ram. ✧  
 4 Ram, xi tehe tame Aminatap, ✧  
 xa tehe tame Nashon, ✧  
 xa tehe tame Salmon. ✧  
 5 Salmon, xi tehe tame Boas, ✧ e ninen Rehab. ✧  
 E Boas tehe tame Obed, ✧ e ninen Rut.  
 E Obed tehe tame Tiese, ✧  
 6 xa tehe tame suv toto Deved. ✧

- Suv toto Deved, xi tehe tame Solomon, ✧ e ninen  
 tehe tunau na Uraea. ✧  
 7 Solomon, xi tehe tame Rehoboam, ✧  
 xa tehe tame Abitsa, ✧  
 xa tehe tame Asa. ✧  
 8 Asa, xi tehe tame Sehosavat, ✧  
 xa tehe tame Sehoram,  
 xa tehe tame Usaea.  
 9 Usaea, xi tehe tame Siotam, ✧  
 xa tehe tame Ehas,  
 xa tehe tame Hesekaea.  
 10 Hesekaea, xi tehe tame Manase, ✧  
 xa tehe tame Amon  
 xa tehe tame Sosaea.  
 11 E Sosaea, xi tehe tame Sekonaea e tuneli xil.

---

✧ **1:2:** Sen 25:26    ✧ **1:2:** Sen 35:22-26    ✧ **1:3:** Sen 38:29-30  
 ✧ **1:3:** 1Kron 2:5    ✧ **1:3:** 1Kron 2:9    ✧ **1:4:** Rut 4:19    ✧ **1:4:**  
 Rut 4:20    ✧ **1:4:** Rut 4:20    ✧ **1:5:** Rut 4:21    ✧ **1:5:** Sos 6:25  
 ✧ **1:5:** Rut 4:21    ✧ **1:5:** Rut 4:22    ✧ **1:6:** Rut 4:22    ✧ **1:6:** 2Saml  
 12:24    ✧ **1:6:** 2Saml 12:15    ✧ **1:7:** 1King 11:43    ✧ **1:7:** 1King  
 12:31; 1Kron 3:10    ✧ **1:7:** 1King 12:31; 1Kron 3:10    ✧ **1:8:** 1Kron  
 3:10-11    ✧ **1:9:** 1Kron 3:12-13    ✧ **1:10:** 1Kron 3:13-14



E melele nen ak, mol-Babilon xil mei latehas tan ni mol-Isrel xil e lateleh rerat xil latehe kantri te hal Babilon.

- 12 Ngan xil sung ak, xil labe avu xil xa latemei tetutou ni melele xa mol-Isrel xil latehe reling kantri te hal Babilon:  
Sekonaea, xi tehe tame Seltiel, ✧  
xa tehe tame Serubabel. ✧
- 13 Serubabel, xi tehe tame Apiut,  
xa tehe tame Eliakim,  
xa tehe tame Asor.
- 14 Asor, xi tehe tame Sadok,  
xa tehe tame Akim,  
xa tehe tame Eliud.
- 15 Eliud, xi tehe tame Eliesar,  
xa tehe tame Matan,  
xa tehe tame Siekob.
- 16 Siekob, xi tehe tame Siosep,  
xa tehe tiramue na Meri,  
xa tehe nine Iesu,  
xa latekesi ni Mesaea xa Hi tehit xati tehit isa ni imei. ✧
- 17 Mak, ma melele xa labuli vatit avu xil xa lateti e vatimol na Iesu, Ebrahim tetuxoh suv toto Deved, lakameti xa latehe hat e le tei (14). E lakameti xa Deved tetuxoh melele xa mol-Isrel xil latehe kantri te hal Babilon, vatit avu xil ak latehe hat e le tei (14). E melele xa mol-Isrel latehe reling hal Babilon tetuxoh melele xa Mesaea tepot e ut etan, vatit avu xil ak mun latehe hat e le tei (14).

*Iesu Kristo tepot e ut etan*  
*Luk 2:1-7*

18 Ngan ak be tumulen usil naha xa testal teti-  
amu ni poten na Iesu xa tehe Mesaea na Hi. Meri  
xa ihe nine Iesu, latesikoe xole ngamu tangan mei  
ihe atou na Siosep. E melele xa lutnati vituei ti mu,  
latekameti xa Meri teti tuei ni tuvava texo xeihen  
na Ninin Eo.✠

19 Vengan xa Siosep, tiramue na Meri, sexien  
nan xil momal pe met Hi, xi tenemi tehit isil rati.  
E xi ien ti tavei vapol ni Meri vahe unoun pe  
met moletin xil. Ma xi bit xalu lalitasil e suse xa  
moletin xil linakil ti.

20 E melele xa Siosep di tamu minem usil rin ak,  
masxaxa tei na Hi Suv mei mistal mini e metuveen  
tei e biteni mini bit, “Siosep, vatimol na suv toto  
Deved tetiamu, ulum nakan ti tangan uhur Meri  
ihe atou nam, vengan xa tuvava xa di ni nggo  
xeihen na Ninin Eo.

21 Meri iling horamue ak, e xouk uling hisen ihe  
‘Iesu’ xa koute teni be ‘Iahova di miteh meulien,’  
vengan xa xi iteh meulien e moletin nan xil ra  
tesaen nae xil.”✠

22 Holesok xil ak mei mistal tangan vapol ni  
sepinien xa Hi Suv tehit lelen ni texo provet nan  
mei vahe reitin xa tehit,

23 *“!Muteong kuhi! Atul maxoe tei xa takil ti mu  
tiramue,  
xi di ni tuvava tei.*

*Ti, ilingi ihe malohos e liling hisen ihe ‘Immanuel’  
xa koute teni be ‘Hi di mi xir.’ ” (Aes 7:14)*

24 Melele xa Siosep milale, xi pol nggusil naha xa  
masxaxa na Hi Suv tesemae ni mini. Ma xi nggur  
Meri mei be atou nan e ludi vituei.

---

✠ **1:18:** Luk 1:27; 1:35 ✠ **1:21:** Mat 1:25; Luk 1:31; 2:21; Pol 4:12

<sup>25</sup> E xi tapat ti vatela ba duxoh melele xa Meri miling horamue nan. E melele xa miling horamue ak, Siosep miling hisen be Iesu.✧

## 2

*Eilep xil lamei tangan lamerere ni Iesu Kristo nggoni suv toto na Siu xil*

<sup>1</sup> Iesu tepot e metimal te hal Betlehem✧ xa de provins te hal Sudea, e melele xa Herod xa Mahulong tehe suv toto te provins ak.✧ E dutou ni poten na Iesu, rut eilep xil langgo ist e lamei e taon te hal Serusalem. Eilep xil ak langgur kilakilen tangan lipus kil naha xa istal e ut etan nggo suse na hitu xil.

<sup>2</sup> E melele xa lastal e hal Serusalem, lasis moletin xil labit, “?Tuvava xa tepot be suv toto na Siu xil da xave? Vengan melele xa mateti tamu e ut samem e ist, matepus kokot ni xa hitu nan✧ testal. Ve rin ak, mamei taxeak tangan masa merereen mini.”

<sup>3</sup> Melele xa suv toto Herod xa Mahulong milongeong ni, xi minexo pupu del moletin xil vus te hal Serusalem.\*

<sup>4</sup> Ma Herod mikes viton vat xil na pris xil del titsa xil te rae na Mosis e misis xil bit, “?Mesaea xa Hi tehiti xati mi Siu xil, ipot ingga xave?”

---

✧ **1:25:** Mat 1:21; Luk 1:31; 2:21   ✧ **2:1:** Luk 2:4-7   ✧ **2:1:** Luk 1:5; 3:1   ✧ **2:2:** Nam 24:17; Mat 2:9   \* **2:3:** Herod xa mahulong minexo vengan ien ti tavei tangan moletin ti namei naxolesi, e di mu vin ngan xil xa di lanem usili. Xosxa Herod minemi xa mol-Isrel xil labit lixolesi e liling suv toto tova nae, ma xi mikila ihu lelen mol-Isrel xil vus.

<sup>5</sup> Xil labit rilomun ni mini labit, “Ipot e metimal te hal Betlehem e provins te hal Sudea, vengan xa Hi tesepin texo tisen na provet tei nan tehit,✧

<sup>6</sup> *‘Tave ti neta xa metimal te hal Betlehem be hokorong mak mu ni metimal savsav xil vus na mol-Sudah xil, e nisak ni suv toto tei mei istal ixo en.*

*Xi ilaxat kuh mol-Isrel xil vus  
ixoni moletin tei xa di milaxat kuh sipsip san  
xil.’ ” (Maek 5:2)*

<sup>7</sup> Melele xa suv toto Herod xa Mahulong milonge mak, mikes xuxus ni eilep xil ak tangan lamei visali. Di, misis pilei xil tangan lihiteni mini melengien xati vari xa xil latepus rohon ni xa hitu ak testal.

<sup>8</sup> Di, Herod misil xil labe Betlehem e biteni mi xil bit, “Muha mulang kuhi ni horamue ak. E melele xa mukameti, mutilomun mei muhiteni minou tangan xa inou mun niha nimot mini.”

<sup>9-10</sup> Melele xa eilep xil ak lalong sepinien na suv toto, laba tangan lalang ni horamue ak. E melele xa di langgusil suse nae laba, hitu✧ xa latepusi tetiamu melele xa lateti tamu e ist mistal rilomun. E melele xa lapus hitu ak, labesi xil pupu. Hitu ak diamu ni xil e ba da kat e rute vari xa horamue ak da en.

<sup>11</sup> Ma melele xa labe nim, lapus horamue del ninen Meri ludi. E melele xa lapus horamue ak, latingeiril e lasa merereen nae mini. Di, laleh rerat sanien hos nae xil e lasa ni mini. Xil lasa gol,

---

✧ 2:5: Sion 7:42 ✧ 2:9-10: Mat 2:2

forangkansen, e mir.† ☆

<sup>12</sup> E vongien, Hi misep xol xil nggo metuveen tei xa linatilomun ti mun linave visal Herod. Ma xil langgusil suse sav ladilomun labe tim sae.☆

*Hi pol ni suse tangan horamue Iesu ilesae ihe Isip tangan ngan xil xa labit lavasi linatal xati ti*

<sup>13</sup> Melele xa eilep xil ak ladilomun laba, masx-axa tei na Hi Suv mei mistal mi Siosep nggo metuveen tei e biteni mini bit, “!Tamea! !Temanon, hur horamue xal ninen, e mutilesae mutihe Isip! Mutiti rute ak ituxol melele xa inou nihit mutilomun en. Upol ni imak vengan xa, navehi ti, Herod ilang ves horamue ak tangan vahas vini.”☆

<sup>14</sup> Misak ni, e vongien nen tak, Siosep mea po xat horamue e, del ninen, latlesae latbe kantri te hal Isip.

<sup>15</sup> Latodi rute ak ba duxoh melele xa suv toto Herod xa Mahulong mat. Ngan ak mistal tangan vapol ni sepinien na Hi Suv xa tehit lelen ni texo provet Hosea mei mistal be reitin xa tehit, “*Nakes natuxoli tangan imea ra hal Isip.*” (Hos 11:1)

<sup>16</sup> Melele xa Herod minem kila xa eilep xil te hal ist lateluvosi, ien mikat pupu. Ma, misemae ni moletin te vaeen nan xil tangan lihe metimal te hal Betlehem e ut xil mun xa di sangas tangan ha lihas malohos xil ngasen xa haram nae lu e be tan. Herod pol ni mak nggusil melele xati xa eilep xil te

---

† **2:11:** Gol be hat tei xa minehin pupu xa, tetiamu, latepol ni mei tehe mani. Forangkansen e mir lube vokon lu xa lapol ni ni tut vatiei. Mani te xatel vus be nesao e latehe sanien xa momal tangan lasa ni mi suv toto tei. ☆ **2:11:** Luk 2:16; Sam 72:10-11,15; Aes 60:6 ☆ **2:12:** Mat 2:22 ☆ **2:13:** Mat 1:20; 2:19

hal ist latehiteni mini xa latepus rohon ni hitu ak testal.

<sup>17</sup> Ngan ak mistal tangan vapol ni sepinien xa Hi Suv tehiteni texo provet Seremaea mei mistal be reitin xa tehiti,

<sup>18</sup> *“Moletin xil te hal Rama‡ lalong neta tei, lalong tangan tei xa nggeih di mistal.*

*Resel di muis pupu ve horamue nan xil xa lalel.*

*Ien ti tave tangan moletin ti napet rat nenemien nan,*

*vengan xa horamue nan xil latovuol mun.” (Ser 31:15)*

*Hi pol ni suse tangan Iesu itilomun ra kantri te hal Isip*

<sup>19</sup> Melele xa xatel latodi tamu e kantri te hal Isip, Herod xa Mahulong mat. Ma masxaxa tei mei mistal mi Siosep nggo metuveen tei✧

<sup>20</sup> e biteni mini bit, “!Tamea! Utel horamue xal ninen muttilomun mutihe tan na mol-Isrel xil, vengan xa ngan xil xa latehit lihas vin horamue ak, lalel tuei.”✧

<sup>21</sup> Ma, Siosep mitamea, del horamue xal ninen latdilomun latbe Isrel.

<sup>22</sup> E melele xa Siosep milongeong ni xa Arkelaos nggur vonine tamen, Herod xa Mahulong, mei be suv toto te provins te hal Sudea, xi ulin mikan tangan latohe rute ak. E Hi mun mike xati nggo metuveen tei✧ tangan latnava ti Sudea. Ma latbe provins te hal Kaleli

<sup>23</sup> e latdi rute ak e taon te hal Nasaret.✧ Ngan ak

---

‡ **2:18:** Rama be rute tei xa be sangas ni metimal te hal Betlehem, e lanemi labit latetihin Resel, atou na Siekob, en. ✧ **2:19:** Mat 1:20; 2:12 ✧ **2:20:** Eks 4:19 ✧ **2:22:** Mat 2:12 ✧ **2:23:** Mak 1:9; Luk 1:26; 2:39; Sion 1:45-46

misak ni naha xa Hi Suv tehit lelen ni texo provet xil mei mistal be reitin xa tehit, “*Likesi ni ngan Nasaret tei.*”§

### 3

*Sion Baptis misak mesen suse na Iesu  
Mak 1:1-8; Luk 3:1-18; Sion 1:19-28*

<sup>1</sup> Huram xil holu mei mitavi, e moletin tei ba de uruvuol e provins te hal Sudea, hisen Sion. Xi di baptaes ni moletin xil e di bithiteni bit,

<sup>2</sup> “!Muhiles ra tesaen namim xil, vengan xa Hi Suv dat sangas visal xamim e bit mei vahe suv toto e meulien namim!”✧

<sup>3</sup> Xi vari be ngan xa Hi teseq usili texo provet Aesea melele xa tehit,  
“*Lalong rae tei di miki e uruvuol xa bit,*

*!Musak mesen suse na Suv!*

*!Mupol ni suse nan imal!’ ”*

*(Aes 40:3)*

<sup>4</sup> Sion, eising nan lapol ni ni hili kamel e mituatu ni mavulut hilbe buluk. Anien an be kelmenamen xil del hani.\* ✧

<sup>5</sup> Moletin xil hao di lateha tangan lateong ni. Rute langgo taon te hal Serusalem e rute sav xil mun langgo ut sav xil e provins te hal Sudea. E ngan tesav xil mun, langgo rute xil sangas ni Oeisal Sodan.

<sup>6</sup> E melele xa lapusi, labit rerat tesaen nae xil mini, e Sion baptaes ni xil e Oeisal Sodan.

---

§ **2:23:** Latakil ti xa sepinien ak texo provet xave. ✧ **3:2:** Mat 4:17; 10:7; Mak 1:15 \* **3:4:** 2King 1:8bitheni xa Sion mising nggoni provet Ilaetsa tetiamu. Kelmenamen be hisit grashopa tei xa eilep xa lakila lava ni, e hani be oei tei xa mikas xa sukabug xil di lapol ni. ✧ **3:4:** 2King 1:8

<sup>7</sup> Farasi e Satusi xil holu mun lamei visal Sion tangan vabaptaes ni xil. E melele xa Sion pus xil, misepin nggeih mi xil bit, “!Xamim munggoni vanut tetal sasa xil xa di langas vin moletin xil ni vulongexil! ? Visi misel xat xamim tangan mulesae ra longpangasien xa Hi isa ni mi moletin xil te ut etan?✧

<sup>8</sup> Bos mak mu xa itiamu, mupol ni sexien xil xa ipisen ni xa mubiles ra tesaen namim xil ngamu.

<sup>9</sup> E munanemi ti munahit mutit ihos vengana xa Ebrahim be vatit avu namim.✧ !E-e! Nabiteni reitin mi xamim, Hi ikila isak ni hat xil ak mei lihe moletin xil xa labe vatimol na avu Ebrahim.

<sup>10</sup> Taxeak, akis mese tuei ve vatit vatiei xil vus. E ngan xil xa latahur huit hosien ti, lite rat xil e liso ni ihe upang.✧

<sup>11</sup> “Inou nabaptaes ni xamim ni oei tang tangan vapisen ni xa mubiles ra tesaen namim, e ngan xa itutou ni nou, xi ibaptaes ni xamim itel xat Ninin Eo✧ e upang. Xeihen nan mili navan, e natapin ti tangan name slev nan e naleh rat sandel nan.

<sup>12</sup> Xi bue xat xi ngamu tangan vaseti moletin xil vus. Xi ipol ni ixoni moletin tei xa po savel nan e di miso rerat utut uit ra valite. Utut uit xil xa labos, ileh viton ni ha ilingi e nim nen, e valite xa misa, itin ni ni upang tei xa mahulong xa misakras vamat.”✧

*Sion baptaes ni Iesu*  
*Mak 1:9-11; Luk 3:21-22*

✧ **3:7:** Mat 12:34; 23:33; Luk 3:7; Mat 23:33; Luk 21:23; Rom 1:18; 2:5; 5:9; Efes 5:6; Kol 3:6; 1Tes 1:10; Rev 6:16-17 ✧ **3:9:** Sion 8:33,37,39; Rom 4:12 ✧ **3:10:** Mat 7:19; Luk 13:7,9; Sion 15:6 ✧ **3:11:** Sion 1:26,31,33; Pol 1:5; 11:16; 13:24; 19:4 ✧ **3:12:** Mat 13:30



<sup>13</sup> E melele nen ak, Iesu nggo provins te hal Kaleli e xi mun bemei e Oeisal Sodan tangan Sion vabaptaes ni.

<sup>14</sup> E melele xa Sion pusi, misak pisi tangan vahiles nenemien na Iesu, ma biteni bit, “!E-e! ? Xouk di omei visal nou veneh? Momal tangan xouk ubaptaes ni nou vengan xouk obe eilep mak mu oli nou.”

<sup>15</sup> E Iesu bit rilomun ni mini bit, “Bos xa ubaptaes ni nou taxeak. Vengan xa, imak, ti ralipol ni holesok xil vus xa imal pe met Hi.” Misak ni, Sion maen ni, e baptaes ni Iesu.

<sup>16</sup> E melele xa Sion baptaes ni Iesu bus, Iesu mea ra oei. Vatei takes, tilang hat misaha, e xi pus Ninin na Hi mingga merou nggoni mae e mei dotan en.✠

<sup>17</sup> E rae tei mistal nggo ut nesao bit, “Ngan ak be Natuxoli reitin xa eheien navan di en. Inou nabesi nou pupu ven.”✠

## 4

### *Temat misak pis Iesu*

#### *Mak 1:12-13; Luk 4:1-13*

<sup>1</sup> Melele xa Iesu baptaes bus, Ninin Eo dela be uruvuol tangan vahur sakpisien vaxo he Temat.✠

<sup>2</sup> Ba de uruvuol e di bal ni anien. Melengien hanutap lu (40) mei mitavi,✠ e mae nggati tova tang.

<sup>3</sup> Di, Temat xa di misak pis moletin xil bemei visali. Xi biteni mi Iesu bit, “Xosxa reitin xa obe

---

✠ **3:16:** Sion 1:32 ✠ **3:17:** Sen 22:2; Sam 2:7; Aes 42:1; Mat 12:18; 17:5; Mak 9:7; Luk 9:35; 2Pit 1:17 ✠ **4:1:** Hib 2:18; 4:15 ✠ **4:2:** Eks 34:28

Nat Hi, ✧ ma usemae ni hat xil ak tangan lihiles mei lihe beret am.”

<sup>4</sup> E Iesu bit rilomun ni mini bit, “!E-e! Ninapol ni ti, vengan xa Vanuvei Eo biteni bit,

*‘Moletin misakras vameul e anien kestang.*

*Xi di meul e sepinien xil vus xa mistal nggo vulonge Hi.’ ” (Dut 8:3)*

<sup>5</sup> Di, Temat nggur Iesu lube Serusalem, taon eo na Hi. ✧ Xi miling Iesu misoh e ramut Nim Eo xa be nesao pupu.

<sup>6</sup> E melele xa ludi nesao, Temat biteni mini bit, “Xosxa obe nat Hi reitin, ✧ hut he tan. Vengan xa Vanuvei Eo na Hi biteni bit,

*‘Iahova isemae ni masxaxa nan xil tangan lilaxat kuh xouk.*

*Xil lipo xatuk ni hexil,*

*tangan xouk onatun lem ti e hat.’ ” (Sam 91:11-12)*

<sup>7</sup> E Iesu bit rilomun ni mini bit, “!E-e, ninapol ni ti! Vengan xa Vanuvei Eo biteni mun bit,

*‘Munasak pis Iahova ti xa be Hi namim*

*tangan mukameti xa xi di mi xamim.’ ” (Dut 6:16) ✧*

<sup>8</sup> Di, Temat nggur Iesu lube vathu tei xa be nesao xa be nesao. E rute ak, pisen kantri xil vus te ut etan mini e neta xil xa bos di en.

<sup>9</sup> Xi biteni mini bit, “Holesok xil vus ak, nisa lelaxatien te xil minuk xosxa utingeiril tang e umot minou.” ✧

---

✧ **4:3:** Mat 4:6; 27:40    ✧ **4:5:** Neh 11:1; Mat 27:53; Rev 11:2; 21:2,10; 22:19    ✧ **4:6:** Mat 4:3; 27:40    ✧ **4:7:** 1Kor 10:9    ✧ **4:9:** Eks 20:3; Dan 3:5,10,15; Rev 13:4

10 E Iesu bit rilomun ni mini bit, “!Setan, he reling nou! Ninapol ni ti vengan xa Vanuvei Eo biteni bit,

*‘!Mumot mi Iahova xa be Hi namim e muteong xat xi kestang!’ ” (Dut 6:13)*

11 Di, Temat be relingi, e masxaxa xil mei ladutou ni.

*Iesu pol kokot ni polien nan e provins te hal Kaleli*

*Mak 1:14-15; Luk 4:14-15*

12 Melele xa Iesu di tamu e uruvuol, milongeong ni xa Herod Antipas, xa be suv toto te provins te hal Kaleli, xi tetal xat Sion Baptis e teso ni tehe nim te xeih. ✧ Ma, Iesu dilomun be provins te hal Kaleli.

13 E xi tava ti mun e metimal te hal Nasaret, xi ba sung di taon te hal Kapaniam ✧ xa be sangas ni Oei Kaleli. Taon ak de tan na vatimol na Sebiulon xal Navtali tetiamu.

14 Ngan ak mistal tangan vapol ni naha xa Hi tehit lelen ni texo provet Aesea mei mistal be reitin xa tehit,

15 *“Nanggur longeongen tei ba mi moletin xil xa ladi e tan na vatimol xil na Sebiulon e tan na vatimol xil na Navtali.*

*Longeongen ak iha mi ngan xil xa ladi sangas ni Oei Kaleli xa de ist ni Oeisal Sodan. Reitin, iha mi moletin xil te hal Kaleli, e rute xil xa ngan xil xa latave Siu ti lapolu en.*

16 *Ngan xil xa ladi e maluxoluken te tesaen, xil lipus miehen na Hi xa mahulong. ✧*

*Reitin, moletin xil xa lalonge, tetiamu lateti pe mamel te maten,*

---

✧ 4:12: Mat 14:3; Mak 6:17; Luk 3:20; Sion 3:24 ✧ 4:13: Sion 2:12

✧ 4:16: Luk 1:79

*e taxeak, xil lipusi xa ut milan sung xiak.” (Aes 9:1-2)*

<sup>17</sup> E melele nen ak ba, Iesu ba di bithiteni mi moletin xil bit, “!Muhiles ra tesaen namim xil, vengan xa Hi Suv dat sangas visal xamim e bit mei vahe suv toto e meulien namim!”<sup>☆</sup>

*Iesu mikes moletin hat te sar meseo en tangan lathusili*

*Mak 1:16-20; Luk 5:1-11*

<sup>18</sup> Vatei, Iesu mikakao nggusil seri Oei Kaleli. E melele xa mikakao ba, pus timue lu xa di luso net nalu be oei. Hisealu Saemon (xa laling hisen tei mun be Pita) e Andru (xa be tunali),<sup>☆</sup> e lube moletin te sar meseo en.

<sup>19</sup> E Iesu biteni mi xalu bit, “Lumei luhusil nou. Xosali di mulihi meseo xil tang, e inou nisak ni xamil ti mulihi moletin xil.”

<sup>20</sup> Vatei takes, lustokovein net xil nalu e lunggusili.

<sup>21</sup> E melele xa latkakao latoba, Iesu pus timue lu mun, hisealu Temis xal Sion, xa lube nat Sepeti. Ludi bot del tamealu e di latdil pilei net natel xil. E melele xa Iesu mikes xalu,

<sup>22</sup> vatei takes, lube reling bot e tamealu, e lunggusil Iesu.

*Iesu pol ni polien na Hi e provins te hal Kaleli*

*Luk 6:17-19*

<sup>23</sup> Melele xa Iesu mikes moletin hat (4) ak, xatel latnggusili e labe rute xil holu e provins te hal Kaleli. E rute xil vus xa laba en, Iesu pispisi mi moletin xil e nim te pispisienna Siu xil. Xi di bithiten longeongen hos xa Hi di bemei tangan

<sup>☆</sup> **4:17:** Mat 3:2; 10:7    <sup>☆</sup> **4:18:** Sion 1:40-41

vahe suv toto na moletin nan xil, e di dal rerat moletin xil ra mesien nae xil vus.✧

<sup>24</sup> E longeongen usili mikapis e provins te hal Siria mun. Misak ni, moletin xil te rute ak laleh ngenexil xa lamesei ni mesien savsav xil: ngan xil xa tenbexil pangas, ngan xil xa ninin tesa xil ladi e xil, ngan xil xa di lamemat, e ngan xil mun xa rut tenbexil mat. Laleh xil lamei visal Iesu e xi midal rerat xil vus ra mesien nae xil.✧

<sup>25</sup> E melele xa Iesu di mikakao, vanut moletin xil holu di langgusili.✧ Xil langgo provins te hal Kaleli e provins te hal Sudea. Langgo taon te hal Serusalem, e provins te hal Dekapolis. E langgo ut xil mun xa ladi ist te Oeisal Sodan.

## 5

*E hu tei, Iesu pispisi usil sexien xil xa momal pe met Hi*

<sup>1-2</sup> Melele xa Iesu pus tatit moletin xil xa eilep xiak, xi be nesao e hu tei del moletin nan xil e dotan tangan vapispisi mi xil.

*Dispisien usil hisit moletin eah iaxa Hi ituxol xati*

<sup>3</sup> Iesu biteni mi xil bit,  
 “Tuxolxatien iti mi ngan xil xa lamei visal Hi be he hon tang,  
 vengan xa xi mei ihe suv toto nae e ilaxat kuh hisit moletin xil xa lamak.✧

<sup>4</sup> Tuxolxatien iti mi ngan xil xa di ladang,  
 vengan xa Hi ipet rat nenemien na hisit moletin xil xa lamak.✧

---

✧ 4:23: Mat 9:35; Mak 1:39    ✧ 4:24: Mak 6:55-56    ✧ 4:25: Mak 3:7-8    ✧ 5:3: Luk 6:20-23    ✧ 5:4: Aes 61:2-3

- 5 Tuxolxatien iti mi ngan xil xa labe hanmerou e  
nenemien nae be tan,  
vengan xa Hi isa rute xil vus e ut etan ihe na  
hisit moletin xil xa lamak.✧
- 6 Tuxolxatien iti mi ngan xil xa iexil bei pupu ni  
tengan limal pe met Hi,  
vengan xa xosxa imak, ma xi ipol ni mei ihe  
reitin e meulien nae.
- 7 Tuxolxatien iti mi ngan xil xa esaeen nae di e  
mosav xil,  
vengan Hi ipisen sexien te esaeen mi hisit  
moletin xil xa lamak.✧
- 8 Tuxolxatien iti mi ngan xil xa langgusil xat Hi del  
nenemien xa memese,✧  
vengan xa hisit moletin xil xa lamak lipus kuh  
Hi sung ni metexil.
- 9 Tuxolxatien iti mi ngan xil xa di laling tomat di  
mi moletin xil,✧  
vengan xa likes hisit moletin xil xa lamak ni  
horamue xil na Hi.
- 10 Tuxolxatien iti mi ngan xil xa di langgur long-  
pangasien vengan xa di lapol ni naha xa  
momal pe met Hi,✧  
vengan xa Hi mei ihe suv toto na hisit moletin  
xil xa lamak e ilaxat kuh xil.
- 11 “Tuxolxatien iti mi xamim melele xa moletin  
xil di lasep xar ba ni xamim, di lasa pangasien mi  
xamim, e di lasep usil xamim ni luvosen xil hao xa  
misa pupu vengan xa di munggusil xat nou.✧
- 12 Reitin, texo sexien nen xil tak, latesa pan-  
gasien teha mi provet xil xa lateti tetiamu ni

---

✧ 5:5: Sam 37:11 ✧ 5:7: Mat 18:33; Tem 2:13 ✧ 5:8: Sam 24:3-4  
✧ 5:9: Hib 12:14; Tem 3:18 ✧ 5:10: 1Pit 3:14 ✧ 5:11: Mat 10:22;  
1Pit 4:14

xamim.✧ E muhesi xamim tang vengan muhur huite teni sung xa ihe eilep e ut nesao.”

*Pispisien usil rin xa moletin xil na Hi langgoni sol e laet e ut etan*

*Mak 9:50; Luk 14:34-35*

<sup>13</sup> Iesu misepin rilomun bit, “Xamim munggoni sol xa lalingi del xat moletin xil te ut etan. ?E xosxa neta xa di misak ni sol ak bos be relingi, ma lipol ni mei ihos rilomun itep?!” !Lasakras lapol ni vamak! Sol xa tavos ti, lasakras lapol ni ti neta ni. Bos tangan liso ni iha e moletin xil ti lihes tan tang en.

<sup>14</sup> “Xamim munggoni laet tei xa di mileluv ba mi moletin xil e ut etan.✧ E nggoni ngan taxa taon tei xa de nesao e hu tei misakras vaxus, neketen namim mun, moletin xil ti lipus kila.

<sup>15</sup> Moletin tovuol xa vasahan laet, ti, vaha vaso xati ni pesin tova. !E-e! Xi di misoxolen ni de nesao tangan ti ileluv kuhi e vangit nim ve moletin xil xa ladi en.✧

<sup>16</sup> Nggusil sexien nen tak, laet te neketen namim ileluv kuhi iha mi moletin xil.✧ Imak, ma melele xa moletin xil lipus sexien hos xil namim, xil ti lipet rat his Hi Tamemim xa de ut nesao.”

*Pispisien usil rae xil na Hi*

<sup>17</sup> Iesu pispisi mi moletin xil bit, “Munanemi ti munahit inou namei tangan naso rerat rae xil na Mosis del pispisien xil na provet xil vaha. !E-e,

---

✧ **5:12:** 2Kron 36:16; Mat 23:30,37; Pol 7:52; Hib 11:32-38; Tem 5:10

\* **5:13:** Sol xa tetiamu tenaxoni ngan xil ti te xosali, tenamese ti. Tesak ni melele xa temer vuteili, ma neta xa tesak ni sol ak tehos tehe reling. ✧ **5:14:** Sion 8:12; 9:5; Plp 2:15 ✧ **5:15:** Mak 4:21; Luk 8:16; 11:33 ✧ **5:16:** Efes 5:8-9; 1Pit 2:12

tamak ti! Natamei ti tangan nasu rerat xil. E inou namei tangan nisak ni naha xa rae xil ak di lasep usili mei istal ihe reitin.✧

<sup>18</sup> E nabiteni reitin mi xamim xa holesok xil vus xa di e rae xil na Hi, mavulut sepinien xil vus xa latetisi teti en misakras vakesae. Vatova, ut nesao e ut etan lalikesae, e sepinien xil na Hi misakras vakesae ituxoh melele vari xa ipol vuol ni polien xil teni.✧

<sup>19</sup> Mak, ma ngan xil xa di langgur xoteh rae tei takes✧ na Hi xa hokorong tang e lapispisi ni mi moletin sav xil tangan lipol ihusili, ma, e melele xa Hi te ut nesao mei ihe suv toto na moletin xil, xil mei lihe neta sav tang. E ngan xil xa di lalong xat rae xil na Hi e di lapispisi ni mi moletin sav xil tangan lipol ihusili, xil mei lihe eilep mak mu e moletin xil na Hi Suv.

<sup>20</sup> Vengan nabiteni mi xamim, xosxa momalen namim pe met Hi nali ti momalen na titsa xil te rae na Mosis e momalen na Farasi xil mun, ma musakras mupus ti rute xa Hi be suv toto en.”

### *Pispisien usil tesaen te ekaten*

<sup>21</sup> Iesu biteni mun mi xil bit, “Xamim mutelonge xa Mosis tesa rae ak mi avu namim xil tetiamu tehit, ‘*Munahas vin ti moletin,*’ (Eks 20:13)✧ e moletin xa ipol ni imak ha lilepisi e lisa pangasien mini.

<sup>22</sup> E inou nabiteni mi xamim xa moletin xil vus xa ti iexil iat tua nae xil, Hi ilepis xil e isa pangasien mi xil.✧ Reitin, xosxa moletin tei biteni mi tuneli bit, ‘vatum tovuol,’ lihur moletin ak ha

---

✧ **5:17:** Mat 3:15; Rom 3:31   ✧ **5:18:** Luk 16:17; 21:33   ✧ **5:19:** Tem 2:10   ✧ **5:21:** Dut 5:17; Mat 19:18; Mak 10:19; Luk 18:20; Rom 13:9; Tem 2:11   ✧ **5:22:** 1Sion 3:15



lilepisi e koten na Siu xil e lisa pangasien mini. E xosxa moletin tei biteni mi tuneli bit, ‘otalang,’ xi di nggusil suse tangan ha ihe Upang xa misakras vamat.

<sup>23</sup> “Mak, ma xosxa xouk uha tangan osa sanien eo nam mi Hi e hor te sanien, e, e rute ak, onem rilomun ni neta tei xa moletin sav bit otepol ni mini xa tenamal ti,

<sup>24</sup> ustokovein sanien nam iti nga e rute ak sangas ni hor te sanien eo. Ti, uha mu userev rin nam itela. E melele xa userev xamil ivus, utilomun uha e usa sanien nam sung mi Hi.

<sup>25</sup> “E xosxa moletin tei bit vahuruk ove kot ve neta ngan xa xi bit otepol ni mini, ma utemanon ha userev rin nam itela melele xa di tamu munggusil suse tangan mulihe von koten. Maxani, xosxa onapol ni ti, melele xa multuxoh kot, xi ilinguk e he moletin te lepisien. Ma moletin ak mikila ilinguk e he polis, e polis mikila ilinguk e nim te xeih.✧

<sup>26</sup> Reitin li nabiteni minuk, xouk utat rute ak e osakras ovaha vem vamase vatuxoh melele xa uxal rat vuol ni faen xa lalingi di xatuk.”

*Pispisien usil sexien te kanen ni atou mu tiramue na mosav*

<sup>27</sup> E Iesu pispisi mun mi xil bit, “Xamim mute-longe xa Mosis tesa rae ak mi avu namim xil tetiamu tehit, *‘Munakan ni atou mu tiramue na mosav ti.’* (Eks 20:14)✧

<sup>28</sup> E inou nabiteni mi xamim xa melele xa moletin tei xa miteli ngamu pus atou tei e ngguri e nenemien nan tang, e pe met Hi, nggoni ngan

---

✧ 5:25: Mat 18:34-35; Luk 12:58-59 ✧ 5:27: Dut 5:18; Mat 19:18; Mak 10:19; Luk 18:20; Rom 13:9; Tem 2:11

xa mikan ni ngamu vengan pol misa tuei dela e nenemien nan.

<sup>29</sup> “Xosxa metom metu isak ni xouk umot e tesaen, ukis rati e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat.”✧

<sup>30</sup> E xosxa hem metu isak ni xouk umot e tesaen, uta xotehi e uso ni iha. Ihos mak mu xa rut tenbom tang ikesae, ili ngan xa liso sen tenbom xil vus ha ikesae e Upang xa misakras vamat.”✧

*Pispisien usil sexien xa moletin miteli, di, mistokovein atou nan*

<sup>31</sup> Iesu pispisi mun mi moletin xil bit, “Xamim mutelonge xa Mosis tesa rae tei mi avu nar xil tetiamu tehit, ‘*Moletin xa bit vastokovein atou nan, ha ipus moletin te lepisien xa ipol kuh Setifiket te Silaen nalu. Ti, mikila istokovein ni sung.*’ (Dut 24:1)✧

<sup>32</sup> E inou nabiteni mi xamim xa melele xa tiramue tei miteli del atou tei lunastokovein xalu ti pe met Hi.✧ E xosxa tiramue tei mistokovein atou nan, xa tamaen xi ti mi tiramue sav, tiramue ak di pol ni tesaen pe met Hi. Vengan naha xa tiramue ak di pol ni isak ni atou ak ha ihur moletin sav xa be tesaen pe met Hi. E moletin xa nggur atou ak, pe met Hi nggoni ngan taxa di mikan ni atou na tiramue ak.”

*Pispisien usil sexien xa moletin di pol ni hitxatien tei*

<sup>33</sup> Iesu pispisi mun mi moletin xil bit, “Xamim mutelonge xa Mosis tesa rae tei mi avu nar xil

---

✧ **5:29:** Mat 18:8-9; Mak 9:43-47 ✧ **5:30:** Mat 19:9; Mak 10:11-12; Luk 16:18 ✧ **5:31:** Mat 19:7; Mak 10:4 ✧ **5:32:** 1Kor 7:10-11

tetiamu tehit, *'Munaluvos ni his Hi ti e sepinien xil namim, e mupol vuol ni naha xa mutehit xati pe met Hi tangan mupol ni.'* (Nam 30:2)✧

<sup>34</sup> E inou nabiteni mi xamim xa munasuv xat hitxatien namim xil ti natel his ut nesao, vengan xa rute ak be vontoen na Hi.✧

<sup>35</sup> E munasuv xati ti mun natel his ut etan venggan xa be von kaele Hi. E munasuv xati ti mun ni his Serusalem, vengan be taon na Hi xa be suv toto.✧

<sup>36</sup> E munasuv xati ti mun ni vatumim vengan musakras muviles hilimim tei takes mei vamieh mu vamaluxoluk.

<sup>37</sup> Mak, ma melele xa mubit neta tei, muhiteni tang muhit, 'Io, be reitin,' mu, 'E-e, tave reitin ti.' Vengan xosxa musuv xat sepinien namim ni neta tei, ma sexien ak nggo Temat vari tang."✧

*Pispisien usil sexien xa moletin di misa rilomun ni pangasien mi mosav tei xa pol misa mini*

*Luk 6:29-30*

<sup>38</sup> Iesu pispisi mun mi moletin xil bit, "Xamim mutelonge xa Mosis tesa rae tei mi avu nar xil tetiamu tehit, *'Xosxa moletin tei purun met moletin sav, ma ngan xil te lepisien lipurun meten. E xosxa moletin tei diroh luh moletin sav, ma xi mun, litiroh luhon.'* (Eks 21:24)✧

<sup>39</sup> E inou nabiteni mi xamim xa munasa rilomun ni ti sexien tesa mi moletin tei xa pol misa mi xamim. Mak, ma xosxa moletin tei mei mileves vim metu, umaen ni mun ileves vim meil.✧

---

✧ **5:33:** Lev 19:12; Dut 23:21 ✧ **5:34:** Aes 66:1; Mat 23:22; Pol 7:49; Tem 5:12 ✧ **5:35:** Aes 66:1; Pol 7:49; Tem 5:12; Sam 48:2 ✧ **5:37:** Tem 5:12; 2Kor 1:17 ✧ **5:38:** Lev 24:20; Dut 19:21 ✧ **5:39:** Sion 18:22

<sup>40</sup> E xosxa moletin tei milinguk e kot ve kaon nam, e nggeih xatuk tangan usa eising nam mini ixo kaon nam, ma umaen ni ihur kot nam te masoh mun.✧

<sup>41</sup> Xosxa moletin tei te vaeen nggeih xatuk tangan upo ateli nan ha ituxoh kilomita tei, xouk upoe sung ha ituxoh kilomita ihe lu.

<sup>42</sup> E xosxa moletin tei dakesuk ve neta ngan, usa ni mini. E melele xa moletin tei ien bei tangan vahur neta tei nam vahe vuteili tang, onakenin ni ti, e umaen ni tang mini.”✧

*Pispisien usil sexien te eheien xa moletin ipisen ni mi elu nan xil*

*Luk 6:27-28,32-36*

<sup>43</sup> Iesu pispisi mun mi xil bit, “Xamim mute-longe xa Mosis tesa rae ak mi avu namim xil tetiamu tehit, ‘*Temim ihei tuemim xil.*’ (Lev 19:18)✧ E, ‘*Temim iat elu namim xil.*’†

<sup>44</sup> E inou nabiteni mi xamim xa iemim ti ihei elu namim xil e ti musis ve ngan xil xa di lapurun xamim.✧

<sup>45</sup> Ixo sexien ak, mupisen ni xa mube horamue xil na Tamemim xa de ut nesao.✧ Vengan xa xi iaxa di pol ni eai misinasin xat moletin tesa xil del ngan xil mun xa labos. E misak ni us mus tangan vakas naho sa ngan xil xa lamal pe meten e ngan xil mun xa latamal ti.

---

✧ **5:40:** 1Kor 6:7 ✧ **5:42:** Luk 6:30 ✧ **5:43:** Mat 19:19; 22:39; Mak 12:31; Luk 10:27; Rom 13:9; Kal 5:14; Tem 2:8 † **5:43:** Latakil ti xa sepinien xati ak texo xave, e Sam 139:21-22 di biteni bit, “*Ten mikat ngan xil ak e labe elu minou.*” ✧ **5:44:** Eks 23:4-5; Pro 25:21; Rom 12:20; Luk 23:34; Pol 7:60; Rom 12:14; 1Kor 4:12 ✧ **5:45:** Efes 5:1

<sup>46</sup> ?Xosxa eheien nam di mi ngan xil kestang xa eheien nae di e xouk, onemi obit Hi isa sanien tova minuk ven? !E-e, tamak ti! !Vengan ngan xil mun xa di laleh takis xil di lapisan eheien mi tua nae xil!

<sup>47</sup> ?E xosxa di onggur pilei tumali xil kestang, sexien ak ihos ili sexien na mosav xil itep? Vengan ngan xil mun xa latakil ti Hi di lapol ni sexien ak.

<sup>48</sup> “E xamim, bos xa mumal tevi ixoni ngan taxa Tamemim xa de ut nesao momal tevi.”✧

## 6

### *Pispisien usil sexien xa lasa tutouen mi hoeo xil*

<sup>1</sup> Iesu pispisi mi moletin xil bit, “Melele xa mupol ni sexien xil xa Hi di biteni bit lamal pe meten, mulaxat kuh xamim tangan munapol ni ti pe met moletin xil tangan limerere ni xamim ven.✧ Vengan xa xosxa mupol ni imak, ma Tamemim xa de ut nesao nasa ti huite teni mi xamim.

<sup>2</sup> “Mak, ma melele xa musa neta ngan mi hoeo tei, munapol ni ti naxoni ngan xil xa lamese nggo hilibexil tang. Vengan melele xa di lasak mesen xil tangan lasa neta tei, xil labe nim te pispisienmu labe suse xil xa mahulong, e di lapol ni moletin te polien nae xil labui amaru tangan likes viton moletin xil limei e mei lipus naha xa xil lipol ni e lisa merereen mi xil. Nabiteni reitin mi xamim, xil di tuei langgur huite ve naha xa lapol ni xiak, e linahur ti mun huite teni e ut nesao.

<sup>3</sup> E melele xa mututou ni hoeo xil, mupol xuxus ni tang e suse xa tua hos namim xil linakil ti vari.

---

✧ **5:48:** Lev 19:2; Dut 18:13 ✧ **6:1:** Mat 23:5

<sup>4</sup> Imak, ma moletin xil linakil ti tutouen xa di musa ni mi mosav xil. E Tamemim xa di pus naha xa moletin xil di lapol xuxus ni, xi vari iaxa isa huite teni mi xamim.”

*Pispisien usil sexien te sisen*

*Luk 11:2-4*

<sup>5</sup> Iesu pispisi mi moletin xil mun bit, “Melele xa musis, munapol ni ti naxoni ngan xil xa di lapol ni nggo hilibexil tang. Vengan iexil bei tang tangan lasoh e lasis e nim te pispisien xil mu e seri suse xil xa mahulong tangan moletin xil holu lipus naha xa di lapol ni.✧ Nabiteni reitin mi xamim, xil di tui langgur huite ve naha xa lapol ni xiak.

<sup>6</sup> E melele xa musis mi Hi, ihos mak mu tangan muhe nim, mukoe xol puiteh, e musis mi Hi Tamemim xa moletin xil lasakras lapusi. E Tamemim xa di pus naha xa moletin xil di lapol xuxus ni, xi vari isa huite teni mi xamim.

<sup>7</sup> “E melele xa di musis, munasepin ni sepinien xil ti nahe holu xa be neta sav tang naxoni ngan xil xa latakil ti Hi reitin. Vengan xa ngan xil ak di lanemi labit hi nae xil liteong ni sisen nae xil melele xa limangang eilep ni sepinien xil holu.

<sup>8</sup> Reitin, munapol ni ti naxoni xil, vengan melele xa mutasis ti mu, e Tamemim mikil vuol ni ngamu naha xa mube tamure ni.✧

<sup>9</sup> “Mak, ma melele xa musis, muhiteni imak, ‘Hi Tamemim xa ode ut nesao,  
hisom be eo e momal tangan musa merereen minuk.✧

<sup>10</sup> Masis tangan mei uhe suv toto namem e ulaxat kuh xamem.

---

✧ **6:5:** Mat 6:16; 23:5    ✧ **6:8:** Mat 6:32; Luk 12:30    ✧ **6:9:** Esek 36:23

E nenemien xil vus nam istal ihe reitin e ut etan ixoni ngan xa testal ngamu e ut nesao.✧

11 Usa anien li mi xamem ipin te melengien xil vus.

12 Onaketeh ti mun nasa mi xamem ve holesok xil xa di mapol ni xa tamal ti.

Upol ni ixoni ngan xa xamem mun di maketeh bos rilomun mi ngan xil xa di lapol misa mi xamem.✧

13 Onamaen sakpisien xil te xeih ti namei e xamem,✧

e usikoe xol xamem ra he Temat.’\*

14 “Xosxa mosav tei pol misa mi xamim e muketeh bos rilomun mini, ma Hi Tamemim mun xa de ut nesao iketeh ihos ni xamim ve naha xa mupol ni.✧

15 E xosxa munaketeh ti navos mi mosav xil, ma Hi Tamemim mun naketeh ti navos mi xamim.”✧

### *Dispisien usil sexien te halen ni anien ve sisen*

16 Iesu pispisi mi moletin xil mun bit, “Melele xa mubal ni anien ve sisen, munapol ni ti naxoni ngan xil xa di lapol ni nggo hilibexil tang. Vengan xa melele xa labal ni anien, xil di lapol ni valnaoxil mikenu tangan moletin xil lipus kila xa mae nggat pangas xil.✧ Inou nabiteni reitin mi xamim xa xil langgur huite teni ngamu.

---

✧ **6:10:** Mat 26:42; Luk 22:42 ✧ **6:12:** Mat 18:32-33 ✧ **6:13:** Mat 26:41; Luk 22:40; Sion 17:15; 2Tes 3:3; 2Tim 4:18 \* **6:13:** Tetiamu, melele xa moletin xil latetis rilomun ni vanuvei na Matiu, lateso rin ni sepinien ak xa bit, “Ve lelatien, xeihen e minehinen xa de xouk vehakut misakras vavus. Reitin.” ✧ **6:14:** Mak 11:25; Efes 4:32; Kol 3:13 ✧ **6:15:** Mat 18:35 ✧ **6:16:** Aes 58:5; Mat 6:5; 23:5

17 E melele xa mubal ni anien ve sisen, bos mak mu tangan mukas valnaomim e musak kuh hilemim ixoni ngan taxa di mupol vehakut ni.

18 Imak, ma mosav xil linapus kil ti xa di mubal ni anien. E Hi Tamemim xa moletin xil lasakras lapusi, xi kestang ipus kila. Reitin, Hi Tamemim xa di pus kil naha xa moletin xil di lapol xuxus ni, xi vari iaxa isa huite teni mi xamim.”

*Pispisien usil nenexoen ve holesok xil te ut etan  
Luk 12:33-34; Mat 16:13; 12:22-31*

19 Iesu pispisi mi moletin xil mun bit, “Munaserev holesok namim xil ti nahe holu e ut etan. Vengan holesok xil te ut etan ak, pipei xil e turara likila lipangei,✧ e moletin te kanen mun mikila ihe nim e ha ikan ni.

20 E ihos mak mu tangan muserev holesok namim xil ihe holu e ut nesao.✧ Vengan xa, e rute ak, pipei xil e turara lasakras lapangei, e moletin te kanen mun misakras vahe nim e ha vakan ni.

21 Vengan nenemien namim iti e rute xa di muserev holesok namim xil iti en.

22 “Metemim nggoni laet te tenbemim. Xosxa metemim bos, ma muti e miehen e tenbemim mikila ipol ni sexien xil xa bos.

23 E xosxa metemim isa, ma muti e maluxoluken e ti mupol ni sexien tesa xil. E xosxa miehen xa vate xouk ihe tovuol, ma maluxoluken xa ite meulien nam ihe eilep pupu.”†

---

✧ **6:19:** Tem 5:2-3 ✧ **6:20:** Mat 19:21; Mak 10:21; Luk 18:22; Kol 3:1-2 † **6:23:** Miehen e maluxoluken lube vole usil sexien nar xil. Melele xa rapol ni sexien xil xa bos, ngan ak di pisen ni xa radi e miehen na Hi. E melele xa di rapol ni sexien xil xa misa, ngan ak di pisen ni xa radi e maluxoluken.



24 E Iesu biteni bit, “Moletin tei misakras vapol mi masta vahe lu (2). Maxani, ien iat tei e ien ihei ngan tesav; mu nenemien nan iti tei ixeh, e isin ni ngan tesav. Ve rin ak, musakras muhusil xat Hi vatel mani.✧

25 “Ma vengan rin ak be reitin, bos tangan munanexo ti ve naha xa mua ni mu naha xa mumu ni, mu naha xa musing xol tenbemim ni.✧ ?Midep, meulien nar be te anien en tang? ?Mu tenbexir be tangan taxa ti rasing xole? !E-e, tamak ti! Meulien xa di e xamim bos mili anien e naha xa di musing ni.

26 Mupus pis tuman xil xa di langga xolol. Xil latalih ti neta, e lataserev ti anien ae vati e povah mae xil. E tave ti neta xa latapol ni ti, e Tamemim xa de ut nesao iaxa di bangan xil. E pe met Hi, xamim mubos mak mu muleli tuman xil ak.✧ Ma mukil kuhi xa xi ilaxat kuh xamim.

27 Nenexoen ve neta ngan misakras vaso rin ni haoa tei mun vate meulien namim.

28 “?Mak, ma veneh iaxa di munexo ve rin te eising? Munem pis hungovae xil xa di lameul. Xil latapol ti e latatil ti eising nae.

29 E nabiteni mi xamim xa suv toto Solomon teti-amu,✧ eising nan xil tehos xa tehos, e hungovae xil ak, lasing xol xil bos mak mu laleli.

30 Hi mising xol hungovae xil ak bos xa bos, tave ti neta xa di lameul usil suse melengien tei takes, di, e melengien sav nen, lameles e lakiri. Di, ladaveas viton ni e laso ni be upang. ?E xosxa Hi di mising xol xil mak, ma munemi mubit misakras

---

✧ 6:24: Luk 16:9 ✧ 6:25: Plp 4:6 ✧ 6:26: Mat 10:31; Luk 12:7,24

✧ 6:29: 1King 10; 2Kron 9

vasing xol xamim vamak? !Ei, neketen namim hokorong tova tang!

<sup>31</sup> “Ma munanexo ti ve naha xa mua ni, ve naha xa mumu ni, mu ve naha xa musing ni.

<sup>32</sup> Vengan hisit nenexoen xil xa mak be na ngan xil xa latakil ti Hi reitin. Vengan Hi Tamemim mikil vuol ni holesok xil vus xa mube tamure ni e meulien namim.✧

<sup>33</sup> E ngan xa eilep mak mu iaxa mumaen Hi mei ihe suv toto e meulien namim e mupol ni naha xa momal pe meten. Melele xa mupol ni imak, holesok xil mun te meulien, Hi isa ni mi xamim.✧

<sup>34</sup> Ma munanexo ti mun ve neta xil xa mulehi visuvong, vengan mukila munem usili sung visuvong. Vengan melele te xeih xil xa di mubisu ni xosali, pipin te xosali tang.✧ Munaleh nenexoen xil te visuvong ti namei nave te xosali.”

## 7

### *Pispisien usil rin xa linalepis mosav xil ti Luk 6:37-42*

<sup>1</sup> Iesu pispisi mun mi moletin xil bit, “Onalepis moletin sav ti tangan opisen tesaen nan xil. Vengan xosxa upol ni imak, ma Hi mun ilepis xouk tangan ipisen tesaen nam xil.✧

<sup>2</sup> Vengan Hi ilepis xouk ixo hisit sexien taxa xouk di opol ni mi moletin sav. Ixo sexien xa di olepis mosav xil, Hi iaxa ilepis xouk ihusili.✧

---

✧ **6:32:** Mat 6:8; Luk 12:30 ✧ **6:33:** Sam 37:4 ✧ **6:34:** Eks 16:4

✧ **7:1:** Rom 2:1; 14:4,10; 1Kor 5:12; Tem 4:11 ✧ **7:2:** Mak 4:24

<sup>3</sup> “?Veneh ma di opus kil saxut liei tei xa hokorong tang xa de met tumali, e otapus kil ti vari merut liei xa mahulong xa da xat metom?”\*

<sup>4</sup> ?Veneh ma di osis tumali obit, ‘Tua li, maen nou namur rat saxut liei xai ra metom,’ melele xa merut liei tei xa mahulong dat e metom?

<sup>5</sup> Xouk di opol ni sexien hos xil nggo hilibom tang. Bos mak mu tangan upo rat merut liei xa da xat metom, ti, uketeh kuhi sung tangan ukila uhur rat saxut liei ra met tumali.

<sup>6</sup> “Holesok eo na Hi, munasa ni ti mi kuli xil, maxani, lihiles e lingas rilomun ni xamim. Reitin, munaso holesok xil ti xa bos mi vueili xil vengan lihe tan tang en.”†

*Pispisien usil sexien xa rasis Hi ve neta ngan  
Luk 11:9-13*

<sup>7</sup> Iesu pispisi mi moletin xil mun bit, “Xosxa iem ihei neta ra Hi, usisi, ma isa ni minuk. Reitin, xosxa ulang vesi, ma ukameti. Sisen nam ixoni ngan taxa ti urei puiteh na Hi, ma xi isaha minuk.✧

<sup>8</sup> Vengan moletin xil vus xa di lasisi ve neta ngan, xil di langguri; ngan xil xa di lalang ves neta ngan, lakameti; e puiteh di misaha mi ngan xil xa di larei.

<sup>9</sup> “?Visi e xamim tata xil mikila vasa meralihat tei mi horamue nan melele xa misisi ve anien?

<sup>10</sup> ?Mu vasa tetal sasa tei mini melele xa misisi ve meseo?

---

\* **7:3:** Koute te liei xalu ak be tesaen. † **7:6:** Nggo vole ak, Iesu di pispisi ni xa melele xa di osa nenemien eo xil na Hi xa bos pupu mi ngan xil xa latamese ti pe met Hi, xil linem male ni tang e lihiles lipurun xouk mun tang. ✧ **7:7:** Mak 11:24; Sion 14:13-14; 15:7; 16:23-24; Tem 1:5; 1Sion 3:22; 5:14-15

11 Ma, tave ti neta xa mube moletin tesa xil, e mukil kuh sexien mak xa ti musa sanien xa bos mi horamue namim xil. ?E midep ni sexien na Hi Tamemim xa bos pupu xa de ut nesao? Sexien nan bos mili sexien namim, e isa holesok xil xa bos mi ngan xil xa ti lisisi.”✧

*Pispisien usil suse xa moletin ihusili tangan ihe ut nesao*

*Luk 13:24*

12 E Iesu biteni mun mi moletin xil bit, “E holesok xil vus xa di mupol ni, mupol ni mi moletin sav xil ixoni ngan taxa iemim bei tangan xil lipol rilomun ni mi xamim.✧ Vengan xa nenemien ak be vatite te rae xil na Mosis e Tisen na provet xil tetiamu.”

13 Di, Iesu biteni bit, “Xamim, suse tangan muve ut nesao tave temale ti. Bos tangan muxo puiteh te suse xa hokorong tang. Vengan puiteh tei mun xalu xa eilep da, e moletin xil holu iaxa di langgo en e di langgusil suse nen xa be temale tang. E e hoxalit suse ak, xil likamet longpangasien xa mahulong pupu.

14 E puiteh xa be te suse xa nggeih xa hoxalite teni be meulien sal, puiteh ak hokorong tang. Moletin xil di lalang vesi, e vahis tang likameti e lixo en.”✧

*Pispisien usil rin xa itep iaxa lipus kil provet te luvosen xil*

*Luk 6:43-44; 13:25-27*

15 Iesu misel xat moletin xil bit, “Mulaxat kuh xamim tangan provet xil te luvosen mei linaluvos

---

✧ 7:11: Tem 1:17 ✧ 7:12: Mat 22:40; Rom 13:8-10 ✧ 7:14: Pol 14:22

xamim ti.✧ Vengan xil langgoni sipsip xil xa labos e lamerou nggo hilbexil tang. E e tinexil, xil langgoni kuli reran xil xa lasa xa di langas purun moletin xil.

16 Xamim mupus kil xil ixo huite te meulien nae. Moletin misakras valeh huit tavu ra vatit ai, mu huit manggo ra vatit vilu.‡ ✧

17 Usil rin ak, vatiei xil vus xa bos di laso huite xil xa bos, e vatiei xil xa misa di laso huite xil xa misa.✧

18 Vatiei xil xa bos, lasakras laso huite xil xa misa, e vatiei xa misa lasakras laso huite xil xa bos.

19 E vatiei xil vus xa lataso huite ti vahos, lite rat xil e ha liso xil lihe upang.✧

20 Usil sexien ak vari, mupus kil provet te luvosen xil ak ixo huite te meulien nae.✧

21 “Moletin xil hao xa, taxeak, di lakes nou ni ‘suv,’ xil linava ti rute xa Hi te ut nesao be suv toto en. Ngan xil kestang xa di lapol ni naha xa Tata navan e ut nesao ien bei tangan xil ti lipol ni, xil iaxa ha liti visali.✧

22 E Melengien te Lepisien,✧ moletin xil hao limei visal nou e ti lisepin e rin nae lihit, ‘!Suv, Suv! ?Midep? E hisom matehit rat sepinien na Hi, matehol rerat ninin tesa xil, e matepol ni merekel xil holu.’✧

---

✧ **7:15:** Mat 24:11,24; Luk 6:26; 2Pit 2:1; 1Sion 4:1; Rev 16:13; Esek 22:27; Mat 10:16; Sion 10:12; Pol 20:29 ‡ **7:16:** Sepinien xati teni bit, “moletin misakras valeh huit *grep* ra vatiei xa sanute di en, mu huit fik ra vatiei mun xa misa.” ✧ **7:16:** Tem 3:12 ✧ **7:17:** Mat 12:33,35 ✧ **7:19:** Mat 3:10; Luk 3:9; 13:6-9; Sion 15:6 ✧ **7:20:** Mat 7:16; 12:33 ✧ **7:21:** Luk 6:46; Mat 21:31; Rom 2:13; Tem 1:22,25; 1Sion 2:17 ✧ **7:22:** Rev 20:11-15 ✧ **7:22:** Ser 14:14; 27:15; Mak 9:38; Luk 9:49

23 Ti, inou nihiteni mi xil kekes nihit, ‘!Muhe reling nou xamim xa di mupol misa! !Natakil ti vari xamim!’ ”✧

*Pispisien usil rin xa meulien nar ihusil sepinien na Hi itep*

*Luk 6:47-49*

24 Di, Iesu misepin kor mi moletin xil nggo vole tei bit, “Xosxa xamim mulong sepinien navan xil ak e ha mupol ihusili,✧ ma xamim munggoni moletin tei xa be metisou xa mikili ni nim man de tan tei xa nggeih.

25 Us mus, oei mileh be eilep, e votiang bas nim ak, e tameru ti vengan misoh e tan xa nggeih.

26 E xamim xa di mulong sepinien navan xil ak e di mutahusili ti,✧ munggoni unu tei xa mikili ni nim man dat suhon tang.

27 Us mus, oei mileh be eilep, e votiang bas nim ak. !Ma nim man meru e mikiri lel vari tang!”

28 Melele xa Iesu pispisi mi tatit moletin xil ak bus, xil lamesep pupu ve pispisien nan xil.✧

29 Vengan xa xi pispisi mi xil nggoni ngan xa pispisien nan xil nggo vulonge Hi vari tang. Pispisien nan xil taxoni na titsa xil te rae na Mosis ti xa dit labit rilomun ni sepinien na titsa sav xil tang.

## 8

*Iesu dal rat moletin tei ra mesien lepori*

*Mak 1:40-45; Luk 5:12-16*

✧ **7:23:** Mat 10:33; 2Tim 2:12; Sam 6:8; Mat 13:41-42; 25:41

✧ **7:24:** Tem 1:22 ✧ **7:26:** Tem 1:23 ✧ **7:28:** Mak 1:22; Luk 4:32

<sup>1</sup> Melele xa Iesu pispisi mi moletin xil bus, xi bemei etan ra hu ak, e tatit moletin xil langgusili.

<sup>2</sup> Di, latemanin e moletin tei xa mesien leporsi da en bemei e hilaep te xil, mitingeiril pe met Iesu, e biteni mini bit, “Suv, xosxa iem bei li, xouk ukila upol ni hilbeok mei imese rilomun.”

<sup>3</sup> Ma, Iesu mite hen duxoli e biteni mini bit, “Bos, ieok bei tangan napol ni. !Umese rilomun!” Vatei takes, moletin ak, mesien nan be relingi e hilben mei memese rilomun.

<sup>4</sup> Di, Iesu biteni mini bit, “!Uteong ni nou! On-ahiteni ti mi moletin tova naha xa mistal ni xouk. ✧ Uha upisen xouk mi pris tova e Nim Eo, e usa ni mi Hi sanien xa Mosis tesemae ni moletin xil tangan lisa ni. ✧ Sexien nam xil ak ipisen ni mi xil xa tenbom bos ngamu e omese rilomun.”

*Iesu nggur rat mesien ra slev tei na vat na moletin te vaeen xil te hal Rom*

*Luk 7:1-10*

<sup>5</sup> Iesu mikakao be taon te hal Kapaniam. E melele xa mistal en, vat na moletin xil te vaeen te hal Rom bemei visali e misis tutouen ✧ mini bit,

<sup>6</sup> “Suv li, slev tei navan de tim e di milong pangas xi holu. Rin tei mat e da nga voninen.”

<sup>7</sup> Ma Iesu biteni mini bit, “Niha nihur rat mesien nan ihe relingi.”

<sup>8</sup> E vat ak bit rilomun ni mini bit, “O suv, onanexo pupu ti venou vengan xa natapin ti tangan mei ove tim savan. E nakila xa xosxa usepin tang, ma slev navan ilonge ihos rilomun.

---

✧ **8:4:** Mat 9:30; 12:16; Mak 7:36    ✧ **8:4:** Lev 14:1-32; Luk 17:14

✧ **8:5:** Sion 4:46-47

<sup>9</sup> Vengan xa eilep navan da, e inou mun nabe vat na moletin xil te vaeen. Misak ni, melele xa nabiteni mi tei e xil nabit, ‘He inggaxor,’ ma xi ba. E melele xa nabit, ‘Amei,’ xi bemei. E melele nabiteni mi slev navan nabit, ‘Upol ni netak,’ ma pol ni.”

<sup>10</sup> Melele xa Iesu milong sepinien nan, mitemanin ni e biteni mi ngan xil xa di langgusili bit, “Reitin mak, nabiteni mi xamim xa, e rin na mol-Isrel xil, natakameti mu moletin tova xa neketen nan nggeih nggoni ngan Rom ak.”<sup>☆</sup>

<sup>11</sup> E rute xa Hi be suv toto en, xi ipol ni anien tei xa mahulong itel moletin nan xil. E melele nen ak, moletin xil holu xa latave Siu ti mei lianien vituei itel Ebrahim, Aesak e Siekob, avu nar xatel tetiamu.”<sup>☆</sup>

<sup>12</sup> E holu e mol-Isrel xil xa Hi tehosei moletin nae xil tangan mei lave nan, xi iso rerat xil lihe hale e rute tei xa maluxoluk, e xil ti limuis, e ti lingas luhexil ve longpangasien nae xil.”<sup>☆</sup>

<sup>13</sup> Di, Iesu biles e biteni mi vat ak bit, “Utilomun uhe tim sam. Holesok xil istal ixoni ngan taxa di oneket en.”<sup>☆</sup> E melele nen ak vari, slev na vat ak, tenben bemei bos rilomun.

*Iesu mileh rerat mesien ra moletin xil holu  
Mak 1:29-34; Luk 4:38-41*

<sup>14</sup> Melele xa Iesu duxoh tim sa Pita, be nim e pusi xa avu kokon nan<sup>☆</sup> di pat de voninen, ven nggan.

<sup>15</sup> Melele xa pusi mak, Iesu mite hen duxol he tovolih ak. E melele xa duxoli, mesien nan be

---

<sup>☆</sup> **8:10:** Mat 15:28    <sup>☆</sup> **8:11:** Luk 13:28-29    <sup>☆</sup> **8:12:** Mat 13:42,50; 22:13; 24:51; 25:30; Luk 13:28    <sup>☆</sup> **8:13:** Mat 9:29; 15:28; Sion 4:50-51    <sup>☆</sup> **8:14:** 1Kor 9:5



relingi e mitamea. Di, tovolih ak nggur rut anien tei e misa ni mi Iesu.

<sup>16</sup> Melele xa meteneai be tan, moletin xil laleh ngan xil xa ninin tesa xil di xat xil, e Iesu nggol rerat ninin tesa xil ak labe reling xil nggo sepinien nan kestang. E ngan xil xa lamesei, xi dal rat xil vus ra mesien nae.

<sup>17</sup> Iesu pol ni mak tangan vasak ni naha xa Hi tehiteni texo provet Aesea mei ihe reitin xa tehit,  
*“Xi mileh rerat mesien nar xil  
 e po rat longpangasien nar xil mun.” (Aes 53:4)*

*Iesu misel xat ngan xil xa labit lavusil xati teng-  
 gan linem kuhi mu*

*Luk 9:57-62*

<sup>18</sup> E melele xa Iesu pusi xa tatit moletin xa mahulong ladi xorelisi, xi misemae ni moletin nan xil tangan livue xat bot tei tangan lihe ri Oei Kaleli.

<sup>19</sup> E melele xa Iesu e moletin nan xil di laba, titsa tei te rae na Mosis bemei visali e bit, “Titsa, ut xave xa uha en, inou nihusiluk.”

<sup>20</sup> E Iesu bit rilomun ni mini bit, “Asu xil,\* vale mae xil di, e tuman xil mun, nunu mae xil di. E Nat Moletin, tim san xati te pat en tovuol.”<sup>☆</sup>

<sup>21</sup> E moletin tei mun xa di nggusil Iesu biteni mini bit, “Suv, ieok bei tangan namusiluk. E itiamu, umaen nou nitilomun nihe tim savan e nilaxat tata navan ituxoh melele xa imat e nitihin ni.”

---

\* **8:20:** Sepinien xati teni bit, “fokis” xa langgoni kuli reran xil xa di lapol ni vale mae xil e tan nggoni ngan xa asu xil di lapol ni.

☆ **8:20:** 2Kor 8:9

22 E Iesu biteni mini bit, “Xouk uhusil xat nou xosali, ☆ e uling ngan xil xa lamat tangan ti lithin ngenexil xa lamat.”

*Iesu misemae ni votiang del oei tangan lalihe tan, e lulong xat raen*

*Mak 4:35-41; Luk 8:22-25*

23 Melele xa Iesu misepin bus, xi be bot e moletin nan xil langgusil xati tangan lave ri Oei Kaleli.

24 E melele xa di lalis laba, Iesu por sae. E tavehi ti, latemanin ni votiang tei xa mea e mu nggeih. Ngan ak misak ni oei nggelial holu, e tahe bemei e bot, sangas vamerir. E Iesu, xi por vovong.

25 E moletin nan xil laba lasiasi ni labit, “!Suv, ututou ni xamem li! !Ramat xi tak!”

26 Iesu bit rilomun ni mi xil bit, “?Ulimim di mikan veneh? !Neketen namim hokorong tova tang!” ☆ Di, mitamea e misemae ni votiang e oei bit, “!Luhe tan!” E vatei takes, xalu lube tan e an mei bos rilomun.

27 Melele xa moletin nan xil lapusi mak, late-manin e lasis pilei xil mun tang labit, “?Moletin ak be hisit moletin eah? !Neta sav xa votiang e oei, xalu mun di lulong xat raen!”

*Iesu nggol rerat ninin tesa xil labe reling moletin lu*

*Mak 5:1-20; Luk 8:26-39*

28 Melele xa lamei ut e ri oei, Iesu del moletin nan xil laduxoh tan te hal Kadara. Vatei takes, moletin lu lunggo vangihat xil xa be von tehinen e lumei visal Iesu. Moletin xalu ak, ninin tesa xil ladi e xalu e lasak ni xalu di lubas purun moletin

---

☆ 8:22: Mat 9:9; Sion 1:43; 21:19    ☆ 8:26: Mat 14:31

xil vus xa lamei sangas e rute ak. Misak ni moletin xil lasakras laka pas rute xa ludi en.

<sup>29</sup> Melele xa lamei sangas, lukei nggeih ba ni Iesu lubit, “!Nat Hi! ?!Upol ni naha mi xamem!? ?Omei inggak tangan osa pangasien mi xamem?☆ ?Onatatil ti melengien xati teni xa ti imei?”

<sup>30</sup> Tave sotin ti ra rute xa ladi en, tatit vueili xil holu di lasu.

<sup>31</sup> Ma ninin tesa xil ak ladakes Iesu labit, “Xosxa uhit uhol rerat xamem, ma umaen xamem muhe vueili xil xor.”

<sup>32</sup> Ma Iesu biteni mi xil bit, “!Muha!” Ma ninin tesa xil ak labe xat vueili xil. E vatei takes, tatit vueili xil ak laloh ba lakiri labe meteh etan, e ba lamerir e Oei Kaleli, e xil vus lalel. <sup>33</sup> Ngan xil xa di lalaxat vueili xil ak, ulixil mikan, ma laloh labe taon. E taon, latumul usil naha xil xa latepusi e naha xa testal mi moletin xalu xa ninin tesa xil lateti xat xalu.

<sup>34</sup> Misak ni moletin xil vus te taon ak laba tangan lapus ti Iesu. E melele xa lapusi, ladakesi tangan vahe reling ut sae.

## 9

*Iesu misak ni moletin tei xa rin tei mat mei bos rilomun*

*Mak 2:1-12; Luk 5:17-26*

<sup>1</sup> Iesu del moletin nan xil labe bot e langgur xoteh Oei Kaleli ladilomun labe Kapaniam, taon xati nan.

<sup>2</sup> Melele xa laduxoh taon, rut moletin xil lapo moletin tei del vet man tang e lamei ve Iesu venggan xa ri moletin ak mat. E melele xa Iesu pus kila

☆ 8:29: Mak 1:24; Luk 4:34

xa neketen nae di, xi biteni mi moletin xa rin tei mat bit, “Natuxoli, umaal. Ninaketeh ti mun nasa minuk ve tesaen nam xil.”✧

<sup>3</sup> Rut titsa xil te rae na Mosis ladi sangas e lalonge. Ma labiteni mi xil mun tang labit, “! Ei, moletin ak di misep xar ni Hi, vengan xa di misepin nggoni ngan taxa lehit xi be Hi vari tang!”

<sup>4</sup> E Iesu mikil naha xa di lanem usili.✧ Ma biteni mi xil bit, “?Veneh ma munggur xat nenemien tesa xil ak di e tinemim?

<sup>5</sup> ?Midep, sepinien eah iaxa be temale mak mu tangan namiteni: namit, ‘Ninaketeh ti mun nasa minuk ve tesaen nam xil,’ mu namit, ‘Utamea e ukakao’?

<sup>6</sup> E tangan xamim mupus kila xa Nat Moletin nggur xeihen e ut etan tangan vaketeh vahos rilo-mun mi moletin xil, mupus ngan ak ...” E Iesu biles, pus moletin xa rin tei mat e biteni mini bit, “! Utamea, uvulun vet mam, e upoe utilomun uhe tim sam!”✧

<sup>7</sup> Vatei takes, moletin ak mea e mikakao rilomun be tim san.

<sup>8</sup> Melele xa moletin xil lapusi mak, latemanin ni e ulixil mikan. Xil lapet rat his Hi xa misa hisit xeihen ak mi moletin tei tangan vapol ni sexien xil ak.

### *Iesu mikes Matiu tangan ihusili*

*Mak 2:13-17; Luk 5:27-32*

<sup>9</sup> E melele xa Iesu be reling rute ak e mikakao ba, xi pus moletin tei di dotan de nim te polien nan xa hokorong, hisen Matiu. Xi di mileh takis ra Siu xil tangan vasa ni vaha mi kavmen te hal Rom. E

melele xa Iesu pusi, mikesi bit, “!Amei! !Uhusil xat nou✧ e mei uhe moletin tei navan!” Ma Matiu mea, mistokovein polien nan xil, e nggusil xat Iesu.

<sup>10</sup> Ma Matiu del Iesu e moletin nan xil labe tim san. Xi pol ni anien tei e melele xa ladotan e di langganien, moletin hau te takis e moletin sav xil mun xa lasa pe met Siu xil lamei e langganien vituei del Iesu e moletin nan xil.✧

<sup>11</sup> Melele xa Farasi xil lapusi mak, lasis moletin xil na Iesu labit, “?Veneh ma titsa namim di ngganien vituei del moletin xil te takis e moletin tesa xil mun?”

<sup>12</sup> E melele xa Iesu milonge, biteni mi xil bit, “Moletin xil xa latamesei ti labit linakil ti tokta. E ngan xil kestang xa lamesei iexil bei tangan lapus tokta.

<sup>13</sup> E xamim, muha mulang ves koute te sepinien ak xa de Vanuvei Eo na Hi xa bit,

*‘Teok ti tavei sanien eo xil kestang namim,*

*e ieok bei mak mu tangan iemim isae e moletin sav xil.’* *(Hos 6:6)✧*

Vengan xa natamei ti tangan nakes moletin xil xa lamal ngamu pe met Hi tangan lihiles lihusil nou. E-e, namei tangan nakes ngan xil xa lapol ni tesaen tangan mei lihiles ra tesaen nae xil e lihusil nou.”

*Iesu biteni xa pispisien hu nan xil misakras vahusil xat sexien matu xil na Siu xil*

*Mak 2:18-22; Luk 5:33-39*

<sup>14</sup> Di, moletin xil na Sion Baptis lamei visal Iesu e lasisi labit, “Melengien xil holu, xamem del

---

✧ **9:9:** Mat 8:22; Luk 9:59; Sion 1:43; 21:19    ✧ **9:10:** Mat 11:19; Luk 7:34; 15:1-2; 19:7    ✧ **9:13:** Mat 12:7

Farasi xil mun di mabal ni anien tangan masis<sup>☆</sup> e mapisen ni xa malonge misa ve tesaen namem xil. E mapusi xa moletin nam xil latapol ni ti sexien ak. ?Veneh vari?”

<sup>15</sup> Iesu dei vole ak mi xil bit, “Melele xa moletin tei miteli, ngan xil xa lamei ve anien nen ak, labesi xil.<sup>☆</sup> ? Xamim munemi xa lilonge isa e lipol ni sexien xil te tangen melele xa moletin ak di tamu visal xil? !E-e, lasakras! E melengien tei di bemei xa moletin xil mei lihur rat moletin nen ak ra xil. E melengien ak vari, xil lilonge isa e lihal ni anien.”

<sup>16</sup> Di, Iesu dei vole tei mun mi xil bit, “Moletin tovuol xa vatil xol eising matu tei vatel saxut kaliko tei xa be neta hu. Vengan xa melele xa ikasi, kaliko xa be neta hu mei ileten pupu, ma ital papas eising matu ak e mei imeseh mak mu.

<sup>17</sup> “Nggusil suse nen tak, moletin tovuol xa vateh uaen hu vahe valite matu tei xa lapol ni ni hilbe sipsip vengan nggeih ngamu. Vengan xa xosxa ipol ni, ma uaen hu ak ikaio e valite teni imeseh. Maxani, valite ak isa e uaen imie ihe tan. Misak ni, moletin xil ti liteh uaen hu ihe valite xa be neta hu vengan memerou tamu, mikila ikaio. Imak, ma valite teni ihos e uaen mun xa di en ihos.”\*

*Iesu dal rat atou tei ra mesien nan del atuli tei ra maten*

*Mak 5:21-43; Luk 8:40-56*

<sup>18</sup> Melele xa Iesu di tamu misepin usil holesok xil ak, vat tei na Siu xil bemei visali, mitingeiril mini e biteni mini bit, “Natuxahin mat taxeak

---

☆ **9:14:** Mat 11:18; Luk 18:12    ☆ **9:15:** Sion 3:29    \* **9:17:** E vole xalu ak, Iesu di biteni xa pispisien hu xil nan di nggusil sexien hu xil tang, misakras vahusil xat sexien matu xil na Siu xil.

tang. Amei li, mei uling hem en,✧ ma imeul rilomun.”

<sup>19</sup> Ma Iesu mea e nggusil vat ak del moletin nan xil laba.

<sup>20</sup> Melele xa di lakakao laba, atou tei nggo pe tou Iesu bemei e duxol seri eising nan. Atou ak, mesien na atou xil basi haram lu e le tei (12) e misakras vavus.✧

<sup>21</sup> Xi duxoli vengan minemi bit, “Xosxa nituxol seri eising nan tang, ma nilonge ihos rilomun.”✧

<sup>22</sup> Melele xa atou ak duxol eising nan, Iesu biles, pusi e biteni mini bit, “Atou li, umaal. Nggo neketen nam, mesien nam be relinguk ngamu.”✧ E melele nen ak vari, mesien be relingi.

<sup>23</sup> Di, lakakao laba e laduxoh tim sa vat ak. E melele xa labe nim, Iesu pus rut moletin xil di lapol ni kikeien tei te maten, e vanut moletin tei xa mahulong lase vangit nim e di ladang ve atuli ak.

<sup>24</sup> E Iesu biteni mi xil bit, “!Mustal! Atuli ak tamat ti, xi di pat tang.”✧ E moletin xil lamem pepamen ni.

<sup>25</sup> E melele xa lasil rerat moletin xil labe hale, Iesu be vangit nim. Xi ba pus atuli, e dal xat hen.✧ Melele xa dal xati, atuli ak meul mun, milale e mitamea. <sup>26</sup> Longeongen usil naha xa Iesu tepol ni mikapis e ut xil vus e rute ak.

*Iesu pol ni metevar lu del moletin tei xa be vut mei labos rilomun*

---

✧ **9:18:** Mat 8:3; Mak 6:5; 7:32; 8:23,25; Luk 13:13 ✧ **9:20:** Lev 15:25 ✧ **9:21:** Mat 14:36; Mak 6:56 ✧ **9:22:** Mak 10:52; Luk 7:50; 17:19; Pol 3:16 ✧ **9:24:** Sion 11:11 ✧ **9:25:** Mak 1:31; 9:27

27 E melele xa Iesu be reling tim sa vat ak e di ngusil suse ba, metevar lu lumei visali e lunggusili.✠ Xalu lukei nggeih ba ni lubit, “!Ei, xouk xa ostal onngo vatimol na suv toto Deved!† !Iem isae li e xamel!”

28 Lunggusili duxoh melele xa Iesu be nim tei. Metevar xalu ak mun lunggusili lube vangit nim ak e Iesu misis xalu bit, “?Midep? ?Xamil muke reitin xa inou nikila nisak ni xamil muliketeh rilomun?”

E lubit rilomun ni mini lubit, “O suv, make reitin xa ukila upol ni.”

29 Di, Iesu mite hen duxoh metealu e biteni bit, “Holesok xil istal ixoni ngan taxa di muneket en.”✠

30 E metealu mei bos e luketeh rilomun. E Iesu misep xol xalu nggeih bit, “!Mulnahit naha ti xa napol ni mi xamil xiak mi moletin ti!”✠

31 E melele xa lube relingi, ba lubithiten naha xa Iesu tepol ni mi xalu, ma longeongen teni mikapis e ut xil vus e rute ak.

32 Melele xa moletin xalu ak lube hale, rut moletin xil lamei visal Iesu e ladel moletin tei xa be vut. Moletin ak misakras vasepin vengan xa ninin tesa tei da en.✠

33 E melele xa Iesu nggol rat ninin tesa ak be relingi, moletin ak misepin rilomun. Melele xa rut moletin xil ak lapusi mak, latemanin ni e labiteni mi xil mun tang labit, “!Ei termali, xir mol-Isrel xil ratapus ti mu neta tova vamak!”✠

---

✠ 9:27: Mat 20:29-31 † 9:27: Siu xil lake reitin xa Mesaea istal ixo vatimol na suv toto Deved, misak ni lakes Mesaea ni ‘nat Deved.’

✠ 9:29: Mat 8:13; 15:28 ✠ 9:30: Mak 7:36 ✠ 9:32: Mat 12:22; Mak 7:32,35; 9:17,25; Luk 11:14 ✠ 9:33: Mak 2:12



34 E Farasi xil labit, “Moletin ak nggur xeihen nan nggo Temat tangan vahol rerat ninin tesa xil vengan Temat be suv nae.”✠

*Iesu ien misae e moletin xil e misis tangan Hi isa moletin lihe holu mu mei lipol itel xil*

35 Dutou ni ngan ak, Iesu mikakao mikapis e taon e metimal xil vus mun e rute ak. Melele xa be rute tei, xi pispisi mi moletin xil e nim te pispisienna Siu xil, di bithiten longongen hos xa Hi mei ihe suv toto na moletin xil, e di midal rerat mesien ra moletin xil vus xa lamesei.✠

36 Melele xa xi pus tatit moletin xil ak xa labe holu pupu, xi polu ni esaeen✠ vengan xa pusi xa nenemien nae milangalu holu e latakil ti xa likamet tutouen ixo xave. Iesu pus xil langgoni sipsip xil xa moletin xa valaxat xil tovuol.✠

37 Misak ni, xi biteni mi moletin nan xil bit, “Anien holu temetu di tuei e naho,✠ e moletin xil te polien labe vuteili tang tangan ha lalehi vamei.

38 Ma musis Suv te naho tangan isa ti moletin xil te polien lihe holu mu mei lileh anien xa di naho nan.”✠

## 10

*Iesu misil lelen moletin nan xil xa labe lu e le tei (12) tangan ha lipol*

*Mak 3:13-19; Mat 6:7-13; Luk 6:12-16; 9:1-6*

<sup>1</sup> Iesu mikes viton moletin nan xil xa labe lu e le tei (12). Melele xa lamei visali, misa xeihen mi xil

---

✠ **9:34:** Mat 12:24; Mak 3:22; Luk 11:15    ✠ **9:35:** Mat 4:23; Mak 1:39; Mat 10:1; Mak 1:34; Luk 7:21    ✠ **9:36:** Mat 14:14; 15:32; Mak 6:34    ✠ **9:36:** 1King 22:17; 2Kron 18:16; Esek 34:5; Sak 10:2; Mak 6:34    ✠ **9:37:** Sion 4:35    ✠ **9:38:** Luk 10:2

tengan likila lihol rerat ninin tesa xil e lital rerat mesien ihe reling ngan xil xa lamesei ni mesien saysav xil.✧

<sup>2</sup> E ngan ak be his na eloheoh xil xa labe lu e le tei (12) na Iesu:✧

Ngan xa diamu, Saemon (xa hisen tei mun be Pita) e Andru (xa tuneli Pita).

Temis (nat Sepeti)

e Sion (xa tuneli Temis).

<sup>3</sup> Pilip,

Batalomiu,

Tomas,

Matiu (xa teleh takis),

Temis (nat Alveas),

e Tatios.

<sup>4</sup> Saemon (xa temos e vanut moletin tei xa iexil bei pupu tangan lameluv ra he mol-Rom xil), e Sudas Eskariot (xa tesa rat Iesu tehe he moletin tesa xil).✧

<sup>5</sup> Moletin lu e le tei (12) nen ak, Iesu misil lelen xil tangan ha lipol itel xat sepinien ak xa bit, “Xamim munava ti visal ngan xil xa latave Siu ti, mu ngan xil xa ladi taon xil na mol-Sameria xil.

<sup>6</sup> Muha visal mol-Isrel xil kestang xa langgoni sipsip xil xa lakesae.✧

<sup>7</sup> E melele xa di muba, muhithiten longeongen hos ak mi xil muhit, ‘!Hi di bemei tangan mei vahe suy toto na moletin xil!’

<sup>8</sup> Muleh rerat mesien xil ihe reling moletin xil xa lamesei, e ngan xil xa lamat, mutal rerat xil ra maten. Ngan xil xa langgur mesien leporsi, mupol ni hilibexil mei imese rilomun, e muhol rerat ninin

---

✧ **10:1:** Mak 6:7; Luk 9:1    ✧ **10:2:** Sion 1:40-51    ✧ **10:4:** Mat 26:25; 27:3; Mak 14:44; Sion 6:64; 12:4; 13:11; 18:2,5    ✧ **10:6:** Ser 50:6; Mat 15:24

tesa ihe reling moletin xil. E melele xa ti mututou ni moletin xil, xil linaxal xamim ti, vengan xa holesok xil vus xa xamim mungguri, mutaxale ti ra Hi.

<sup>9</sup> E kakaoen namim, munahur ti mani

<sup>10</sup> mu ateli. Munahur ti mun eising, sandel mu eitingil. Nabiteni mak vengan xa momal tangan moletin te polien xil lianien ixo he ngan xil xa lapol mi xil.✧

<sup>11</sup> “Melele xa mumei e taon mu metimal tei, mukamet moletin tei xa momal pe met Hi tangan vahur pilei xamim. Muti kat mutit tim san ituxoh melele xa muhe reling rute ak.

<sup>12</sup> E melele xa muba tangan muti e tim tei, iti-amu, musa tuxolxatien tei mi ngan xil xa ladi en muhit, ‘Tomat na Hi iti mi xamim.’✧

<sup>13</sup> Xosxa moletin xil te tim ak lamal pe met Hi, ma mupus kila xa tomat namim iti mi xil. E xosxa xil mupus kila xa latamal ti pe met Hi, ma tomat namim itilomun imei mi xamim, e muhe reling xil.

<sup>14</sup> E xosxa moletin tovuol xa ien vahei tangan vahur pilei xamim mu valong sepinien namim, muhe reling xil. E melele xa mumea ra tim sae mu taon nae, muhas rerat meas te rute ak ra lemim pe met xil. Ngan ak ipisen ni mi xil xa lapol misa pe met Hi.✧

<sup>15</sup> Reitin mak nabiteni mi xamim, e Melengien te Lepisien, pangasien xa Hi isa ni mi moletin xil xa ladi e taon ak ixeh mak mu ili ngan xa isa ni mi

---

✧ **10:10:** Nam 18:31; Luk 10:4,7; 1Kor 9:14; 1Tim 5:18    ✧ **10:12:** Luk 10:5-6    ✧ **10:14:** Luk 10:10-12; Pol 13:51

ngan xil xa lateti e taon te hal Sodom e Komorah tetiamu.”☆

*Iesu misel xat moletin nan xil bit melengien xil te xeih di bemei*

*Mak 13:9-13; Luk 21:12-17; 12:2-9; 12:51-53; 14:26-27; Mak 9:41*

<sup>16</sup> Iesu misel xat moletin nan xil bit, “!Muteong ni nou! Inou di nasil lelen xamim tangan muha e muxoni sipsip xil xa di mube hilaep te kuli reran xil.☆ Ma xamim muxuxou kuhi tangan sexien namim imese kuhi.

<sup>17</sup> Reitin, muxuxou kuhi ve xamim vengan xa vat xil na Siu xil lital xat xamim e liling xamim musoh e von lepisien nae. E xil limeas pangas xamim ni ao te xeih xil e nim te pispisiennae xil.☆

<sup>18</sup> E vengan xa di munggulil xat nou, lipol ni xamim ha musoh pe met vat xil te kavmen, e pe met suv toto xil mun. Imak, ma mukila muhithiten longongen hos mi xil e mi ngan xil mun xa latave Siu ti.

<sup>19</sup> E melele xa xil lital xat xamim, munanexo ti ve naha xa ti muvitene mi xil mu ti musa sepinien mi xil itep. Vengan xa, e melele nen ak, Ninin Eo iaxa isa naha xa mukila muhithitene.☆

<sup>20</sup> Reitin, nave xamim ti xa ti musepin, e ihe Ninin Eo na Tamemim iaxa isepin ixo xamim.

<sup>21</sup> “Moletin xil limaen tuexil tangan ha lihas vin xil, e tata xil mun ti lipol ni imak tang mi horamue nae xil. E horamue xil mun lihiles ni tamexil e

☆ **10:15:** Mat 11:24; Luk 10:12; Sen 18:20-19:28; 2Pit 2:6; Siud 7

☆ **10:16:** Luk 10:3; Sion 10:12; Pol 20:29; Rom 16:19 ☆ **10:17:**

Mak 13:9; Luk 21:12-13; Mat 24:14 ☆ **10:19:** Mak 13:11-13; Luk 12:11-12; Luk 21:14-19

ninexil mun, e limaen xil lihe he ngan xil xa lihas vin xil.✧

<sup>22</sup> Moletin xil vus iexil iat xamim vengan di munggusil xat nou.✧ E xamim xa musoh ixeih ituxoh hoxalite te sakpurunien xil ak, ma Hi iteh meulien e xamim.

<sup>23</sup> Melele xa moletin xil ti lipurun xamim e metimal tei, ha mulesae muhe metimal sav. Reitin mak nabiteni mi xamim xa munahe taon xil vus ti mu te hal Isrel, e Nat Moletin itilomun imei.✧

<sup>24</sup> “Moletin tei xa nggur pispisien nggo titsa tei, xi nanemi ti nahit xi be eilep mak mu mili titsa nan. E suse nen ak, slev tei nanemi ti nahit xi be eilep mak mu mili suv nan.✧

<sup>25</sup> Ma xamim xa di munggur pispisien xil navan, muhesi xamim tangan mumei muxoni inou, titsa namim. Reitin, xamim xa munggoni slev navan, mumaal tangan mei muxoni nou, suv namim. E xosxa lakes inou, suv namim, ni ‘Belsepul,’\* his tei xa misa, ma mukila xa likes xamim ni his xil mun xa isa mak mu vengan xa mube navan.

<sup>26</sup> “Misak ni, ulimim nakan ni xil ti. Holesok xil xa moletin tei bit vakutaxole, Hi isak ni mei iti kesao. Reitin, neta ngan xa miling xuxus ni, Hi ileh rerati imei e valkesao tangan moletin xil lipus kila.✧

<sup>27</sup> Holesok xil xa inou di nabiteni mi xamim melele xa ut maluxoluk, xamim ti muhit lelen ni mi moletin xil e miehen. E neta xa di nabit xuxus

---

✧ **10:21:** Maek 7:6    ✧ **10:22:** Mat 24:9; 24:13    ✧ **10:23:** Mat 16:27-28; 24:27,30,37,44; 25:31; 26:64; Mak 13:26; 14:62; Luk 9:26; 17:30; 18:8; 21:27    ✧ **10:24:** Luk 6:40; Sion 13:16; 15:20    \* **10:25:** ‘Belsepul’ be his tei te xaren xa Siu xil di lakes Temat ni, xa koute teni be ‘Suv na angelu xil.’    ✧ **10:26:** Mak 4:22; Luk 8:17

ni mi xamim, ha muhithiteni pe met moletin xil holu.

<sup>28</sup> “Ulimim nakan ni ngan xil ti xa lakila lavas vin tiei namim e lasakras lavas vin ninin namim. Ulimim ikan ni Hi kestang, vengan xa xi mikila ihas vin moletin tei, e nggo xeihen mun tangan iso ninin nan mun✧ ihe Upang xa misakras vamat.

<sup>29</sup> Munem usil tutut tuman xil ak. Mukila muxal lu ni mani tei xa be hokorong tang. E xosxa Hi Tamemim namaen ni ti, ma ti e xil misakras vamot vamat.

<sup>30</sup> E xamim, Hi buli sen hilumim xil vus xa di e vatumim.✧

<sup>31</sup> Misak ni, ulimim nakan ti vengan xa, pe met Hi, meulien namim be eilep mak mu mili meulien na tutut tuman xil ak.✧

<sup>32</sup> “Moletin xa bit rati xa xi be moletin navan pe met moletin sav xil, ma inou mun, nihit rati xa xi be moletin navan pe met Tata navan xa de ut nesao.✧

<sup>33</sup> E ngan xa di bit rati pe met moletin xil xa xi misin nou, inou mun, nihit rati pe met Tata navan xa de ut nesao xa nasin moletin ak.✧

<sup>34</sup> “Munanemi ti munahit inou namei tangan niling tomat e ut etan. E-e. Natamei ti tangan niling tomat, e namei tangan nisak ni moletin xil ti livae mi xil mun tang.

<sup>35</sup> Nggoni ngan taxa Vanuvei Eo na Hi di biteni, inou namei tangan nisak ni ...

*‘tiramue xil lihiles livae itel tamexil,  
atuli xil lihiles livae itel ninexil,*

---

✧ **10:28:** Tem 4:12 ✧ **10:30:** Pol 27:34 ✧ **10:31:** Mat 6:26; 12:12

✧ **10:32:** Rev 3:5 ✧ **10:33:** Mak 8:38; Luk 9:26; 2Tim 2:12

*e havnahin xil lihiles livae itel avu sasa atou nae xil.*

<sup>36</sup> *Reitin, moletin ihe elu mi ngan xil xa ladi vituei dela e tim san xati.* (Maek 7:6)

<sup>37</sup> “Ngan xil xa eheien nae di e tamexil mu ninexil mak mu mili nou, ma latapin ti tengan mei lave moletin navan xil. E ngan xil xa eheien nae di e horamue mu atuli nae xil mak mu mili nou, ma xil mun latapin ti tengan mei lave moletin navan xil.

<sup>38</sup> Ngan xil xa latapo eivave te longpangasien nae ti tengan lavusil xat nou, xil latapin ti tengan mei lave moletin navan xil.✧

<sup>39</sup> Ngan xil xa di lasak pisi tengan lakenin meulien nae ve xil tang, ma meulien nae ikesae reling xil. E ngan xil xa ti limaen meulien nae ikesae vengang di langgusil xat nou, ma, e ut nesao, xil likamet meulien sal.✧

<sup>40</sup> “E kakaoen namim, ngan xil xa ti lihur pilei xamim, ixoni ngan taxa ti lihur pilei nou. E ngan xil xa ti lihur pilei nou, ixoni ngan xa ti lihur pilei Tata navan xa misil nou namei.✧

<sup>41</sup> Reitin, moletin xa ihur pilei provet tei na Hi vengang xa mikila xa be provet tei, Hi isa huite teni mini ixoni ngan xa xi mun be provet tei nan.✧ E moletin xa ihur pilei moletin xa momal vengang mikila xi momal pe met Hi, Hi isa huite teni mini ixoni ngan xa xi mun momal pe meten.

<sup>42</sup> E moletin xa misa tutouen mi moletin tei navan xa be hokorong tang pe met moletin sav

---

✧ **10:38:** Mat 16:24; Mak 8:34; Luk 9:23 ✧ **10:39:** Mat 16:25; Mak 8:35; Luk 9:24; 17:33; Sion 12:25 ✧ **10:40:** Mat 18:5; Mak 9:37; Luk 10:16; Sion 12:44; 13:20; Kal 4:14 ✧ **10:41:** 1King 17:9-24; 2King 4:8-37

xil vengan mikila xi di nggusil xat inou, tave ti neta xosxa be oei te merir tang, reitin li nabiteni mi xamim, e ut nesao, moletin ak ihur sen huite teni.”✧

## 11

### *Iesu misep usil Sion Baptis*

#### *Luk 7:18-35*

<sup>1</sup> Melele xa Iesu misel xat moletin nan xil xa labe lu e le tei (12) bus, xi misil rerat xil laba. E xi mun be reling rute ak e ba be taon sav xil e provins te hal Kaleli. E melele xa di mikakao ba, di pispisi mi moletin xil e di bithiten longeongen hos na Hi mi xil.

<sup>2</sup> E melele nen ak, Sion Baptis teta tamu e nim te xeih.\* ✧ Xi milongeong usil holesok xil xa Iesu di pol ni. Ma misil rut moletin nan xil tangan liha visal Iesu e lisis pilei usil polien nan.

<sup>3</sup> Misak ni, xil lamei visal Iesu e lasisi labit, “? Xoukiaxa obe Mesaea xa Hi tehit xat xa isila imei,✧ mu mutatil tova tesav?”

<sup>4</sup> E Iesu bit rilomun ni mi xil bit, “Mutilomun muha e muhiteni mi Sion naha xa di mulonge e di mupusi.

<sup>5</sup> Ngan xil xa mete tevar, di laketeh; ngan xil xa latesakras lakakao, di lakakao; ngan xil latehur mesien leporsi, hilibexil mei bos; ngan xil vurangexil tevon, vurangexil metal; ngan xil latemat, lameul rilomun; e ngan xil xa latehe hoeo di langgur longeongen hos na Hi.✧

---

✧ **10:42:** Mak 9:41      \* **11:2:** Suv toto Herod miso Sion be nim te xeih e Mat 4:12. ✧ **11:2:** Mat 14:3 ✧ **11:3:** Mal 3:1; Mat 3:11; Sion 1:15,27; 6:14; Pol 19:4; Hib 10:37; Rev 1:4,8 ✧ **11:5:** Aes 35:5-6; 42:18; 61:1



<sup>6</sup> E Hi ituxol xat ngan xil xa tine nasoh ti ve pispisien mu sexien xil navan.”✧

<sup>7</sup> Melele xa moletin xil na Sion Baptis di laba, Iesu misep usili mi vanut moletin xil bit, “?Melele xa mutehe uruvuol tangan mupus Sion Baptis,✧ mutenemi mutehit ti mupus hisit moletin eah? ? Muteha tangan mupus moletin tei xa taxeih ti ng-goni husmunae tei xa teviei xa misakras vasomal melele xa votiang di buhi? E-e.

<sup>8</sup> ?Ma muteha tangan mupus naha? ?Moletin tova xa mising ni eising xil xa bos pupu? E-e. Vengan xa moletin xil xa di lasing mak ladi e nim xil xa mahulong ma suv toto xil.

<sup>9</sup> ?Muhiteni minou, muteha tangan mupus naha vari? ?Provet tova? !Reitin! Nabiteni mi xamim xa moletin ak be eilep mak mu mili provet sav xil.✧

<sup>10</sup> Vengan Sion be xi xa Vanuvei Eo na Hi di misep usili bit,

*‘Upusi. Inou nisil eloheoh navan itiamu ni xouk.*

*Xi iaxa iha tangan isak mesen suse ve meien nam.’* *(Mal 3:1)✧*

<sup>11</sup> “Reitin li nabiteni mi xamim, moletin sav tovuol xa latepesi e ut etan xa be eilep mak mu mili Sion. E xosxa moletin votei tei imaen Hi te ut nesao mei ihe suv toto nan, ma xi ihe eilep mak mu ili Sion pe met Hi.

<sup>12</sup> E melele xa Sion di tehithiten sepinien na Hi duxoh xosali, Hi di pol nggeih tangan vasak ni haxot te l Relaxatien nan mei vahe eilep mu, e ngan xil xa nenemien nae nggeih di lamos en.✧

---

✧ **11:6:** Rev 3:21; 12:11; 14:12    ✧ **11:7:** Mat 3:5    ✧ **11:9:** Mat 14:5; 21:26; Luk 1:76    ✧ **11:10:** Mak 1:2; Luk 1:76; 7:27; Sion 3:28  
 ✧ **11:12:** Luk 16:16

13 Vengan xa tisen xil na provet xil vus tetiamu tetel rae xil na Mosis teha tetuxoh Sion latesep usil melele xa Hi mei ihe suv toto na moletin xil.

14 E xosxa xamim mubesi xamim tangan muke reitin en, ma Sion be Ilaetsa xa Hi tehit xati tehit isila imei.✧

15 Xosxa vurangemim di, muteong kuhi ni naha xa di nabiteni.✧

16 “? Xamim, moletin xil te xosali, munggoni naha? Xamim munggoni tutut horamue xil xa di ladotan sangas ni von posen e di lake xat xil mun tang labit,

17 ‘Melele xa xamem di mapol ni nggoni ngan xa di mabas kitar e sien,  
iemim ti tavei tangan muvol vatel xamem.

E melele xa di mapol ni nggoni ngan xa di madang,  
iemim ti tavei tangan mutang vatel xamem.’

18 Xamim munggoni tutut xil ak vengan xa iemim ti tavei nou mu Sion mun. Melele xa Sion Baptis bemei, xi di bal ni anien ve sisen e tamu ti uaen, e xamim iemim ti tavei mubit, ‘!Sion, ninin tesa tei da en!’✧

19 Di, melele xa inou, Nat Moletin, namei, nang-ganien e namu uaen. E xamim iemim ti tavei nou mubit, ‘!Pus ti moletin ak! Xi di ngga vin xi ni anien e di mumun tova tang. E xi di mikes moletin xil te takis e moletin tesa sav xil ni timue.’✧ E sexien nar kekes ipisen ni xa visi e xir di nggusil metisouen na Hi.”

✧ **11:14:** Mal 4:5; Mat 17:10-13; Mak 9:11-13; Luk 1:17; Sion 1:21

✧ **11:15:** Mat 13:9,43; Mak 4:9,23; Luk 8:8; 14:35; Rev 2:7; 13:9

✧ **11:18:** Mat 3:4; 9:14 ✧ **11:19:** Mat 9:14; 9:11; Luk 15:1-2; 19:7

*Iesu misepin nggeih xat moletin xil xa lasin ni  
Luk 10:13-15*

<sup>20</sup> Di, Iesu misepin nggeih xat moletin xil te taon xil xa xi teha tepol ni merkel xil holu en. Vengan neta sav xa latepusi, latnaviles ti ra sexien tesa xil nae.

<sup>21</sup> Xi biteni bit, “!Aue li! !Isa pupu mi xamim, Siu xil te hal Korasin! !E isa pupu mun mi xamim, Siu xil te hal Betsaeta! Vengan xamim mutesin merkel xil xa natepol ni pe metemim, Hi isa pangasien ihe holu mi xamim. Vengan xa vahit moletin xil te hal Taer e Saedon<sup>☆</sup> xa latave Siu ti, lapus hisit merkel xil vaxoni ngan xa mistal mi xamim, ma xil laviles ra tesaen nae xil nousav ngamu. Io, xil lapien ni xa lalonge vasa vamak: lasing ni talmusu xil e laxul ni vulmeas.<sup>☆</sup>

<sup>22</sup> Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ixeh mak mu ili ngan xa isa ni mi ngan xil xa lateti e taon xalu te hal Taer e Saedon.

<sup>23</sup> ?E xamim, Siu xil te hal Kapaniam, munemi xa Hi ipet rat xamim muhe ut nesao? !E-e! !Xi iso xamim muhe etan e Upang xa misakras vamat! Vengan xa vahit moletin xil te hal Sodom<sup>☆</sup> lapus merkel xil vaxoni ngan xa natepol ni tetel xeihen pe metemim, taon ak vata tang vatuxoh xosali.

<sup>24</sup> Reitin li nabiteni mi xamim xa, e Melengien te Lepisien, longpangasien xa Hi isa ni mi xamim ixeh mak mu ili ngan xa isa ni mi ngan xil xa lateti e taon te hal Sodom ili xamim.”<sup>☆</sup>

---

☆ **11:21:** Aes 23:1-8; Soel 3:4-8; Amos 1:9-10; Sak 9:2-4    ☆ **11:21:** Esta 4:1; Rev 18:19    ☆ **11:23:** Sen 19:24-28; 2Pit 2:6; Siud 1:7  
☆ **11:24:** Mat 10:15; Luk 10:12

*Iesu misa memesien mi Hi ve movotei xil xa laneket en*

*Luk 10:21-22*

<sup>25</sup> E melele nen ak, Iesu misis bit, “Tata, xouk obe Suv te ut nesao e ut etan. Namesuk holu vengan xa di oling xuxus ni holesok xil ak ra ngan xil xa labe metisou e lakilakil kuhi. E di opisen koute teni mi ngan xil xa langgoni tutut horamue xil xa latasukul kuhi ti.”

<sup>26</sup> Tata, ngan ak be reitin vengan xa nggusil naha xa xouk iem bei tangan vastal. Reitin.”

<sup>27</sup> Di, Iesu misepin mi moletin xil bit, “Tata navan miling holesok xil vus di e heok.” E moletin xil latapus kil ti Nat Hi vengan xa Tamen kestang di pus kila. E moletin xil latakil ti Hi vengan xa Natneli kestang mikila del ngan xil mun xa Natneli bosei xil tangan ipisen ni mi xil.”

<sup>28</sup> “Mumei visal nou, xamim xa di mulong pangas xamim ve holesok xil xa meas xa di mupoe e meulien namim, e inou nisa ngengelen mi xamim.”

<sup>29</sup> Muteong ni nou e muhusil xat nou, vengan xa inou nabe hanmerou e nenemien navan be tan. Imak, ma mukamet ngengelen e meulien namim.

<sup>30</sup> Ve pispisien navan xil taxeih ti e holesok xil xa nilingi e xamim tangan mupol ni memeit tang.”

## 12

*Iesu pispisi usil Sabat*

*Mak 2:23-3:6; Luk 6:1-11*

---

✧ **11:25:** 1Kor 1:26-29 ✧ **11:27:** Mat 28:18; Sion 3:35; 13:3; 17:2; Plp 2:9 ✧ **11:27:** Sion 1:18; 10:15 ✧ **11:28:** Hib 4:1,10-11 ✧ **11:30:** 1Sion 5:3

<sup>1</sup> Vatei, e Sabat, Iesu e moletin nan xil di lakakao langgur xoteh naho tei te uit. E melele xa di lakakao laba, moletin nan xil, mae nggat xil, ma laki xoteh utut uit xil e di langga ni.✠

<sup>2</sup> E melele xa Farasi xil lapusi, lasepin mi Iesu labit, “Pus ti mu. Naha xa moletin nam xil di lapol ni di langgur xoteh rae na Mosis usil Sabat.”✠

<sup>3</sup> E Iesu bit rilomun ni mi xil bit, “?Midep? ?Xamim mutavuli ti naha xa suv toto Deved e moletin nan xil latepol ni melele xa mae teat xil?✠

<sup>4</sup> Deved tehe vangit Nim Tavolin na Hi e tehur beret eo xa pris xil kestang lakila lava ni. E Deved del moletin nan xil latea beret ak, neta sav xa latehur xoteh rae tei na Mosis.✠

<sup>5</sup> ?Midep? ?E ut sav, mutavuli ti xa e Sabat xil vus, pris xil xa di lapol e Nim Eo di langgur xoteh rae na Mosis usil Sabat, e pe met Hi, latapol ni ti tesaen?✠

<sup>6</sup> E xosali, moletin tei mistal xa be eilep mak mu mili Nim Eo na Hi.✠

<sup>7</sup> Vanuvei Eo na Hi di biteni bit, *‘Ieok ti tavei sanien eo namim xil kestang, e ieok bei mak mu tangan iemim isae e moletin sav xil.’* (Hos

6:6) Xosxa mukil koute te sepinien ak, ma munasa ti sepinien te xeih ak mi ngan xil xa latapol ni ti neta vasa.

<sup>8</sup> Moletin navan xil latapol ni ti neta vasa venggan xa xil di langgusil xat nou, Nat Moletin. E inou nabe eilep mak mu nali Sabat.”

<sup>9</sup> Di, Iesu e moletin nan xil labe reling rute ak e labe nim te pispisienna Farasi xil ak.

---

✠ **12:1:** Dut 23:24-25 ✠ **12:2:** Eks 20:10; Dut 5:14 ✠ **12:3:** 1Saml 21:1-6 ✠ **12:4:** Lev 24:5-8; 24:9 ✠ **12:5:** Nam 28:9-10 ✠ **12:6:** Mat 12:41-42; Luk 11:31-32

<sup>10</sup> E moletin tei xa hen mikavui da. E rut moletin xil mun ladi xa iexil bei tangan liso sepinien tova iha xat Iesu ve neta ngan. Misak ni, xil lasisi labit, “Hiteni mi xamem. ?Rae xil na Mosis maen ni tangan lapol ni moletin tei mei bos rilomun e Sabat?”✠

<sup>11</sup> Iesu bit rilomun ni mi xil bit, “?Midep? ?Xosxa tei e xamim, sipsip tei san mot be vul e Sabat, ma ipol ni naha mini? Xi ha ipo rati ra vul ak.”✠

<sup>12</sup> E moletin tei bos mak mu mili sipsip tei. Ma rae nar xil maen xir ti ripol ni sexien hos xil e Sabat.”✠

<sup>13</sup> Di, xi biteni mi moletin xa hen mikavui bit, “Te momal ni hem.” Ma melele xa miso hen momal, mei bos rilomun nggoni hen tei mun tesav.

<sup>14</sup> E Farasi xil lastal e di lasep ves suse tova tangan lihas vin Iesu ixo en.”✠

### *Iesu pisen ni xa xi iaxa be moletin te polien xa Hi tehosei*

<sup>15</sup> E Iesu mikila xa Farasi xil ak iexil bei tangan lihas vini, ma xi be reling rute ak. E tatit moletin xil holu langgusil Iesu e xi midal rerat mesien ra ngan xil vus xa lamesei.”✠

<sup>16</sup> E melele xa di pol ni, di misep xol xil tangan linavit ti mi moletin sav usil naha xa xi di tepol ni mi xil.”✠

<sup>17</sup> E holesok xil ak testal tangan vasak ni naha xa Hi tesep lelen ni texo provet Aesea mei ihe reitin xa tehit,

---

✠ **12:10:** Luk 14:3 ✠ **12:11:** Luk 14:5 ✠ **12:12:** Mat 6:26; 10:31; Luk 12:7,24; 13:16; Sion 5:9; 7:23; 9:14 ✠ **12:14:** Mat 27:1; Mak 11:18; Luk 19:47; Sion 5:16,18 ✠ **12:15:** Mak 3:7-10; Luk 6:17-19 ✠ **12:16:** Mat 8:4; 9:30; Mak 3:12; 5:43; 7:36

- 18 “Ngan ak be moletin te polien navan xa natehosei,  
 eheien navan di en e nabesi nou ven.  
 Nise xati ni Ninin navan,  
 e xi ihithiteni mi moletin xil te ut etan xa latave  
 Siu ti xa Hi ipol ni naha xa momal mi xil.
- 19 Xi nangor ti natel mosav xil e nameun votei ti.  
 Io, moletin ti nalong raen nave nesao usil suse  
 xil.
- 20 Ve esaeen nan di e ngan xil xa lataxeih ti,  
 xi napol ni ti neta naxeih mi xil.  
 E ngan xil xa lamerou tang,  
 xi napangei xil ti.  
 Xi ipol ni imak ituxoh  
 melele xa isak ni sexien xil xa momal pe meten  
 mei ili sexien xil xa tamal ti.
- 21 E moletin xil te ut etan  
 mei liling nenesien nae e hisen.” (Aes 42:1-4)

*Farasi xil Lakes Iesu ni Temat*

*Mak 3:20-30; Luk 11:14-23; 6:43-45*

22 Di, rut moletin xil ladel moletin tei bemei visal Iesu. Moletin ak, meten bar e misakras vasepin vengan ninin tesa tei da en. Ma Iesu misak ni moletin ak mei miketeh e misepin rilomun.✧

23 Ngan xil xa lapusi, latemanin ni labit, “? Midep? ?Moletin ak be ngan xa istal ixo vatimol na suv toto Deved xa Hi tehiti xati tangan isa ni imei?”

24 E melele xa Farasi xil lalong sepinien na moletin xil ak, labiteni mi xil labit, “!E-e! Moletin ak mikila vahol rerat ninin tesa xil tang vengan di pol del xeihen xa Belsepul,\* suv toto na ninin tesa xil, di misa ni mini.”✧

---

✧ **12:22:** Mat 9:32-33      \* **12:24:** ‘Belsepul’ be his tei xa Siu xil di lakes Temat ni, xa koute teni be ‘Suv na angelu xil.’      ✧ **12:24:** Mat 9:34

<sup>25</sup> E Iesu mikil nenemien nae, ma biteni mi xil bit, “Xosxa moletin xil na suv toto tei di labae mi xil mun tang, ma xeihen na suv toto ak mei ihe neta sav tang. E xosxa moletin xil xa ladi vituei e metimal mu vatimol tei di labae mi xil mun tang, ma his metimal mu vatimol ak iclesae.

<sup>26</sup> Ma xosxa Belsepul di minggol rerat ninin tesa nan xil, ma xi di bae mi xi mun tang. Xosxa imak, ma xeihen te lelatatien nan iclesae relingi.

<sup>27</sup> ?E xosxa Belsepul di misa xeihen minou tenggan nahol rerat ninin tesa nan xil, ma midep mi moletin namim xil? ?Xil langgol rerat ninin tesa xil ra moletin xil del xeihen na visi? Xil iaxa di lapisen ni xa neta xa di musep usili tamal ti.

<sup>28</sup> E xosxa inou di nanggol rerat ninin tesa xil ra moletin xil nggo xeihen xa Ninin na Hi di misa ni minou, ma ngan ak di pisen ni xa lelatatien na Hi xa be suv toto di mistal tuei mi xamim.✧

<sup>29</sup> “Nihit kila mi xamim ixo vole tei. Moletin tei misakras vahe nim ma silixin tei tenggan vakan ni holesok nan xil melele xa xi da tamu e tim san. Itiamu, ha ivar xat silixin ak. Ti, ikila ihe nim man e ileh vuol ni holesok nan xil vus.†

<sup>30</sup> “Ngan xil xa latamos ti vatel nou, xil di labae del nou.✧ E ngan xil xa latatutou ni nou ti tenggan maleh viton moletin xil vaxoni sipsip xil, xil di langgol rerat xil e di laloh tetasil.

<sup>31</sup> E nabiteni mi xamim, Hi mikila vaketeh vama rilomun mi ngan xil xa lapol ni hisit tesaen savsav xil mu lasep purun his Hi mu his moletin

---

✧ **12:28:** Pol 10:38 † **12:29:** E vole ak, Iesu be moletin xa be nim ma Temat tenggan vavar xati. Ve rin ak, xi mikila vahol rerat ninin tesa nan xil e di midal rat moletin xi ra mesien nae xil. ✧ **12:30:** Mak 9:40; Luk 9:50



sav.✠ E moletin xa misep purun his Ninin Eo, Hi misakras vaketeh vahos rilomun mini.

<sup>32</sup> Reitin, ngan xil xa di lasepin misa minou, Nat Moletin, Hi mikila vaketeh vahos rilomun mi xil. E ngan xil xa lasepin misa mi Ninin Eo, Hi naketeh ti navos rilomun mi xil, xosali mu melele xa ti imei.‡

<sup>33</sup> “Xosxa vatiei tei bos, ma huite teni mun ihos. E xosxa vatiei tei misa, ma huite teni mun isa. Huiei iaxa di pisen ni xa vatiei tei bos mu misa.✠

<sup>34</sup> !E xamim munggoni vanut tetal sasa xil xa di langas vin moletin xil ni vulongexil!✠ ?Xamim mukila musep usil holesok xil xa bos itep? ! Musakras! Vengan xa moletin xil di lasep usil naha xa di e iexil, e xamim mube moletin tesa xil.

<sup>35</sup> Moletin hos tei, ien polu ni nenemien hos xil, ma di misepin usil holesok xil xa bos. E moletin tesa tei, ien polu ni nenemien tesa xil, ma xi di misepin usil holesok xil xa misa.✠

<sup>36</sup> Nabiteni mi xamim, e Melengien te Lepisien, Hi ilepis sepinien talang namim xil vus xa di muso ni, e isa pangasien mi xamim ven.

<sup>37</sup> Reitin, itel sepinien namim xil tang, Hi ipus kila xa mumal mu mukavui, e isa naha xa imal mi xamim vus ihusili.”

*Titsa xil te rae na Mosis del Farasi xil lasis Iesu tengan vapol ni neta tova xa eilep tengan like reitin en*

*Luk 11:24-26,29-32*

<sup>38</sup> Di, rut titsa xil te rae na Mosis del Farasi xil mun lamei visal Iesu e labiteni mini labit, “Titsa,

---

✠ **12:31:** 1Tim 1:13    ‡ **12:32:** Iesu di misepin mak vengan xi di pol nggo xeihen na Ninin Eo, e Farasi xil labilesi labit xeihen nan nggo Temat.    ✠ **12:33:** Mat 7:16-20    ✠ **12:34:** Mat 3:7; 23:33; Luk 3:7    ✠ **12:35:** Mat 15:18; Mak 7:21

iemem bei tangan upol ni neta tova xa eilep tangan mapus kila xa be reitin xa xouk onngo visal Hi.”✧

<sup>39</sup> E Iesu bit rilomun ni mi xil bit, “Xamim, moletin xil te xosali ak, mukavui e mustokovein Hi nggoni atou xa mistokovein tiramue xati nan tangan vahur tiramue sav tova. Ve rin ak, iemim bei tangan mupus neta tova xa eilep tangan muke reitin xa natexo visal Hi namei. E ninapol ni ti neta xa eilep ve xamim. Mupus neta tei takes xa ixoni ngan xa testal mi provet Siona tetiamu.✧

<sup>40</sup> Vengan provet Siona tete vang meseo melengien e vongien tol (3).✧ Nggusil sexien nen tak, inou mun, Nat Moletin, nite pe huitan te maten melengien e vongien ihe tol (3).

<sup>41</sup> E Melengien te Lepisien, mol-Nineva xil lisoh e lisepin iha xat sexien na moletin xil te xosali. Reitin, xil lisepin iha xat xamim vengon xa melele xa xil latehe elu mi Siu xil, latelong sepinien na Hi xa provet Siona tehithiteni mi xil, xil latehiles ra sexien tesa nae xil. E xosali, tei xa be eilep mak mu mili Siona dak ngamu.✧

<sup>42</sup> Reitin, e Melengien te Lepisien, suv toto te hal Seba tetiamu xa tehe atou, xi isoh e isepin iha xat moletin xil te xosali. Vengan xi texo sotin pupu tangan mei valong metisouen na suv toto Solomon.✧ E xosali, tei xa be eilep mak mu mili Solomon dak ngamu.

<sup>43</sup> “Melele xa ninin tesa tei be reling moletin tei ba, di mikapis e uruvuol tangan vakamet ut tova

✧ **12:38:** Mat 16:1; Mak 8:11; Luk 11:16; Sion 6:30; 1Kor 1:22

✧ **12:39:** Mat 16:4 ✧ **12:40:** Siona 1:17 ✧ **12:41:** Siona 3:5,8

✧ **12:42:** 1King 10:1-10; 2Kron 9:1-12; Mat 12:6

xa bos te ngengelen. E melele xa takameti,

<sup>44</sup> ihiteni mi xi mun tang ihit, ‘Nitolomun nihe nim mavan xa natehe relingi natemei.’ E melele xa itilomun imei, ma ikameti xa ladaveas tuei e nim ak, laling pilei holesok xil, e ninin tesav tovuol en.

<sup>45</sup> Isak ni, xi iha e ileh ninin lu e he sav (7) xa lasa mak mu lali xi. E xil lihe nim, ha liti en. Nim ak be moletin tei, e lisak ni meulien na moletin ak isa mak mu ili ngan xa teti en tetiamu. ✧ Ngan istal mi xamim, moletin tesa xil te xosali ak.”

*Iesu bit lelen ni xa visi iaxa be ninen e tuneli xil  
Mak 3:31-35; Luk 8:19-21*

<sup>46</sup> Melele xa Iesu di tamu misepin mi vanut moletin xa mahulong xiak, ninen e tuneli xil lamei. ✧ Lamei lasoh ladi nga e hale e labit lisepin mini.

<sup>47</sup> Ma moletin tei bemei visal Iesu e bit mesen ni mini bit, “Ninom e tumali xil lasoh ladi nga hale iaxor, e labit lasepin minuk.”

<sup>48</sup> E Iesu bit rilomun ni mini bit, “?Visi iaxa be nana navan? ?Visi iaxa be tua navan xil?”

<sup>49</sup> Di, miti mikapis e moletin nan xil e biteni bit, “?Mupusi? Ngan xil ak labe nana navan xil e tua navan xil.

<sup>50</sup> Vengan ngan xil xa di lapol ni naha xa Tata navan xa de ut nesao ien bei tangan ti lipol ni, xil iaxa labe nana navan xil, tuxoli xil, e hinoxoli xil mun.”

## 13

*Iesu pispisi usil rin xa Hi mei ihe suv toto na  
moletin nan xil*

---

✧ 12:45: 2Pit 2:20 ✧ 12:46: Mat 13:55; Mak 6:3; Sion 2:12; Pol 1:14

*Iesu dei vole tei usil utiei xil xa di meul e hisit tan sav xil*

*Mak 4:1-20; Luk 8:4-15*

<sup>1</sup> E melengien nen tak, Iesu be reling nim ak e ba dotan de seri Oei Kaleli.

<sup>2</sup> E vengan xa vanut moletin xil labe holu pupu xa di lakapis xole, Iesu but be bot tei e ba dotan da en. E moletin xil lasoh ladi nga ut.

<sup>3</sup> Di, xi dei vole xil holu mi xil bit, “!Muteong kuhi! Vatei, moletin tei be naho tangan vazo utiei en. <sup>4</sup> E melele xa miso ni, rut utiei xil lakiri e suse xa tan nen nggeih, e tuman xil mei lada rerati.

<sup>5</sup> Rut utiei xil lakiri e tan xa hat xil holu di en e tan nen mahin tang. E inggak, utiei xil ak lateh manon vengan xa tan nen mahin.

<sup>6</sup> E melele xa eai bemei nesao, ngga vin ngan xil xa lateteh, e lameles lamat. Lamat vengan xa amulite xil tave tan pupu ti.

<sup>7</sup> Rut utiei xil mun lamot e tan xa munae tesa di meul en. E melele xa lateh, munae tesa xil ak lameul xol vin xil.

<sup>8</sup> E rut utiei xil ak, lamot e tan xa bos. Ma xil lameul bos, e laba ni huite xil. Ngan xil, laba ni huite xil holu; ngan xil mun laba ni huite xil holu mak mu; e ngan tesav xil mun, xil iaxa ladaxao xa ladaxao ni huite xil.\*

<sup>9</sup> !Xosxa vurangemim di, muteong kuhi ni naha xa di nabiteni!”<sup>☆</sup>

<sup>10</sup> Melele xa Iesu misepin bus, moletin nan xil lamei visali e lasisi labit, “?Veneh ma xouk di odei vole xil mi moletin xil?”

---

\* **13:8:** Sepinien xati teni bit, “uit xil ak ladaxao ni huite xa be 30, 60 e 100.” <sup>☆</sup> **13:9:** Mat 11:15; 13:43; Mak 4:23; Luk 14:35; Rev 2:7; 13:9

11 E Iesu bit rilomun ni mi xil bit, “Xamim iaxa Hi tehosei xamim tangan mukil kuh koute te sepinien xuxus usil itep iaxa xi mei ihe suv toto na moletin nan xil.✧ E moletin sav xil, Hi tenahosei xil ti tangan lakila.

12 Ngan xil xa lakil kuh koute te sepinien xil ak, ma Hi isak ni xil likilakil pilei mak mu ha vuma ... lipolu ni kilakilen nan. E ngan xil xa latakil ti koute xil teni, ma hokorong xa di langguri, Hi ihur rati ra xil.✧

13 Inou di nasepin mi xil nggo vole xil tangan, tave ti neta xa di lapus neta ngan, e xil latapus kil ti koute teni. Reitin, tave ti neta xa di lalong neta ngan, e xil lalong kil ti.

14 Sexien nae di misak ni sepinien na provet Aesea tetiamu mei be reitin xa bit,

*‘Xamim muteong vuma ... e munalong kil ti neta.*

*Muketeh vuma ... e munapus kil ti neta.*

15 *Tine moletin xil ak xa nggeih mei nggeih pilei sung,*

*e di laki xol vurangexil e di label xat metexil.*

*Xil lapol ni mak vengan iexil ti tavei tangan*

*lapus kil neta ngan ni metexil,*

*mu lalong kil neta ngan ni vurangexil.*

*Vengan xosxa linamak ti, ma xil likil kuh koute te sepinien navan,*

*tinexil mei imerou e lihiles meulien nae,*

*e inou mei nital rat xil ra mesien nae xil.’ (Aes 6:9-10)✧*

16 “E tuxolxatien na Hi di tuei e xamim, moletin navan xil, vengan melele xa mupus neta tei ni

---

✧ **13:11:** 1Kor 4:1; Efes 3:3-4; 6:19; Kol 2:2; 4:3 ✧ **13:12:** Mat 25:29; Mak 4:25; Luk 8:18; 19:26 ✧ **13:15:** Sion 12:40; Pol 28:26-27

metemim, mupus kila. E melele xa mulong neta ngan ni vurangemim, mulong kila.✧

17 Reitin li nabiteni mi xamim, tetiamu, provet xil holu e moletin sav xil xa latemal pe met Hi, iexil tehei mak mu tangan lapus naha xa xamim di mupusi xiak, e xil latnapus ti. Io, iexil tehei tangan lalong naha xa xamim di mulonge xiak, e xil latnalong ti.

18 “Muteong kuhi ni koute te vole xa natehiteni usil moletin xa milih kon e hisit tan tesav xil. 19 Utut kon ngan xil xa lakiri e suse xa tan nen nggeih, xil langgoni moletin tei xa milong sepinien usil rin xa Hi mei ihe suv toto e meulien na moletin xil. E melele xa milonge, xi talong kil ti koute teni. E Temat mitemanon bemei, nggur rat sepinien xa mot de tinen.

20 Utut kon ngan xil xa lakiri e tan xa hat xil holu di en, xil langgoni moletin xa milong sepinien na Hi e, vatei takes, ngguri del sien.

21 E vengan xa amulite xil te neketen nan tameul ti mu, moletin ak misoh e neketen nan be terume tang. E melele xa sakpurunien xil e melengien te xeih xil bemei ni ve sepinien ak, vatei takes, xi mot e neketen nan.

22 E utut kon ngan xil xa lakiri e tan xa munae tesa di meul en, xil langgoni moletin tei xa milong sepinien na Hi e minexo pupu ve holesok xil te ut etan e eheien nan di e mani mak mu holu.✧ Ma holesok xil ak lameul xol vin sepinien na Hi xa ngguri, ma tava ni ti huite e meulien nan.

23 E utut kon xil xa lakiri e tan xa bos, xil langgoni moletin xa milong sepinien na Hi e milong

---

✧ 13:16: Luk 10:23-24 ✧ 13:22: 1Tim 6:9-10,17

kila. E meulien nan, sepinien nen ak ba ni huite. E meulien na rut moletin xil, ba ni huite xil holu; e ngan tesav xil, ba ni huite xil holu mak mu; e ngan tesav xil mun, sepinien ak daxao xa daxao ni huite xil e meulien nae.”†

*Iesu dei vole usil munae tesa xil*

<sup>24</sup> E Iesu dei vole tei mun mi vanut moletin xil bit, “Suse xa Hi mei ihe suy toto te meulien na moletin xil ixoni moletin tei xa milih utut uit e naho san.

<sup>25</sup> E melele xa moletin xil vus ba lapat, elu tei na moletin ak bemei e naho san e miso utut munae tesa xil mun ba lamosos del uit xil ak. Di, milesae ba.

<sup>26</sup> Misak ni, melele xa uit xil ak lateh, lameul lamei nesao e langgur vei, munae tesa xil mun lameul vituei tang del xil.

<sup>27</sup> “Melele xa moletin xil te polien laba tangan lapus naho sa masta nae, lapus kil munae tesa xil en. Ma ladilomun ba labiteni mini labit, ‘!Masta! ?Midep? ?Utut uit xil xa oteso xil e naho sam latehos mu latesa tang? ?Vengan xosxa latehos, ma munae tesa xil ak latexo xave latemei?’

<sup>28</sup> “E masta nae bit rilomun ni mi xil bit, ‘!E-e! Elu tei navan iaxa tepol ni.’

“Ma moletin te polien nan xil lasisi labit, ‘?Ma midep? ?Iem bei tangan mava maput rerat munae tesa xil ak?’

<sup>29</sup> “E masta nae bit rilomun ni mi xil bit, ‘E-e. Muling xil limeul liti nga, maxani mutnaput rerat uit xil xa labos melele xa di muput rerat munae tesa xil ak.

---

† **13:23:** Sepinien xati teni bit, “... huite xa be 30, 60 e 100.”

<sup>30</sup> Muling uit e munae tesa xil tit lalimeul vituei tang ituxoh melele te leh anien en. E melele xa moletin xil ti limei tangan lileh anien, nihiteni mi xil tangan ha lileh rerat munae tesa xil ak itiamu, e livar viton xil lihe vanute xil. Ti, nimeis niso munae tesa xil ak lihe upang. ✧ Ti, moletin xil ak litilomun ha lileh uit xil e ha liserev kuh xil liti e povah navan.’ ”

*Iesu dei vole lu usil suse xa Hi mei ihe suv toto e meulien na moletin xil ixo en*

*Mak 4:30-34; Luk 13:18-21*

<sup>31</sup> E Iesu dei vole tei mun mi vanut moletin xil bit, “Suse xa Hi mei ihe suv toto e meulien na moletin xil ixoni utut mastad xa moletin tei ngguri e ba milihi e naho nan.

<sup>32</sup> Tave ti neta xa utut mastad hokorong mak mu ni utiei sav xil, e melele xa meul, di meul tepiei be nesao ba vuma ... mei mahulong pupu mili holesok sav xil xa di lalih xil e naho. E melele xa matu, xi mei be holiei tei xa mahulong xa pipin tangan tuman xil limei lipol ni nunu mae xil e halite xil.” ✧

<sup>33</sup> Iesu dei vole tei mun tesav mi xil bit, “Suse xa Hi mei ihe suv toto e meulien na moletin xil ixoni is vutei xa atou tei milehi e bilesi del pulaoa xa mahulong. E tave ti neta xa miso is be hokorong tang en, is ak pol ni pulaoa mikaio ba vuma ... mei be mahulong xa mahulong.” ✧

<sup>34</sup> E holesok xil xa Iesu misep usili mi vanut moletin xil, xi di misa ni mi xil nggo vole kestang. Xi tenavit kil ti koute nen mi xil.

<sup>35</sup> Iesu pol ni mak tangan vasak ni sepinien xa Hi tesa ni mi provet tei mei vahe reitin xa bit,

---

✧ **13:30:** Mat 3:12   ✧ **13:32:** Sam 104:12   ✧ **13:33:** Luk 13:20-21



*“Inou nitei vole xil.  
Reitin, nggo vole xil, nihithiten usil holesok xil  
xa di texus  
e melele xa Hi tepeas ni ut etan, e minggus  
duxoh xosali.” (Sam 78:2)*

*Jesu bit kil koute te vole usil munae tesa xil*

<sup>36</sup> Melele xa Iesu misepin mi vanut moletin xil bus, be reling xil e dilomun be nim xa da en. Moletin nan xil langgusili lamei visali, e lasisi labit, “?Vole usil munae tesa xil, ukila uhit kil koute teni mi xamem?”

<sup>37</sup> Ma Iesu biteni mi xil bit, “Koute teni mak. Inou, Nat Moletin, nabe moletin xa naso utut uit xa bos.

<sup>38</sup> Naho ak be ut etan, e utut uit xil xa lameul bos labe moletin xil xa Hi be suv toto nae. E munae tesa xil labe moletin xil xa Temat be suv toto nae.✧

<sup>39</sup> Elu na moletin xa teso xil be Temat. Melele te leh anien en be hoxalite te melengien xil xa radi en. E moletin xil xa mei lileh anien labe masxaxa xil.

<sup>40</sup> “Nggoni ngan xa laput rerat munae tesa xil e laso xil labe upang,✧ lipol ni imak e hoxalite te melengien xil xa radi en.

<sup>41</sup> Reitin, e melele nen ak, inou, Nat Moletin, nisil masxaxa navan xil tangan ha lihe ut xil vus xa di nalaxati, e liput rerat ngan xil xa di lapol misa e holesok sav xil mun xa di misak ni moletin xil di lamot e tesaen.✧

<sup>42</sup> Ti, masxaxa xil ha liso moletin tesa xil ak lihe upang xa mahulong, e, e rute ak, xil ti limuis e ti lingas luhexil ve longpangasien nae xil.✧

✧ **13:38:** Sion 8:44; 1Sion 3:10 ✧ **13:40:** Mat 3:10; 7:19; Sion 15:6

✧ **13:41:** Sef 1:3 ✧ **13:42:** Mat 13:50; 8:12; 13:50; 22:13; 24:51; 25:30; Luk 13:28

<sup>43</sup> Ti, ngan xil xa lamal pe met Hi, liminehin☆  
ixoni eai e rute xa Tamexil be suv toto en. !  
Xosxa vurangemim di, muteong kuhi ni naha xa  
di nabiteni!”

*Iesu dei vole usil sien na ngan xil xa lamaen Hi  
mei be suv toto e meulien nae*

<sup>44</sup> Iesu misepin rilomun mi moletin nan xil bit,  
“? Melele xa Hi mei be suv toto e meulien na  
moletin tei, ngan ak nggoni naha? Ixoni bokis tei  
xa holesok holu xa bos di en xa moletin tei teling  
xusus ni tete naho tei. Bokis ak da vuma ... moletin  
sav tei ba mikameti. E melele xa pusi, milonge bos  
xa bos ven. Ma miling xusus rilomun ni da ngga.  
Di, dilomun be tim san e pos ni holesok xil vus nan  
e mileh mani nen ba nggal rat tan xa bokis ak da  
en be nan.

<sup>45</sup> “? Reitin, melele xa Hi mei be suv toto e  
meulien na moletin tei, ngan ak nggoni naha?  
Ixoni moletin tei te bisnis xa di milang ves valit  
vatiei hos xil te tas.

<sup>46</sup> E melele xa mikamet valit vatiei hos tei te  
tas xa mani teni mahulong, xi mitemanin. Ma  
dilomun be tim san, e pos ni holesok nan xil vus.  
Di, mileh mani nen e ba nggal valit vatiei te tas ak  
be nan.

<sup>47</sup> “? Vatei mun, melele xa Hi mei be suv toto e  
meulien na moletin tei nggoni naha? Ixoni melele  
xa laso net tengan laleh meseo xil. Melele xa laso  
ni be tas, laleh hisit meseo sav xil holu.

<sup>48</sup> Melele xa net polu ni meseo xil, lalihi be ut. Di,  
moletin xil te meseo ladotan xorelisi e laso viton  
kuh meseo xil xa bos labe valeat xil. E meseo xil  
xa lasa, laso xil laba.

---

☆ **13:43:** Dan 12:3

<sup>49</sup> Imak vari e hoxalite te melengien xil xa radi en. Masxaxa xil mei lilepis moletin xil te ut etan ihusil suse nen tak. Xil lileh rerat moletin xil xa lasa ra ngan xil xa lamal pe met Hi,

<sup>50</sup> e ha liso moletin xil ak lihe upang xa mahulong. E rute ak, xil ti limuis e ti liat luhexil ve longpangasien nae xil.

<sup>51</sup> “?Midep, xamim mukil kuh koute te holesok xil ak, mu ...?”

E moletin nan xil labit rilomun ni mini labit, “Io, makila.”

<sup>52</sup> Iesu biteni mi xil bit, “Nggusil nenemien ak, titsa xil vus te rae na Mosis xa lamaen Hi mei be suv toto e meulien nae tangan lihusil kuh pispisien nan xil, xil langgoni eilep tei xa holesok nan xil holu. Ma xi mikila ihe nim man e ileh rerat holesok xil xa bos pupu, ngan xil xa be te nousav, e ngan xil mun xa be neta hu.”<sup>‡</sup>

*Iesu ba mi vatimol nan xati, e xil lasin ni  
Mak 6:1-6; Luk 4:16-30*

<sup>53</sup> Melele xa Iesu dei vole xil ak bus, xi be reling rute ak

<sup>54</sup> e ba be Nasaret, metimal xati nan. E rute ak, Iesu be nim te pispisien, dotan e di pispisi mi moletin xil. E melele xa lalong pispisien nan xil, latemanin ni e labiteni mi xil mun tang labit, “?Moletin ak nggur kilakilen e xeihen ak nggo xave?<sup>✧</sup>

<sup>55</sup> ?Tave nat moletin ti taxa di tepol ni nim xil tang? Nana nan be Meri. E tuneli xil labe Temis, Sioses, Saemon e Sudas tang.

<sup>‡</sup> **13:52:** Sepinien nen ak di misep usil pispisien xil te nousav xa di oltestamen, e pispisien hu xil na Iesu xa di e niutestamen.

<sup>✧</sup> **13:54:** Sion 7:15

<sup>56</sup> Hineli xil vus ladi visal xir e rute ak. !Moletin ak be tei e xir tang! ?Mak, ma xi nggur holesok xil ak nggo xave?”

<sup>57</sup> Ve rin ak, moletin xil tine misoh e lanem male ni Iesu.

E Iesu biteni mi xil bit, “Moletin xil vus di lamerere ni provet tei na Hi. E moletin xil te metimal xati nan e vatimol xati nan mun, xil tit lanem male ni.”<sup>☆</sup>

<sup>58</sup> Misak ni, e rute ak, Iesu tapol ni ti merekel xil vahe holu vengan xa neketen nae tovuol en.

## 14

### *Maten na Sion Baptis*

#### *Mak 6:14-29; Luk 9:7-9*

<sup>1</sup> E melele nen ak, suv toto Herod Antipas xa milaxat provins te hal Kaleli milongeong ni holesok xil xa Iesu di pol ni.

<sup>2</sup> Ma Herod biteni mi moletin te polien nan xil bit, “Iesu ak be Sion Baptis vari. Tave ti neta xa xi mat, e teme a rilomun ra maten. Ve rin ak iaxa nggur xeihen tengen vapol ni merekel xil.”

<sup>3-4</sup> Suv toto Herod Antipas minexo pupu mak vengan xi vari tesa raen tengen moletin te vaen nan xil ha lital xat Sion, livar xati, e liso ni ihe nim te xeih. Xi tepol ni temak vengan xa Sion tese pin texeih teha xati tehit, “Herod, sexien nam xil tamal ti vengan ote li del Herodias, atou na tumali Pilip. Naha xa di opol ni nggur xoteh rae na Hi.”<sup>☆</sup>

<sup>5</sup> E tave ti neta xa Herod bit vahas Sion vamat, xi tenapol ni ti vengan ulin tekan ni ekaten na

<sup>☆</sup> 13:57: Sion 4:44    <sup>☆</sup> 14:3-4: Luk 3:19-20; Lev 18:16; 20:21

moletin xil vengan xil di latenemi latehit Sion Baptis tehe provet tei.✧

<sup>6</sup> Di, vatei, latepol ni anien ve melengien xa latepes suv toto Herod en. E melengien ak, atuli na Herodias tehol pe met moletin xil vus e tesak ni Herod tehesi xi pupu ven.

<sup>7</sup> Misak ni, xi pol ni hitxatien tei te xeih mi atuli ak xa isa naha vari xa xi ien bei mini.

<sup>8</sup> Ma atuli ak be visal ninen e misepin mini. Di, dilomun ba pus suv toto Herod e biteni mini bit, “Taxeak, ieok bei tangan uhas vin Sion Baptis, uta xoteh vatin, e usa ni minou ite tre tova.”

<sup>9</sup> Melele Herod milonge mak, xi milonge misa pupu. E neta sav xa milonge mak, xi misemae ni moletin nan xil tangan ha lipol ni, vengan ien ti tavei vahur xoteh hitxatien nan pe met moletin xil.

<sup>10</sup> Ma moletin te vaeen nan xil labe nim te xeih, e lada xoteh vat Sion ra tiei nan.

<sup>11</sup> Di, laling vatin de tre tei e lapoe ba lasa ni mi atuli ak. E xi sung, ngguri ba misa ni mi ninen.

<sup>12</sup> Melele xa moletin xil na Sion lalongeong ni xa xi mat, lamei e lapo tiei nan, ba ladihin ni. Di, ba labit mesen ni mi Iesu.

*Iesu misa anien mi moletin xil xa lali taosen lim (5000)*

*Mak 6:30-44; Luk 9:10-17; Sion 6:1-14*

<sup>13</sup> Melele xa Iesu milongeong ni xa Sion mat, xi but be bot del moletin nan xil e labalis labe ri oei e rute xa moletin xil latovuol en. E melele xa moletin xil lalonge, xil langgo taon nae xil e ba langgusili.

---

✧ 14:5: Mat 11:9; 21:26; Luk 1:76; 7:26

14 Ma melele xa Iesu but be reling bot, xi pus vanut moletin xil xa mahulong di ladatili tuei. E melele xa pus xil, ien misae e xil e midal rat ngan xil xa lamesei ra mesien nae xil.✧

15 E melele xa eai minu, moletin nan xil lamei visali e labiteni mini labit, “Rute ak be toun ut e da be vongien tuei xiak. Bos xa usil rerat vanut moletin xil ak liha tangan ha lihe metimal xil e lixal ti anien ae.”✧

16 E Iesu biteni mi moletin nan xil bit, “Rinasil rerat xil ti linaha. Xamim tang musa anien mi xil tangan lia ni.”

17 E xil labit rilomun ni mini labit, “!Ei! ?Mupol ni itep, vengon xa anien ar tapin ti? Pusi xiak, beret be lim e meseo mun be lu tang.”

18 Iesu biteni mi xil bit, “Musa ni vamei minou.”

19 Di, xi biteni mi vanut moletin xil tangan litotan e rute tei xa bos xa husmunae di en. Melele xa ladotan bus, mileh beret lim (5) del meseo lu (2), miketeh be nesao e misa memesien ba mi Hi ven. Di, bul papas beret xil e misa ni mi moletin nan xil tangan liseti beret ak itel meseo mun mi vanut moletin xil.

20 Moletin xil vus langganien kuhi e vange polu. E melele xa moletin xil na Iesu laba mun tangan laleh saxut anien xil, lase ni be valeat lu e le tei (12) ba vuma ... xil vus lapolu.✧

21 E melele nen ak, tiramue xil xa langganien duxoh taosen lim (5000). E atou e horamue xil, latavuli xil ti.

*Iesu mikakao e ramut oei*  
*Mak 6:45-52; Sion 6:15-21*

---

✧ **14:14:** Mat 9:36; 15:32   ✧ **14:15:** Mat 15:32; Mak 8:3   ✧ **14:20:** 2King 4:43-44

22 Melele xa langganien bus, Iesu biteni mi moletin nan xil tangan litiamu ni lihe ri Oei Kaleli. E xi kestang ita tangan isil rerat vanut moletin xil lihaha.

23 Melele xa misil rerat moletin xil bus, xi mika sen tang be nesao e vathu tei tangan ha vasis.✧ E inggak Iesu da tasen ba duxoh vongien.

24 E melele nen ak, moletin xil na Iesu ladi e bot nae e Oei Kaleli, sotin ra ut. E xil di lakameti nggeih tangan lavalis vengan labisu ni votiang tei xa nggeih e tahe xil mun mei di bas bot nae.

25 E makoe roroh, ut taluv pilei ti mu, Iesu bemei visal xil e di mikakao e ramut oei nggoni ngan taxa di mikakao e tan tang.

26 E melele xa moletin nan xil lapusi xa di mikakao e ramut oei, ulixil mikan tova tang e lameun be nesao labit, “!Aue li! !Ninin tei!”✧

27 E vatei takes, Iesu misepin mi xil bit, “!Ulimim nakan ti! !Inou tang! Tinemim namulul ti.”

28 E Pita bit rilomun ni mini bit, “!Suv, xosxa be xouk reitin, usemae ni tangan nikila nikakao e ramut oei e nihat visaluk!”

29 Ma Iesu biteni mini bit, “!Amei!”

Misak ni Pita but reling bot e di mikakao e ramut oei ba ni Iesu.

30 E melele xa Pita pusi xa votiang di bemei nggeih, ulin mikan, ma da merir be tan e oei. Melele xa pusi mak, mikei be nesao bit, “!O suv, ututou ni nou li!”

31 Vatei takes, Iesu misa hen e dal xati bit, “!Neketen nam hokorong pupu!✧ ?Veneh ma otanesi ti e nou?”

✧ 14:23: Luk 6:12; 9:28 ✧ 14:26: Luk 24:37 ✧ 14:31: Mat 8:26

32 E melele taxa lube bot, votiang be tan. ✧

33 Melele xa lapusi mak, moletin xil xa ladi e bot lamot mi Iesu e labiteni mini labit, “!O reitin mak, xouk vari iaxa obe Nat Hi!” ✧

34 Di, langgur xoteh Oei Kaleli ba vuma ... laduxoh ut e tan te hal Kenesaret.

35 E melele xa moletin xil te rute ak lapus kila xa be Iesu, lasa sepinien ba mikapis rute xil vus xa di sangas. Misak ni, moletin xil holu laleh ngenexil xa di lamesei lamei lapus Iesu.

36 E ladakesi tangan imaen xil lituxol seri eising nan tang. ✧ E xil vus xa laduxoli, mesien nae be reling xil.

## 15

*Iesu pispisi usil naha xa misak ni moletin xil lamese mu latamese ti pe met Hi*

*Mak 7:1-23*

1 Vatei, Farasi xil e titsa xil te rae na Mosis langgo Serusalem, lamei visal Iesu e lasisi labit,

2 “?Veneh ma moletin nam xil latahusil xat ti sexien xil xa elda nar xil tetiamu latesa ni mi xir? Vengan moletin nam xil di latakas he xil ti mu vamese, ti, lavanien sung.” ✧

3 Iesu bit rilomun ni mi xil bit, “?E veneh vari xamim di munggur xoteh rae xil na Hi tangan muhusil kuh pispisien namim xil tang?

4 Vengan Hi biteni bit, *‘Mumerere ni tamemim e ninemim xil.’* (Eks 20:12) ✧ E biteni

---

✧ **14:32:** Mak 4:39 ✧ **14:33:** Mat 16:16; 26:63; 27:54; Mak 14:61; 15:39; Luk 22:70; Sion 1:49 ✧ **14:36:** Mat 9:20-21; Mak 5:27-28; Luk 8:44 ✧ **15:2:** Luk 11:38 ✧ **15:4:** Dut 5:16; Mat 19:19; Mak 10:19; Luk 18:20; Efes 6:2



mun bit, *'Xosxa moletin tei isuhol tamen mu ninen, ma lihasi imat.'* (Eks 21:17)☆

<sup>5</sup> E xamim di mupispisi mi moletin xil xa likila lihiteni mi tamexil e ninexil lihit, 'Holesok xil navan xa nakila nitutou ni xamil ni, ngan xil ak nasikoe xole ngamu tangan nisa ni mi Hi keatang.'

<sup>6</sup> Nggo rin ak, di mupispisi mi moletin xil xa linamerere ti mun ni tamexil e ninexil natel holesok nae xil. Ma pispisien namim xil di pol ni sepinien xil na Hi mei be neta sav tang.

<sup>7</sup> !Xamim mumese nggot hilibemim tang! Naha xa Hi tehit lelen ni usil xamim texo provet Aesea momal xa tehit,

<sup>8</sup> *'Moletin xil ak di lamerere ni nou del sepinien nae xil keatang, e tine di sotin ra nou.*

<sup>9</sup> *Tave ti neta xa di lamot minou, inou nabit ninakil ti.*

*Vengan xil di lasa pispisien xil xa be na moletin xil tang,*

*e di labiteni xa inou iaxa ieok bei tangan lihusili.' "* (Aes 29:13)

<sup>10</sup> Di, Iesu biles e mikes vanut moletin xil lamei visali e biteni mi xil bit, "Muteong kuhi tangan mukila!

<sup>11</sup> Tave holesok xil ti xa moletin tei ngguri nggo vulongen be tinen iaxa di misak ni mei tamese ti pe met Hi. !E-e, tamak ti! E sepinien xa mistal nggo vulongen iaxa mikila vasak ni moletin ak mei namease ti pe meten."☆

<sup>12</sup> Melele xa Iesu be reling vanut moletin xil, moletin nan xil labiteni mini labit, "?Xouk okila

xa Farasi xil tine tesoh melele xa latelong sepinien nam?”

<sup>13</sup> E Iesu bit rilomun ni mi xil bit, “Farasi xil ak langgoni vatiei xil xa Tata navan xa de ut nesao tenalih xil ti. E limei liput rat xil itel lite xil.

<sup>14</sup> Mustokovein xil liti nga. Xil labe metevar, e di lasak pisi tangan ti litiamu ni metevar sav xil mun. E xosxa metevar tei di diamu ni metevar tei mun, ma xalu vus lalikiri lalihe vul tei.”✧

<sup>15</sup> E Pita biteni mini bit, “Hit kil koute te vole ak mi xamem li.”✧

<sup>16</sup> Di, Iesu misis xil bit, “?!Midep, xamim mutakil ti mul?”

<sup>17</sup> ?Mutakil ti xa holesok xil xa mungga ni nggo vulongomim ba be vangemim tang? Ma di, mistal be reling tiei namim, e ba be tisok tang.

<sup>18</sup> E holesok xil xa di tinemim e musepin ni nggo vulongomim, xi vari iaxa di pol ni xamim mutamese ti pe met Hi.✧

<sup>19</sup> Vengan melele xa tine moletin tei misa, xi di pol ni hisit sexien tesa xil ak:✧ minem usil holesok xil xa misa, bas vin moletin xil, mikan ni atou na mosav xil, di pat vituei del mosav melele xa lutateli ti mu, di mikan ni neta na mosav xil, di miluvos ni his mosav xil e kot, e di misep purun his mosav xil mun.

<sup>20</sup> Sexien xil ak di lapol ni moletin xil latamese ti pe met Hi. E xosxa moletin tei takas hen ti mu vamese, ti, vanien sung, ngan ak misakras vapol ni xa moletin tei namese ti.”

---

✧ **15:14:** Mat 23:16,24; Luk 6:39; Rom 2:19 ✧ **15:15:** Mat 13:36; Mak 4:10; 7:17; Luk 8:9 ✧ **15:18:** Mat 12:34 ✧ **15:19:** Rom 1:29-31; 1Kor 5:10-11; 6:9-10; Kal 5:19-21; Efes 5:3-5; Kol 3:5,8; 1Tim 1:9-10; 2Tim 3:2-4; 1Pit 4:3; Rev 21:8; 22:15

*Atou tei xa tave Siu ti mineket e xeihen na Iesu  
Mak 7:24-30*

21 Di, Iesu be reling rute ak e ba be rute sav tei xa be sangas ni metimal xalu te hal Taer e Saedon.

22 E ate-Kenan tei xa de rute ak bemei visal Iesu e dakesi bit, “!O suv li, xouk xa ostal onngo vatimol na suv toto Deved!<sup>☆</sup> !Iem isae e nou li! Ninin tesa tei da xat atuli navan e di pangei tova tang.”

23 E Iesu tasa ti sepinien tova mini. Ma moletin nan xil lamei visal Iesu e labiteni mini labit, “Usil rat atou ak iha vengam di mikei nggeih bemei mi xir.”

24 Misak ni, xi biles e biteni mi atou ak bit, “Hi misil nou tangan namei ve mol-Isrel xil kestang xa langgoni sipsip xil san xa lakesae.”<sup>☆</sup>

25 E ate-Kenan ak bemei e mitingeiril pe meten e dakesi nggeih bit, “!O suv! !Tutou ni nou li!”

26 E xi bit rilomun ni mini bit, “Tamal ti xa namur anien ae e naso ni tang vaha mi kuli xil.”

27 E atou bit rilomun ni mini bit, “Suv, ngan ak be reitin. E kuli xil mun xa ladi xorelis von anien en lakila lava saxut anien xil xa suv nae di ngga lingi.”

28 Di, Iesu biteni mini bit, “!Atou li, neketen nam mahulong tova tang! Naha xa di osis nou ni mei istal ihe reitin.”<sup>☆</sup> E vatei takes, atuli nan mei bos rilomun.

*Iesu misa anien mi moletin xil xa lali taosen hat  
(4000)  
Mak 8:1-10*

---

☆ **15:22:** Mat 9:27; 20:30,31; Mak 10:47,48; Luk 18:38,39 ☆ **15:24:** Mat 10:6 ☆ **15:28:** Mat 8:10,13; 9:29

<sup>29</sup> Melele xa Iesu be reling tan te hal Kenesaret, xi del moletin nan xil langgusil seri Oei Kaleli. Di, labe hu tei e ba ladotan ladi en.

<sup>30</sup> Di, vanut moletin xil holu lamei tangan lapus Iesu e laleh ngan nae xil xa lamesei: ngan xil xa lasakras lakakao, ngan xil xa mete bar, ngan xil xa le mikavui, ngan xil xa labe vut, e holu mun xa langgur hisit mesien savsav xil. Laling kekes ni xil pe met Iesu, e xi pol ni xil vus mei labos rilomun.

<sup>31</sup> E melele xa moletin xil lapus naha xa Iesu pol ni, latemanin pupu vengan xa ngan xil xa labe vut, di lasepin; ngan xil xa le xil mikavui, le mei momal; ngan xil xa lasakras lakakao, di lakakao; e ngan xil xa labe metevar, di laketeh. Melele xa lapusi mak, lapet rat his Hi na mol-Isrel xil ven.

<sup>32</sup> Di, Iesu mikes viton moletin nan xil e biteni mi xil bit, “Teok misae li e moletin xil ak vengan ladi visal xir melengien tol ngamu e anien ae tovuol. Ieok ti tave tangan nasil rerat xil latilomun lave tim sae xil melele xa mae dit nggat xil. Maxani, vexil namal e mete xil namaluxoluk e suse.”✧

<sup>33</sup> E moletin nan xil lasisi labit, “!Inggak be uru-vuol! ?Rikamet anien e rute xave tangan rakila risa ni mi vanut moletin xil xa mahulong xiak?”✧

<sup>34</sup> E Iesu misi xil bit, “?Beret vahis mungguri?”

Labit rilomun ni mini labit, “Beret lu e he sav (7) tang e tutut meseo vahis.”

<sup>35</sup> Ma Iesu misemae mi vanut moletin xil tangan litotan e tan.

<sup>36</sup> Melele xa ladotan bus, Iesu nggur beret lu e he sav (7) e meseo vahis e misa memesien ba mi

---

✧ **15:32:** Mat 14:15; Mak 6:36; Luk 9:12    ✧ **15:33:** Mak 6:37; Sion 6:5

Hi ven. Di, bul papasi e misa ni mi moletin nan xil tangan ha liseti mi moletin xil.

<sup>37</sup> Moletin xil vus langganien e vange polu. E melele xa moletin xil na Iesu laba mun tangan laleh viton saxut anien xil, lase valeat lu e he sav (7) ba vuma ... xil vus polu.

<sup>38</sup> Tiramue xil xa langganien e melengien ak laduxoh taosen hat (4000). E atou xil del horamue nae xil latavuli xil ti.✧

<sup>39</sup> E melele xa Iesu misil rerat vanut moletin xil ak labaha, xi del moletin nan xil labe bot e ba labe rute tei xa lakesi ni Makatan.

## 16

*Rut eilep xil na Siu xil lasis Iesu tangan vapol ni neta tova xa eilep xa vapisen ni xa xi texo visal Hi reitin*

*Mak 8:11-13; Luk 12:54-56*

<sup>1</sup> Vatei, Farasi e Satusi xil lamei visal Iesu tangan lasak pisi. Ma lasisi tangan vapol ni neta tova xa eilep xa vapisen ni xa xi texo visal Hi reitin.✧

<sup>2</sup> E Iesu bit rilomun ni mi xil bit, “Melele xa eai minu, xamim mubiteni mubit, ‘?Mupusi? Tilang hat pili. Ngan ak pisen ni xa an ihos visuvong.’

<sup>3</sup> E melele xa ut milan, mubiteni mubit, ‘Tilang hat pili. Ngan ak pisen ni xa an isa xosali.’ Xamim mupus kil naha xa di mistal e tilang hat, e musakras mupus kil naha xa eilep xa Hi di pol ni xosali.

<sup>4</sup> Xamim moletin xil te xosali ak, mubit mupus ti neta tova xa eilep xa vapisen ni xa natexo visal Hi reitin. Di mubit mupusi vengan xa meulien

---

✧ **15:38:** Mat 14:21; Mak 6:44 ✧ **16:1:** Mat 19:3; 12:38; Luk 11:16; Sion 6:30; 1Kor 1:22

namim mikavui e munggoni atou tei xa be na Hi, e di maen xi mi ngan tesav xil mun. E ninapol ni ti neta tova xa eilep tangan mupusi. Ti mupus neta tei takes xa ixoni ngan xa testal mi provet Siona tetiamu.”✧ Di, Iesu biles e be reling xil.

*Iesu misel xat moletin nan xil tangan liketeh kuhi ve pispisien xil na Farasi e Satusi xil*

*Mak 8:14-21*

<sup>5</sup> Di, Iesu del moletin nan xil langgur xoteh Oei Kaleli. E melele xa laduxoh rin, moletin nan xil lanem rilomun ni xa iexil bovorong ni beret ae.

<sup>6</sup> E melele xa laba, Iesu biteni mi xil bit, “Muketeh kuhi ve ‘is’ na Farasi e Satusi xil.”✧

<sup>7</sup> Melele xa lalong sepinien nan, lasep usili del xil mun tang labit, “Xi misepin mak mi xir vengan xa rataleh ti beret ar.”

<sup>8</sup> E Iesu milong kil naha xa di lasep usili. Ma ba biteni mi xil bit, “!Neketen namim hokorong pupu! ?Veneh ma di musep usil beret xa ar tovuol?

<sup>9</sup> ?! Mutakil ti mu!? ? Iemim bovorong ni ngamu xa natehangan tiramue xil latehe taosen lim (5000) tetel beret lim (5) tang? ?E valeat vahis polu ni rut anien xil xa muteleh viton ni?✧

<sup>10</sup> E munem usil melele xa natehangan moletin latehe taosen hat (4000) tetel beret lu e he sav (7) tang. ?E valeat vahis polu ni rut anien xil xa muteleh viton ni?✧

<sup>11</sup> ?Ma veneh ma mutakil ti mu xa inou natasep usil beret ti? E muketeh kuhi ve ‘is’ na Farasi e Satusi xil.”

---

✧ **16:4:** Mat 12:39; Luk 11:29    ✧ **16:6:** Luk 12:1    ✧ **16:9:** Mat 14:13-21; Mak 6:34-44; Luk 9:11-17; Sion 6:1-13    ✧ **16:10:** Mat 15:32-38; Mak 8:1-9

12 Ma xil lanem kila sung xa xi taviteni ti tangan liketeh kuhi ve is te beret, e ve pispisien xil na Farasi e Satusi xil.\*

*Pita bit rați xa Iesu be Mesaea xa Hi tehit xati tangan isa ni imei*

*Mak 8:27-30; Luk 9:18-21*

13 Iesu e moletin nan xil lakakao laba, laduxoh rute tei sangas ni taon te hal Seseria-Filipae. E inggak, xi misis moletin nan xil bit, “?Moletin xil labiteni xa inou, Nat Moletin, ✧ nabe visi vari?”

14 E labit rilomun ni mini labit, “Rut moletin xil labit obe Sion Baptis. ✧ E rute ngan xil labit obe provet Ilaetsa. E rute sav xil mun labit xouk obe provet Seremaea tetiamu mu provet sav tei.”

15 E xi misis xil bit, “?E xamim, ma midep? ? Mubit inou nabe visi vari?”

16 E Saemon Pita mitamea bit, “Xouk obe Mesaea. Reitin, obe Nat Hi xa meul da.” ✧

17 E Iesu biteni mini bit, “Saemon, nat Siona, tuxolxatien na Hi di minuk ngamu. Vengan xa tave moletin ti xa vahit rat ngan ak minuk. Tata navan xa de ut nesao, xi vari bit rati minuk. ✧

18 E nabiteni minuk xa obe ‘Pita’ xa koute teni be ‘vatihat.’ ✧ E vatihat ak, nikili ni Sias navan. E xeihen xil vus na Temat e maten lasakras mei lapurun ni.

19 Nisak ni xouk mei uhe vat na moletin navan xil. Ve rin ak, naha xa uhit xole e ut etan ak, Hi

---

\* **16:12:** Pispisien xil na Farasi e Satusi xil nggoni ‘is’ e rin xa di laso rin ni pispisien xil holu xa tamal pupu ti del xat sepinien xil na Hi, e pispisien nae xil di duxoh mol-Isrel xil vus. ✧ **16:13:** Dan 7:13 ✧ **16:14:** Mak 6:14-15; Luk 9:7-8 ✧ **16:16:** Mat 16:16; Mak 14:61 ✧ **16:17:** Mat 17:5; Kal 1:15-16 ✧ **16:18:** Sion 1:42; Efes 2:20

mun ihit xole. E naha xa umaen ni e ut etan, Hi mun imaen ni.”✧

<sup>20</sup> Di, Iesu misep xol moletin nan xil tangan linavit rati ti mi moletin tova xa xi be Mesaea xa Hi tehit xati tangan imei.✧

*Iesu misep usil longpangasien, maten e mea rilomunen nan*

*Mak 8:31-9:1; Luk 9:22-27*

<sup>21</sup> E melele nen ak ba, Iesu misep kila mi moletin nan xil xa ihe Serusalem. E melele xa ituxoh Serusalem, xi ihur longpangasien ihe holu ixo he elda xil, vat xil na pris xil, e titsa xil te rae na Mosis. Xi bit mesen ni xa xil lihas vini. Ti, e melengien tol nen, imea rilomun ra maten.

<sup>22</sup> Melele xa Iesu biteni mak, Pita dela be rin, e misepin nggeih xati bit, “!Suv, onasepin ti namak! !Holesok xil ak misakras vastal minuk!”

<sup>23</sup> E Iesu biles, pus Pita e biteni mini bit, “!Temat, he reling nou! Nenemien ak be neta tei xa di misak pisi tangan ipol ni nou nisavut e suse navan. Vengan xouk di onggusil xat nenemien na moletin xil te ut etan, e otahusil nenemien na Hi ti.”

<sup>24</sup> Di, Iesu biteni mi moletin nan xil bit, “Xosxa moletin tova ien bei tangan ihusil nou, ma istokovein holesok xil te meulien nan, ti, ipo eivave te maten nan e ihusil xat nou.✧

<sup>25</sup> Vengan xa ngan xil xa di lasak pisi tangan likenin meulien nae ve xil tang, ma meulien nae ikesae reling xil. E ngan xil xa lamaen meulien nae ikesae vengan di langgusil xat nou, ma, e ut nesao, xil likamet meulien sal.✧

✧ **16:19:** Mat 18:18; Sion 20:23      ✧ **16:20:** Mat 17:9; Mak 9:9

✧ **16:24:** Mat 10:38; Luk 14:27      ✧ **16:25:** Mat 10:39; Luk 17:33;

Sion 12:25



<sup>26</sup> ?Naha tova bos mi moletin xa di mileh hole-sok xil vus te ut etan ak, e di misa rat meulien nan tangan valehi?✧ !Neta tovuol vari! Vengan xi misakras vasa neta tova tangan vahur rilomun ni meulien nan.

<sup>27</sup> “Nave nousav ti, inou, Nat Moletin, nitilomun itel xeihen xa tellep xa Tata navan isa ni minou e itel masxaxa nan xil. E melele nen ak, nisa kekes ni huit polien mi moletin xil vus ihusil naha xa xil di latepol ni.✧

<sup>28</sup> Reitin nabiteni mi xamim, rut xamim xa di lasoh del nou xosali, linamat ti mu e lipus melele xa inou, Nat Moletin, nimei tangan mei nihe suv toto na moletin xil vus.”✧

## 17

### *Minehinen te xeihen na Hi bemei e Iesu Mak 9:2-13; Luk 9:28-36*

<sup>1</sup> Melele xa melengien tei e he sav (6) mei mitavi, Iesu nggur Pita, Temis del Sion (xa be tua na Temis) e del xatel latobe nesao e vathu tei tangan xatel ak kestang latiti vituei en.

<sup>2</sup> E inggak, latopus tenbe Iesu biles. Valnaon mihinehin nggoni eai, e eising nan xil mei mieh pupu e mihinehin nggoni laet.✧

<sup>3</sup> Vatei takes, latpus Mosis e Ilaetsa lustal e ba lusepin del Iesu.

<sup>4</sup> Melele xa Pita pus xalu, biteni mi Iesu bit, “! Suv, bos xa xametel matodi inggak! Xosxa iem bei, ma matikili ni horao ihe tol: tei ihe mam, tei ihe ma Mosis, e tei ihe ma Ilaetsa.”

---

✧ **16:26:** Mat 4:8-9    ✧ **16:27:** Mat 25:31; Sam 28:4; 62:12; Pro 24:12; Rom 2:6; Rev 22:12    ✧ **16:28:** Mat 10:23    ✧ **17:2:** 2Pit 1:16-18

<sup>5</sup> Melele xa di tamu misepin, momah tei xa mihinehin pupu mei mikutaxol xatel. E latlong rae tei mistal nggo en xa bit, “Ngan ak be Natuxoli reitin xa eheien navan di en.✠ Inou nabesi nou pupu ven. !Muteong xati!”✠

<sup>6</sup> Melele xa Pita xatel latlong rae ak, uli xatel mikan pupu, e latomot latobe tan.

<sup>7</sup> Melele xa ladi tamu e tan, Iesu bemei e duxol xatel bit, “Totamea. Ulimitel nakan ti mun.”

<sup>8</sup> E melele xa latpet rat metexatel, lattapus ti mun moletin xalu ak, Iesu kestang de visal xatel.

<sup>9</sup> Melele xa di latsuvul ra vathu ak, Iesu misep xol xatel bit, “Mutnahitani ti mi moletin tova usil naha xa mutepusi ituxoh melele xa inou, Nat Moletin, nimea rilomun ra maten.”

<sup>10</sup> E moletin nan xatel latsisi latbit, “?Veneh ma titsa xil te rae na Mosis labitani xa Ilaetsa imei itiamu ni Mesaea xa Hi tehiti xati?”✠

<sup>11</sup> E Iesu bit rilomun ni bit, “Reitin xa Ilaetsa imei tetangan ipol ni holesok xil vus mei imal rilomun.

<sup>12</sup> E nabitani mi xamitel xa Ilaetsa temei ngamu✠ e moletin xil latnapus kil ti. Xil latepol tesa mini texoni ngan xa iexil tehei. E ixo suse nen tak, nave nousav ti, inou mun, Nat Moletin, nihur longpangasien ixo hexil.”

<sup>13</sup> Melele xa Iesu bitani mak, ma latlong kila sung xa xi di bit usil Sion Baptis.

*Iesu pol ni horamue tei xa ninin tesa tei da en mei bos rilomun*

*Mak 9:14-29; Luk 9:37-43*

✠ 17:5: Sam 2:7; Mat 3:17; 12:18; Mak 1:11; Luk 3:22; 2Pit 1:17

✠ 17:5: Dut 18:15; Pol 3:22 ✠ 17:10: Mal 4:5-6 ✠ 17:12: Mat 11:14; Luk 1:17

14 Melele xa Iesu xatel latsuvul ra vathu ak, latbisu mi vanut moletin xil. E moletin tei bemei visal Iesu, mitingairil pe meten,

15 e biteni mini bit, “O suv, iem isae li e natuxoli, vengan xa xi di memmat e milong pangas xi pupu ven. Melengien holu, xi di mot be upang mu oei.

16 Natehuri temeï visal moletin nam xil, e xil lasakras lapol ni mei vahos rilomun.”

17 Melele xa Iesu milonge mak, biteni bit, “! Iva! !Xamim moletin xil te xosali ak, mukavui e neketen namim tovuol vari!☆ ?Niti visal xamim ituxoh vilieh? Veok buol ni xamim xa neketen namim tovuol. Muhur horamue ak vamei visal nou inggak.”

18 E melele xa Iesu pus horamue ak, minggol rat ninin tesa be relingi, e vatei takes, horamue ak mei bos rilomun.

19 Dutou ni melele nen ak, melele xa Iesu ba da sen tang, moletin nan xil lamei visali e lasisi labit, “?Veneh ma xamem matesakras mavol rerat ninin tesa ak?”

20 E Iesu bit rilomun ni mi xil bit, “Vengan xa neketen namim hokorong pupu. Reitin nabiteni mi xamim, xosxa munggur neketen xa hokorong nggoni utut mastad, mukila muviteni mi vathu ak muvit, ‘Umea ra rute ak, e uha xor,’ ma iha xor. Xosxa neketen namim di, ma neta tovuol vaxeih tangan mupol ni.”

21 \*

22 Di, lamea reling rute ak e lakakao labe provins te hal Kaleli. E melele xa di lakakao laba,

---

☆ **17:17:** Dut 32:5,20 \* **17:21:** Rut vanuvei xil na Matiu lateling sepinien ak teti en xa bit, “*Moletin mikila vahol rerat hisit ninin tesa ak melele xa misis e di bal ni anien.*”

Iesu biteni mi xil bit, “Nave nousav ti, inou, Nat Moletin, limaen ni nou ihe he moletin xil te ut etan.

<sup>23</sup> Xil lihas vin nou. E, e melengien tol nen, nimea rilomun ra maten.”✧ Melele xa moletin nan xil lalonge mak, lanexo pupu.

*Iesu nggal takis te Nim Eo nggo merekel tei*

<sup>24</sup> Vatei, Iesu del moletin nan xil di lakakao e lamei e taon te hal Kapaniam. Inggak, moletin xil xa laleh mani te takis te Nim Eo† lamei visal Pita e lasisi labit, “?Midep? ?Titsa nam di nggal takis te Nim Eo, mu taxali ti?”✧

<sup>25</sup> E Pita bit rilomun ni mi xil bit, “Io, xi di nggale.”

Di, Pita dilomun be tim. Xi tasepin ti mu, e Iesu misis bit, “?Saemon Pita, onemi midep? ?Suv toto xil te ut etan di laleh takis e duti‡ ra moletin si xil? ?Lalehi ra horamue nae xati, mu ra moletin sav xil tang?”

<sup>26</sup> E Pita bit rilomun ni mini bit, “Lalehi ra moletin sav xil.”

Iesu biteni mini bit, “Imak, ma horamue nae xati xil linaxal ti takis.

<sup>27</sup> E tave ti neta xa Hi xa be suv toto te holesok xil vus be Tata naralu, ralixal takis te Nim Eo nan vengam xa tavos ti xa ralosak ni moletin xil ak tine vasoh xat ralu. Ma ha, uhe Oei Kaleli e uso huk. Meseo xa usare itiamu, usah vulongen, e ukamet mani tei xa ipin tengam uxal rat takis naralu ni. Ti, uhuri e ha usa ni mi moletin xil ak.”

---

✧ **17:23:** Mat 16:21 † **17:24:** Takis te Nim Eo tehe drakma lu na tiramue xil kekes xa texoni watu taosen lu (2000 watu). ✧ **17:24:** Eks 30:13; 38:26 ‡ **17:25:** Duti nggoni vat, takis xa lalingi da xat praes te holesok xil xa langguri ra ut sav xil.

# 18

*Iesu pispisi usil visi iaxa be eilep mak mu pe met*  
*Hi*

*Mak 9:33-37; Luk 9:46-48*

<sup>1</sup> E melele nen ak, moletin xil na Iesu lamei visali e lasisi labit, “?Visi iaxa be eilep mak mu e ngan xil xa Hi be suv toto nae?”<sup>✧</sup>

<sup>2</sup> Iesu mikes tutut horamue tei e pol ni mei misoh pe metexil.<sup>✧</sup>

<sup>3</sup> Di, biteni mi xil bit, “Reitin li nabiteni mi xamim, xosxa munaviles nenemien namim ti tenggan mei muxoni horamue ak, ma musakras muve rute xa Hi be suv toto en. <sup>4</sup> Misak ni, ngan xil xa lapol ni nenemien nae be tan<sup>✧</sup> nggoni horamue ak, xil lihe eilep mak mu e rute xa Hi be suv toto en.

<sup>5</sup> E moletin tei xa nggur pilei horamue tei nggoni ngan ak e hisok, ma nggoni ngan xa di nggur pilei nou.<sup>✧</sup>

<sup>6</sup> “E xosxa moletin tova isak ni moletin tei xa nggusil xat nou nggoni horamue ak tenggan imot e tesaen, ma Hi isa pangasien xa isa mak mu mini. Bos mak mu xosxa lavar xat hat tova xa mahulong pupu vate huraen, e laso ni ha vamerir e huinep te tas.

<sup>7</sup> Reitin xa holesok xil xa di lasak pis moletin tei tenggan vamot e tesaen di bemei. !E isa mak mu mi ngan xil xa labe suse te tesaen xil ak!

<sup>8</sup> “!Nggusil nenemien ak, xosxa hem mu lem misak ni xouk di omot e tesaen, ma uta xotehi e uso ni iha! Ihos mak mu xa rut tenbom tang isa e

✧ **18:1:** Luk 22:24    ✧ **18:2:** Mat 19:14; Mak 10:15; Luk 18:17

✧ **18:4:** Mat 20:26-27; Mak 10:43-44; Luk 22:26    ✧ **18:5:** Mat 10:40; Luk 10:16; Sion 13:20

uhur meulien sal, ili ngan xa hem xalu e lem xalu lihos tang laliti e liso xouk uhe Upang xa misakras vamat.✧

<sup>9</sup> Xosxa metom tei misak ni xouk di omot e tesaen, ukis rati e uso ni iha. Ihos mak mu xa metom tei ikesae e uhur meulien sal, ili ngan xa metom xalu vus laliti tang e liso xouk uhe Upang xa misakras vamat.”

*Iesu dei vole usil sipsip xa mikesae*

*Luk 15:3-7*

<sup>10</sup> Melele xa horamue ak di tamu misomal pe metexil, Iesu biteni mi moletin nan xil bit, “Mux-uxou kuhu tangan munanem male ni moletin xil ti xa di langgusil xat nou nggoni horamue ak. Reitin li nabiteni mi xamim xa masxaxa nae✧ xil ladit pe met Tata navan e ut nesao. E xil lihit mesen ni xosxa moletin tei di pangei xil.

<sup>11</sup> \*

<sup>12</sup> “?Xamim munemi midep? ?Xosxa moletin tei, sipsip san xil duxoh handred tei (100) e tei e xil mikesae, ma xi ipol ni itep? ?Munemi mubit xi ihe reling sipsip sav san xil xa labe hanutap hat e hat e le tei mun (99) liti e seri hu tei tangan ha ilang ves ngan xa mikesae? !Io!

<sup>13</sup> E reitin li nabiteni mi xamim xa, xosxa ikameti, ma ihesi xi pupu ven, ili sipsip sav san xil xa latakasae ti.

<sup>14</sup> Nggusil rin ak, Tamemim xa de ut nesao ien ti tavei tangan moletin ti xa di nggusil xat nou nggoni horamue ak vakesae.”

---

✧ **18:8:** Mat 5:30 ✧ **18:10:** Hib 1:14 \* **18:11:** Rut vanuvei matu xil te Matiu lateling sepinien ak teti en xa bit, “Inou, Nat Moletin, namei tangan nalang ves hisit moletin xil xa lakesae tangan niteh meulien e xil.”

*Iesu pispisi usil sexien xa moletin ti imal ni tumali xa pol misa mini*

<sup>15</sup> Iesu dit ni ngan taxa di misepin mi moletin nan xil usil ngan xil xa di lapol misa mi mosav xil bit, “Xosxa tumali tei pol misa minuk, xouk tasom uhe visali e upisen naha xa xi tepol ni xa tenamal ti minuk. Xosxa iteong kuhi ni xouk e mulimal ni xamil, ma uhesi xouk vengan muliti ihos rilomun.✧

<sup>16</sup> E xosxa xi nateong ni sepinien nam ti, utilomun uhe visali itel moletin sav tei mu lu mun. Xalu mun lalipusi e lalisepin mini e rin nam xa be reitin xa otesak pisi tangan umal ni xamil.✧

<sup>17</sup> E xosxa tumali ien ti tavei tangan vateong ni xamitel, ma ha mutihit mesen ni pe met vanut moletin xil te Sias na Hi. E xosxa moletin ak ien ti tavei tangan vateong ni ngan xil te Sias mun, ma mupusi ixoni ngan taxa xi takil ti Hi mu be moletin tesa tei nggoni ngan xil xa di laleh takis.

<sup>18</sup> “Reitin li nabiteni mi xamim, naha xa xamim di musep xole e ut etan, ixoni ngan xa Hi mun xa de ut nesao di misep xole. E naha xa di mumaen ni e ut etan, ma ixoni ngan xa Hi mun xa de ut nesao di maen ni.✧

<sup>19</sup> “Reitin li nabiteni mi xamim xa xosxa xamil lu xa mudi e ut etan ak mulimei e nenemien tei usil neta ngan e mulisis ven, ma Tata navan xa de ut nesao isa huit sisen namil.✧

<sup>20</sup> Vengan xa melele xa moletin lu mu tol latomei vituei e hisok, inou mun nite visal xatel e rute

---

✧ **18:15:** Lev 19:17; Luk 17:3 ✧ **18:16:** Dut 19:15; Sion 8:17; 2Kor 13:1; 1Tim 5:19 ✧ **18:18:** Mat 16:19; Sion 20:23 ✧ **18:19:** Mat 7:7; 21:22; Mak 11:24; Sion 15:7; 16:23; Tem 1:5; 1Sion 3:22; 5:14-15

ak.”☆

*Iesu dei vole usil longpangasien xa istal mi ngan xil xa iexil ti tavei tangan laketeh vahos rilomun mi mosav xil*

<sup>21</sup> Di, Pita bemei visal Iesu e misisi bit, “?Suv, xosxa tua navan pol misa minou, niketeh ihos rilomun mini ihe vahis?☆ ?Ituxoh lu e he sav (7)?”

<sup>22</sup> Iesu bit rilomun ni mini bit, “E-e, tave lu e he sav (7) ti. Uketeh ihos rilomun mini ihe valu e he sav (7), ti, upol ni ihe valu e he sav (7) mun, ti, upol ni ihe valu e he sav mun (7) ha vuma ... osakras ovuli mun.†

<sup>23</sup> “Nihit kil sexien ak ni vole tei. Melele xa Hi mei ihe suv toto e meulien na moletin xil, ngan ak ixoni suv toto tei xa ien bei tangan imal ni kaon xa moletin te polien nan xil latepol ni tetela.

<sup>24</sup> E melele xa xi di momal ni kaon xil ak, ladel moletin tei xa kaon nan mili gol mani‡ xa be milian he xalu (10,000,000).

<sup>25</sup> E vengan xa suse tovuol tangan moletin ak vaxal rat kaon nan, suv toto nan misemae ni tangan lipos ni xi, atou nan, e horamue nalu xil vus mei lihe slev xil, e lipos ni holesok xil vus nan mun. Ixo suse ak, suv toto bit mani nen mei ixal rat kaon xil vus nan.

<sup>26</sup> “Melele xa moletin ak milonge mak, mitingeiril pe met suv toto e dakesi bit, ‘!Aue li! !Usa mesal tova mun xa hokorong minou li, e nixal rat holesok xil vus xa di kaon navan!’

---

☆ **18:20:** Mat 28:20; Sion 14:23    ☆ **18:21:** Luk 17:3-4    † **18:22:** Sepinien xati teni bit, “*upol ni ihe valu e he sav, e upol ni imak ituxoh hanutap tol e he xalu mun (7 x 70).*”    ‡ **18:24:** Gol mani tei takes nggoni 1000 vatu. Ngan ak be mani tei xa eilep pupu xa moletin tei misakras vaxal rati.



27 Melele xa suv toto ak milonge mak, ien misae en. Ma misil len kaon nan e maen ni ba ven mase.✧

28 “E melele xa moletin ak mistal, mikamet moletin te polien sav tei xa kaon nan dela be gol mani vahis tang. E melele xa pusi, miki xat huraen e biteni mini bit, ‘!Uxal rat mani xil vus xa otehuri ranou!’

29 “E moletin te polien ak mitingeiril pe meten e dakesi bit, ‘!Aue li! !Usa mesal tova mun xa hokorong minou li, e nixal rat holesok xil vus xa di kaon navan!’

30 “E moletin ak ien ti tavei vasa mesal mini. E ba sung, miso moletin ak be nim te xeih tangan ita en ituxoh melele xa ixal rat kaon nan xil vus.

31 E melele xa moletin te polien sav xil lapus naha xa testal, xil lalonge misa pupu e ba labit mesen ni mi suv toto nae.

32 “Di, suv toto mikes moletin ak bemei visali e misepin nggeih mini bit, ‘!Xouk xa obe moletin tei navan di opol misa xa misa! Melele xa otetakes nou tangan ieok isae e xouk, ma natesil len kaon nam e natemaen xouk ba vem temase. 33 ?Misak ni, veneh ma xouk iem tasae ti moletin te polien sav navan vaxoni ngan xa inou natepol ni minuk?’

34 Suv toto ien mikat, ma misa rat moletin nan ak ba tangan ihur pangasien ixo he moletin xil e nim te xeih ituxoh melele xa ixal rat kaon nan xil vus.✧

35 “E Tata navan xa de ut nesao mun ipol ni imak tang mi xamim vus xosxa munaketeh ti navos rilomun mi tua namim xil ixo tinemim tevi.”✧

---

✧ **18:27:** Luk 7:42 ✧ **18:34:** Mat 5:25-26; Luk 12:58-59 ✧ **18:35:** Mat 6:15; Mak 11:25; Efes 4:32; Kol 3:13

# 19

*Iesu pispisi xa moletin xa miteli nastokovein atou nan ti*

*Mak 10:1-12*

<sup>1</sup> Melele xa Iesu misepin usil rin xil ak bus, xi be reling provins te hal Kaleli del moletin nan xil. Ma xil labe rute tei xa mili Oeisal Sodan e provins te hal Sudea.

<sup>2</sup> Vanut moletin xil holu langgusili labe rute ak, e xi pol ni xil vus mei labos rilomun.

<sup>3</sup> E melele nen ak, rut Farasi xil lamei visali tangan ti lisak pisi. ✧ Misak ni, lasisi labit, “Uhit pisi mi xamem. ?Rae nar xil di maen ni tangan moletin tei ikila istokovein atou nan ve nenemien xil vus tang?”

<sup>4</sup> E Iesu bit rilomun ni mi xil bit, “?Midep? ? Xamim mutavuli ti Vanuvei Eo na Hi? Vengan xi di biteni xa, tetiamu, e melele xa Hi tepol ni holesok xil e ut etan, *‘Hipol ni moletin, tei pol ni be malohos, e tei mun, pol ni be atou.’* (Sen 1:27)

<sup>5</sup> E biteni mun bit, *‘Ve rin ak, tiramue imea reling tamen xal ninen, e ihisti itel atou nan, e xalu mei lalihe tei takes.’* (Sen 2:24) ✧

<sup>6</sup> Misak ni xalu lutave lu ti mu, e mei lube tei takes. Ma naha xa Hi tehistin ni, moletin tovuol mikila vaseti xalu mun.”

<sup>7</sup> E Farasi xil lasisi labit, “Vahit vamak, veneh ma Mosis ma tesemae ni xir tehiti, *‘Moletin xa bit vastokovein atou nan, isa Setifiket te Silaen mini. Ti, mikila istokovein ni sung.’* ” (Dut 24:1)

<sup>8</sup> E Iesu bit rilomun ni bit, “Mosis temaen xamim tangan mustokovein atou namim xil vengan xa

vatumim nggeih pupu. E sexien ak tovuol e melele xa Hi tepol kokot ni holesok xil.

<sup>9</sup> E nabiteni mi xamim xa xosxa moletin tei mistokovein atou nan e melele xa atou ak tapol ni ti vasa vatel tiramue sav, xi di pol ni neta xa misa pe met Hi. E xosxa, moletin ak mea e miteli rilomun del atou sav, pe met Hi, nggoni ngan xa xi di pol misa del atou ak.”✧

<sup>10</sup> Melele xa misepin mi xil bus, moletin nan xil mei labiteni mini labit, “Vahit vamak mi tiramue del atou nan, ma bos mak mu tengan tiramue tei ita tasen tang e nateli ti.”

<sup>11</sup> E Iesu bit rilomun ni mi xil bit, “Tave moletin xil vus ti iaxa lakila lavusil pispisien ak. E rut moletin ngan xil, Hi di misa xeihen mi xil tengan lihusili.”✧

<sup>12</sup> Vengan rut moletin xil lasakras lateli vengan ut eo nae misa melele xa latepes xil. E ngan tesav xil lasakras lateli vengan xa moletin sav tepangei ut eo nae. E rute moletin sav xil mun lapol ni nenemien nae xa linateli ti tengan lipol mi Hi xa be suv toto nae. Ngan xil xa lakila lavusil sexien ak, ma bos tengan lihusili.”

*Iesu misa tuxolxatien mi horamue xil  
Mak 10:13-16; Luk 18:15-17*

<sup>13</sup> Di, moletin xil laleh tutut horamue nae xil lamei visal Iesu tengan xi valing hen e xil e vatuxol xat xil. E melele xa moletin nan xil lapus xil, labul xat xil.

<sup>14</sup> E Iesu misepin mi xil bit, “Mumaen tutut horamue xil ak lamei visal nou, e munasikoe xol

---

✧ **19:9:** Mat 5:32; 1Kor 7:10-11    ✧ **19:11:** 1Kor 7:1-2,7,9,17

xil ti. Vengan xa Hi be suv toto na hisit moletin xil mun xa langgoni xil.”✠

<sup>15</sup> Ma melele xa lamei visali, Iesu miling hen e xil e misa tuxolxatien mi xil. Di, Iesu del moletin nan xil labe reling rute ak.

*Tiram maxoe tei pusi xa nggeih pupu tangan vastokovein mani nan tangan vahusil xat Iesu*

*Mak 10:17-31; Luk 18:18-30*

<sup>16</sup> Melele xa Iesu nggusil suse ba, moletin tei bemei visali e misisi bit, “?Titsa, nipol ni naha xa bos tangan nikila nihur meulien sal?”✠

<sup>17</sup> Iesu bit rilomun ni mini bit, “?Veneh ma di osis nou usil naha xa bos? Hi kestang bos. E xosxa iem bei ovur meulien sal, ma uteong xat rae nan xil vus.”✠

<sup>18</sup> Di, moletin ak misisi bit, “?E rae xave vari e xil tangan nihusili?”

E Iesu bit rilomun ni mini bit,

“ *‘Munahas vin ti moletin.*

*Munakan ni atou mu tiramue na mosav ti.*

*Munakan ni ti neta na mosav xil.*

*Munaluvos ni his mosav xil ti.*

<sup>19</sup> *Mumerere ni tamemim e ninemim xil.’*

*(Eks*

*20:12-16)✠*

E,

*‘Iemim ihei moletin sav xil ixoni ngan taxa xamim vus di iemim bei xamim mun tang.’ ”*

*(Lev*

*19:18)✠*

<sup>20</sup> E tiram maxoe ak bit rilomun ni mi Iesu bit, “Inou di nanggusil xat rae xil vus ak. ?Naha mun iaxa natapol ni ti?”

---

✠ **19:14:** Mat 18:2-3 ✠ **19:16:** Luk 10:25 ✠ **19:17:** Lev 18:5; Luk 10:28 ✠ **19:19:** Dut 5:16-20; Rom 13:9 ✠ **19:19:** Mat 22:39; Mak 5:43; Luk 10:27; Rom 13:9

21 Ma Iesu biteni mini bit, “Xosxa xouk iem bei tangan mei omal tevi, ma ha upos ni holesok xil vus nam e usa mani nen mi ngan xil xa holesok nae tovuol.✠ E xosxa upol ni imak, ma holesok nam xil e ut nesao ihe holu.✠ Ti, utilomun e uhusil xat nou.”

22 E melele xa tiram maxoe ak milong sepinien nan, xi milonge misa e be relingi vengan xa holesok nan xil labe holu e ien ti tave tangan vastokovein ni.✠

23 Di, Iesu biteni mi moletin nan xil bit, “Reitin li nabiteni mi xamim, nggeih tova tang tangan moletin xa holesok nan holu vamaen Hi mei vahe suv toto e meulien nan.

24 ?Munemi xa kamel tei xa be mahulong mikila vakital vaxo met nitil tei xa hokorong xa hokorong pupu? E-e, misakras. E moletin tei xa holesok nan xil holu, nggeih mak mu mili ngan ak tangan imaen Hi mei ihe suv toto e meulien nan.”

25 Melele xa moletin xil na Iesu lalonge mak, latemanin pupu e lasisi labit, “?Imak, ma Hi mikila vateh meulien e visi vari?”

26 Iesu miketeh kapis e xil e bit, “!Iaxai vari! Moletin misakras vapol ni, e Hi keatang mikila ipol ni holesok xil vus.”✠

27 Di, Pita biteni mini bit, “?Opusi? Xamem mastokovein holesok xil vus namem tangan mavusiluk. ?Xos imak, ma Hi isa naha mi xamem?”

28 E Iesu biteni mi xil bit, “Reitin li nabiteni mi xamim, e melele xa Hi ipol pilei ni holesok xil vus

---

✠ 19:21: Luk 12:33; Pol 2:45; 4:34-37 ✠ 19:21: Mat 6:20

✠ 19:22: Mat 6:24; Luk 16:13 ✠ 19:26: Sen 18:14; Siob 42:2; Sak 8:6

te ut etan mei ihe neta hu, inou, Nat Moletin,<sup>☆</sup> nitotan e von lelatatien navan itel minehinen te xeihen navan. E melele nen ak, xamim kekes mun ti mutotan itel nou e von xeihen namim xa ihe lu e le tei (12). Ti, mulepis mol-Isrel xil vus xa langgo vatimol lu e le tei (12) xa mahulong nae.

<sup>29</sup> E moletin xil vus xa di lastokovein tim sae, mu tua nae xil, mu hinexil, mu tamexil, mu ninexil, mu horamue nae xil, mu naho sae xil venou, ma Hi isa rilomun ni mi xil huite teni xa ihe handred tei (100) ili ngan xa latestokovein ni. E xil lihur meulien sal mun.<sup>☆</sup>

<sup>30</sup> E moletin holu xa labe eilep xil xosali ak, xil mei lihe neta sav tang. E holu xa labe movotei xil xosali, xil mei lihe eilep xil sung.”<sup>☆</sup>

## 20

*Iesu dei vole usil midep iaxa moletin vus lapin tang pe met Hi*

<sup>1</sup> Melele xa Iesu di misepin del moletin nan xil, xi dei vole ak mi xil bit, “Suse xa Hi mei ihe suv toto e meulien na moletin xil ixoni hortan tei xa ba makoe roroh tamu tangan valeh viton moletin te polien xil tangan mei lapol e urvatiei san.

<sup>2</sup> Melele xa ba misepin mi xil, xil lamaen ni tangan lipol mini ve mani tei xa imal te melengien tei. Di, misil xil laba tangan lava lapol e urvatiei san.

<sup>3</sup> “Melele xa meteneai bemei nesao vuteili, hortan ak dilomun ba, e pus moletin sav xil xa dit laborang votei tang e von posen, e latapol ni ti neta.

---

<sup>☆</sup> **19:28:** Dan 7:9-10; Mat 25:31; 20:21; Mak 10:37; Rev 3:21; Luk 22:30    <sup>☆</sup> **19:29:** Mat 19:16; Luk 10:25    <sup>☆</sup> **19:30:** Mat 20:16; Luk 13:30

<sup>4</sup> Ma xi biteni mi xil bit, 'Ei, xamim mun ha mupol e urvatiei savan, e nixal xamim ni naha xa imal.'

<sup>5</sup> Ma xil mun laba lapol.

'E piniae, xi dilomun ba, e pol ni nggoni ngan taxa tepol ni ngamu. Di, ba pol ni mun e melele xa meteneai da be tan vuteili.

<sup>6</sup> E melele xa meteneai ba sangas tangan vanu, xi dilomun ba e pus rut moletin xil mun dit lasoh votei tang. Ma xi misis xil bit, '?Veneh ma di musoh votei mak, e mutapol ni ti neta e makoe mei duxoh mahis xiak?'

<sup>7</sup> "Ma xil labit rilomun ni mini labit, 'Vengan moletin ti tamei tangan valeh xamem mava mapol mini.'

"Ma hortan ak biteni mi xil bit, 'Xamim mun muha mupol e urvatiei savan.'

<sup>8</sup> "Melele xa meteneai ba minu, hortan te urvatiei ak ba biteni mi vat na moletin te polien xil bit, 'Ukes viton moletin xil te polien limei, e usa huit polien nae mi xil.✧ Itiamu, usa ni mi ngan xil xa lamei dutou iha vuma ... ituxoh ngan xil xa latemei tetiamu.'

<sup>9</sup> "Ma, ngan xil xa lamei e melele xa meteneai ba sangas tangan vanu, vat te polien misa huit polien nae momal ni ngan te melengien tevi tei.

<sup>10</sup> Misak ni, melele xa ngan xil xa latemei tetiamu lapusi mak, xil di lanemi labit xil lihuri ihe eilep mak mu. E melele xa lamei, xil mun langgur huit polien nae momal ni ngan te melengien tevi tei tang.

<sup>11</sup> E melele xa langguri, xil laseputut ba xat hortan ak <sup>12</sup> labit, 'Ngan xil xa lamei dutou tang,

---

✧ 20:8: Lev 19:13; Dut 24:15

e melele xa meteneai ba sangas tangan vanu, xil lapol haoa tei takes, e onggal xil nggoni xamem tang xa makon ni polien, mapo vetin, e eai ngga pangas tenbemem.'

<sup>13</sup> “E hortan ak bit rilomun ni mi xil bit, ‘Tua navan xil, inou natapol ti vasa mi xamim. Xamim mumaen ni tangan mupol minou ve huit polien xa momal te melengien tevi tei.

<sup>14</sup> Ma muleh mani namim muha. Inou ieok bei tangan nixal ngan xil xa latemei tetutou ipin ni ngan taxa xamim mungguri.

<sup>15</sup> Ngan ak be mani navan, e nikila nipol ni ixoni ngan xa ieok bei ni. ?Mu midep? ?Xamim di munem misa ni xil vengan di nasa tutouen mi xil?’

<sup>16</sup> “Ma, usil sexien xil ak vari, moletin holu xa labe movotei xil tang xosali ak, xil mei lihe eilep xil. E holu e ngan xil xa labe eilep xil xosali ak, xil mei lihe neta sav tang.”✧

*Yesu misep usil maten e mea rilomunen nan vatei mun*

*Mak 10:32-34; Luk 18:31-34*

<sup>17</sup> Melele xa Iesu di mikakao ba tangan vahe Serusalem, xi mileh moletin nan xil xa labe lu e le tei (12) ba laka se xil vuteili e biteni mi xil bit,

<sup>18</sup> “?Mupusi? Taxeak di raba ve Serusalem xiak. E rute ak, xil limaen nou, Nat Moletin, ha nihe he vat xil na pris xil e titsa xil te rae na Mosis. Ivus ti, xil lihur nou nihe kot e limaen rat meulien navan tangan ha nimat.✧

<sup>19</sup> Ti, lisa rat nou ha nihe he moletin xil xa latave Siu ti, e xil lipol pepamen ni nou, limeas pangas

---

✧ **20:16:** Mat 19:30; Mak 10:31; Luk 13:30 ✧ **20:18:** Mat 16:21; 17:22-23; Luk 9:22



nou ni ao te xeih xil xa sanute di en, e liti xat nou e eivave. E melele xa melengien tol mei itavi, inou nimea rilomun ra maten.”✧

*Iesu pispisi usil sexien te tutouen mi moletin nan xil*

*Mak 10:35-45*

<sup>20</sup> Di, nine Temis xal Sion, nat Sepeti xalu, del xalu latomei tangan latopus Iesu. Xi mitingeiril pe meten tangan vasis neta tova mini.

<sup>21</sup> Iesu misisi bit, “?Atou li, iem bei neh?”

Ma xi bit rilomun ni mini bit, “!eok bei li tangan umaen horamue navan xalu ak ha lalitotan sangas visaluk e melele xa mei uhe suv toto. Tei ite rim metu, e tei ite rim meil.”✧

<sup>22</sup> Ma Iesu biles miketeh pus natneli xalu e misis xalu bit, “Xamil mutakil ti naha xa di musis nou ni. ?Midep? ?Xamil mukila tamak mulihur sakpurunien xil e pangasien xil ixoni ngan taxa inou ha nihuri?”✧

E lubit rilomun ni mini lubit, “!Io, makila!”

<sup>23</sup> Di, Iesu biteni mi xalu bit, “Reitin, xamil mulihur sakpurunien xil e pangasien xil ixoni ngan xa inou nihuri. E tave ti neta xa imak, nave nou ti iaxa nihosei visi tangan mei itotan e riuk metu mu e riuk meil. Vontoen xalu ak xa tellep xiak be na ngan xalu xa Tata navan bosei xalu ngamu tangan lalihuri.”

<sup>24</sup> E melele xa moletin sav xil na Iesu xa labe he xalu (10) lalongeong usili, iexil nggat xalu.

<sup>25</sup> Ma Iesu mikes viton xil vus lamei visali e biteni mi xil bit, “Mukila xa vat na moletin xil

✧ **20:19:** Mat 16:21; 17:23; Luk 9:22; 24:7,46; Pol 10:40; 1Kor 15:4

✧ **20:21:** Mat 19:28; Luk 22:30 ✧ **20:22:** Mat 26:39; Sion 18:11

xa latave Siu ti iexil bei mak mu tangan lisak ni moletin nae xil lipus kila xa xil mak mu labe tellep lali xil. E suv nae xil mun di lapol ni nggeih mi ngan xil xa ladi pe hexil.

<sup>26</sup> E xamim, sexien namim namak ti. Xosxa tei e xamim ihit mei ihe eilep mak mu ili xamim, xi mei ipol mi xamim ixoni moletin te polien tei namim.✧

<sup>27</sup> E xosxa tei e xamim ien bei tangan vatiamu ni xamim, xi mei ihe moletin te tutouen namim ixoni slev tei.

<sup>28</sup> Vengan inou mun xa nabe Nat Moletin, natamei ti tangan moletin xil ti latutou ni nou. ! E-e! Inou namei tangan nitutou ni mosav xil✧ e nisa meulien navan tangan nixal rat moletin xil holu mei limeluv ra xeihen te tesaen.”✧

*Iesu pol ni moletin lu xa metealu bar mei luketeh rilomun*

*Mak 10:46-52; Luk 18:35-43*

<sup>29</sup> Iesu del moletin nan xil ba laka pas taon te hal Seriko. E melele xa di laba, vanut moletin tei xa eilep di langgusili.

<sup>30</sup> E rute ak, moletin lu xa metealu bar✧ ludotan ludi seri suse e lulonge xa Iesu mikakao mei mitavi ba. Ma xalu lukei ba ni lubit, “!Suv! !Xouk xa ostal onngo vatimol na suv toto Deved! !Iem isae li e xamel!”

<sup>31</sup> E vanut moletin xil ak labul xat xalu tangan lalotit votei. E tave ti neta xa mak, xalu lukei nggeih pilei sung lubit, “!Suv! !Xouk xa ostal onngo vatimol na suv toto Deved! !Iem isae li e xamel!”

---

✧ **20:26:** Mat 23:11; Mak 9:35; Luk 9:48 ✧ **20:28:** Luk 22:27; Plp 2:7 ✧ **20:28:** 1Tim 2:6 ✧ **20:30:** Mat 9:27

<sup>32</sup> Melele xa Iesu milonge, misoh e mikes xalu tangan lalomei visali. Di, misis xalu bit, “?Iemil bei tangan napol ni naha mi xamil?”

<sup>33</sup> Ma xalu lubit rilomun ni mini lubit, “Suv li, iemel bei tangan upol ni metemel ihos rilomun.”

<sup>34</sup> E melele xa Iesu pus xalu, ien polu ni esaeen ve xalu. Ma misasa duxol metealu, e vatei takes, xalu vus luketeh rilomun e lunggusil Iesu luba.

## 21

*Iesu ba mistal e Serusalem e moletin xil lasa merereen mini*

*Mak 11:1-11; Luk 19:28-40; Sion 12:12-19*

<sup>1</sup> Melele xa Iesu del moletin nan xil lamei sangas ni Serusalem, xil mei lastal e metimal te hal Betfas xa de sangas ni Vathu te Urvatiei te Olip. E rute ak, Iesu misil moletin nan lu

<sup>2</sup> del sepinien ak bit, “Mulihe metimal xa da iaxor. E melele xa ha mulistal en, mulikamet dongki tei xa labar xati del tuten. Mullal rat xalu e mulitel xalu lalimei visal nou.

<sup>3</sup> E xosxa moletin tei isak pisi tangan vasikoe xol xamil, mulhiteni mini mulihit, ‘Suv iaxa ien bei xalu,’ ma vatei takes, xi imaen xalu mi xamil.”

<sup>4</sup> Ngan ak testal tangan vasak ni naha xa Hi tehit lelen ni texo provet nan mei ihe reitin xa tehit,

<sup>5</sup> *“Uhiteni mi moletin xil xa ladi e taon te hal Serusalem uhit,*

*‘!Mupus ti! Suv toto namim bemei tangan valaxat xamim.*

*Xi be hanmerou tang e di miloh nggo dongki tei tang di bemei.*

*Reitin, xi dotan de sulut dongki tei tang e di bemei.’ ”*

*(Sak 9:9)*

<sup>6</sup> Ma moletin na Iesu xalu ak luba e lupol ni nggoni ngan taxa xi tehiteni mi xalu.

<sup>7</sup> Xalu ludel dongki ak del tuten latomei. Di, luden kot nalu da xol tei xalu e Iesu dotan en.

<sup>8</sup> Vanut moletin xil xa mahulong mei lasak mesen suse tangan Iesu mei iloh ixo en. Laden kot nae xil e suse nan, e rute ngan xil ladei anguit liei xil xa ute di en e laling kuhi di suse.

<sup>9</sup> Holu e vanut moletin xil ak xa di ladiamu ni Iesu del ngan xil xa di langgusili ladutou di lakei nggeih labit,

“!Ripet rat xi xa mistal nggo vatimol na suv toto Deved!

*‘!Tuxolxatien iti mi ngan xa di bemei e his Iahova!’  
(Sam 118:26) ✧*

!Ripet rat his Hi xa de ut nesao!”

<sup>10</sup> E melele xa Iesu ba duxoh Serusalem, longongen usili ba mikapis e ut xil vus e taon, e mol-Serusalem xil latemanin e di latumul usili labit, “?Visi iaxa bemei xiak?”

<sup>11</sup> E vanut moletin xil labit rilomun ni labit, “Ngan ak be Iesu, provet tei te hal Nasaret xa de provins te hal Kaleli.”

*Iesu minggol rerat moletin holu xa latamerere ni  
Hi ti ra Nim Eo*

*Mak 11:15-19; Luk 19:45-48; Sion 2:13-22*

<sup>12</sup> Melele xa laduxoh Serusalem, Iesu be vangit vloh te Nim Eo na Hi. Melele xa pusi xa moletin xil di lapos ni holesok xil holu en, ien mikat e nggol rerat xil. Xi midivin rerat tep na ngan xil xa di laso papas mani e von totanen na ngan xil xa di lapos ni mae xil te sanien eo na Hi. <sup>13</sup> E melele xa

✧ 21:9: Mat 23:39; Luk 13:35

di pol ni mak, xi bul xat xil bit, “E Vanuvei Eo na Hi, latetisi latehit, *‘Lakes nim mavan ni nim te sisen.’* (Aes 56:7) E xamim mupol ni sung mei be *‘Nim ma vati kanen xil.’* ” (Ser 7:11)

<sup>14</sup> E melele xa Iesu da tamu e vangit vloh te Nim Eo, moletin xil xa metexil bar del ngan xil xa lasakras lakakao lamei visali, e xi pol ni xil mei labos rilomun.

<sup>15</sup> E melele nen mun tak, tutut horamue xil di lakekei e vangit vloh te Nim Eo labit, “!Ripet rat xi xa mistal nggo vatimol na suv toto Deved!”<sup>☆</sup>

E melele xa vat xil na pris xil del titsa xil te rae na Mosis lapus merekel xil e holesok sav xil xa tellep xa Iesu di pol ni e lalong naha xa horamue xil di lakekei ni, iexil mikat xa mikat.

<sup>16</sup> Ma lasis Iesu labit, “?Di olong naha xa tutut horamue xil di lakekei ni iaxai?”

E Iesu bit rilomun ni mi xil bit, “Io, nalonge. ? E midep? ?Xamim di mutavuli ti e Vanuvei Eo na Hi? Vengan misepin ni bit,

*‘Hi, xouk osak mesen suse tangan uteong ni memesien xil xa ihat visaluk, ixo tutut horamue xil e tuvava xil mun.’* ” (Sam 8:2)

<sup>17</sup> Di, Iesu mistokovein xil e be reling taon te hal Serusalem. Xi be taon te hal Betani del moletin nan xil, e ba lapat en.

*Iesu misa halesil tei ba xat vatit fik tei*

*Mak 11:12-14,20-24*

<sup>18</sup> E makoe roroh, melele xa Iesu di mikakao tangan vatilomun vahe Serusalem, mae nggati e suse.

---

<sup>☆</sup> 21:15: Mat 21:9

19 Ma miketeh e pus vatit fik tei xa dat seri suse. E melele xa be sangas visali, xi mikameti xa huite tovuol, e be ute xil tang.\* Misak ni, Iesu biteni mi vatit fik ak bit, “!Onataxao ti mun!” Vatei takes, ut fik xil ak mei lameles e vatite mingguxu.

20 Melele xa moletin nan xil lapusi, latemanin e lasisi labit, “?Vatit fik ak mei meles e mingguxu vari nga tang midep?”

21 E Iesu bit rilomun ni mi xil bit, “Reitin li nabiteni mi xamim, xosxa neketen namim di e mutanem male ni ti naha xa di musisi, xamim mun mukila mupol ni naha xa inou napol ni mi vatit fik ak. E tave ngan ak ti kestang, mukila mun musemae ni vathu ak muhit, ‘Umea uhe reling voninom e uha uso xouk uhe tas,’ ma istal ihe reitin.\*

22 Xosxa uke reitin xa neta tei mei istal, neta xil vus xa usis Hi ven imei istal ihe reitin.”\*

*Vat xil na Siu xil lasis Iesu tangan ihit kila xa di pol e his visi*

*Mak 11:27-33; Luk 20:1-8*

23 Melele xa laduxoh Serusalem, Iesu be vangit vloh te Nim Eo. E melele xa di pispisi mi moletin xil, vat xil na pris xil del elda xil na Siu xil lamei visali e lasisi labit, “?Xouk di opol ni holesok xil ak e his visi? ?Visi vari maen xouk tangan opol ni?”

24 Ma Iesu bit rilomun ni mi xil bit, “Inou mun nisis xamim ni neta tei. Xosxa muhit rilomun ni minou, ma inou mun nihit kila mi xamim xa di napol ni holesok xil ak e his visi.

\* 21:19: Luk 13:6    \* 21:21: Mat 17:20; Luk 17:6; 1Kor 13:2

\* 21:22: Mat 7:7-11; 18:19; Sion 14:13-14

25 ?Muhit pisi minou, Sion tebaptaes ni moletin xil e di tepol ni e his visi? ?Hi mu moletin tova tang?”✧

Xil laba, di lasep usili mi xil mun tang labit, “? Rihit naha? Xosxa rihiteni rihit, ‘Sion di tepol e his Hi,’ ma xi ihiteni mi xir ihit, ‘?Xosxa temak, veneh ma mutnake reitin ti e sepinien nan?’✧

26 E xosxa rihiteni rihit, ‘xi di tepol e his moletin tang,’ ulixir mikan ni vanut moletin xil xa eilep xiak vengan xa xil vus lanemi labit Sion Baptis tehe provet tei na Hi.”✧

27 Ma xil labit rilomun ni mi Iesu labit, “Xamem matakil ti xa xi di tepol e his visi.”

Ma Iesu biteni mi xil bit, “Xosxa imak, ma inou mun ninaviteni ti xa inou di napol ni holesok xil ak e his visi.”

*Iesu dei vole tei usil longxatien na horamue lu*

28 Di, Iesu dei vole ak mi vat xil na Siu xil bit, “? Xamim munemi midep? Moletin tei, natneli lube lu. Vatei, moletin ak ba pus ngan xa be muimol e biteni mini bit, ‘Natuxoli, xosali, ha upol e urvatiei saratel.’

29 “E horamue ak bit rilomun ni mini bit, ‘Teok ti tavei nama.’ E dutou ni, xi biles nenemien nan e ba pol.

30 “Di, tamealu ba pus ngan xa dutou e bit sepinien taxa tehiteni tetiamu mi muimol nan. Ma horamue ak bit rilomun ni mi tamen bit, ‘Bos ngamu tata, niha.’ E xi tava ti.

31 “?Visi e xalu iaxa pol ni naha xa tamealu ien bei?”

---

✧ 21:25: Sion 1:6,33 ✧ 21:25: Mat 21:32; Luk 7:30 ✧ 21:26: Mat 14:5; 21:46

E xil labit, “Ngan xa diamu.”

Ma Iesu biteni mi xil bit, “Reitin nabiteni mi xamim xa ngan xil xa di laleh viton mani te takis del hoeaso xil, Hi mei ihe suv toto e meulien nae itiamu ni xamim.

<sup>32</sup> Vengan Sion temei tangan vapisen suse xa momal pe met Hi mi xamim tangan ti muvusili. E xamim mutake reitin ti e sepinien nan. E ngan xil xa laleh mani te takis e hoeaso xil lalonge e lake reitin e sepinien nan. E tave ti neta xa mupus holesok xil xa lapol ni, mutaviles ti ra tesaen namim e mutake reitin ti e sepinien nan.”✧

*Iesu dei vole usil longrasien na moletin xil xa di lalaxat urvatiei tei*

*Mak 12:1-12; Luk 20:9-19*

<sup>33</sup> Di, Iesu dei vole tei mun mi vat xil na Siu xil bit, “Vatei, hortan tei milih i urvatiei te grep tei san. ✧ Xi pol ni vloh mikapis xole, e minggil vul tei da en xa ti lipel kikis huit grep xil en tangan lihur rat sute. Di, mikili ni vet tei xa be nesao tangan ti liketeh xole en. Melele xa pol vuol ni holesok xil ak, xi maen moletin sav xil tangan mei lilaxati. E xil labit xati mini xa lisa ti huit grep mini melele xa limen. Di, hortan ak mikakao ba de kantri sav tei.

<sup>34</sup> “Melengien hao mei mitavi, huit grep xil ak mei men. Ma hortan ak misil rut slev nan xil tangan ha lisis ngan xil xa di lalaxat urvatiei te grep san e lisa ti huite san xil mini.

<sup>35</sup> E melele xa laduxoh urvatiei ak, moletin xil xa di lalaxati ladal xat slev nan xil ak: labas purun tei; tei mun, lamu vini; tei mun xatel, langgove.✧



<sup>36</sup> Di, hortan ak misil rut slev xil mun xa lali ngan xil xa tesil xil tetiamu. E moletin xil xa lalaxat urvatiei ak lapol ni mi xil nggoni ngan taxa latepol ni tetiamu.

<sup>37</sup> Ma di, hortan ak misil natneli xati be visal xil vengang minemi bit, 'Xil limerere ni natuxoli xati.'

<sup>38</sup> "E melele xa ngan xil xa di lalaxat urvatiei ak lapus natneli bemei, labiteni mi xil mun tang labit, '!Ei, nat hortan xati iaxa di bemei iaxor! Xi vari ihur urvatiei ak melele xa tamen imat. !Mumei, rava ravas vini! !Imak, ma holesok nan xil mei ihe nar sung!'

<sup>39</sup> Ma xil laba, ladal xati, lakuvun rati ra urvatiei ak, e labas vini."✠

<sup>40</sup> Di, Iesu misis vat xil na Siu xil xa di lateong ni vole ak bit, "?Ma midep? ?Melele xa hortan te urvatiei itilomun imei, ma ipol ni naha mi moletin xil ak?"

<sup>41</sup> Ma xil labit rilomun ni mini labit, "Xi isa rilomun ni maten xa isa pupu mi moletin tesa xil ak. Ti, imaen urvatiei san mi moletin sav xil xa ti lisa rut huit grep xil mini e melele xa limen kuhi."

<sup>42</sup> Di, Iesu biteni mi xil bit, "?Midep? ?Xamim di mutavuli ti Vanuvei Eo? Vengang xa xi biteni bit, '*Pos xa moletin te polien xil di lasin ni, xi vari iaxa mei be seteman xati te nim e mili sen pos nen xil vus.*

*Ngan ak, Hi vari pol ni, e rapusi xa naha xa xi tepol ni bos pupu.'* (Sam 118:22-23)✠

<sup>43</sup> "Ma, nabiteni mi xamim, hosien na Hi xa be suv toto xa di e xamim taxeak, Hi ileh rerati reling

✠ 21:39: Hib 13:12 ✠ 21:42: Pol 4:11; 1Pit 2:7

xamim Siu xil. E isa ni sung mi moletin xil te kantri sav xil xa likila lilong xat raen e lipisen huit hosien teni e meulien nae.

<sup>44</sup> Ngan xil xa lasin seteman ak, xosxa imot ita xat tei e xil, sin xil imavul ivus.✧ E xosxa seteman ak imot ita xat tei e xil, ita xat kikisi.”✧

<sup>45</sup> Melele xa vat xil na pris xil del Farasi xil lalong vole xil xa Iesu dei, lakila sung xa di misep usil xil.

<sup>46</sup> Ma di lalang ni suse tangan lital xati. E ulixil mikan ni vanut moletin xil xa eilep xiak xa di lanemi labit Iesu be provet tei.✧

## 22

*Iesu dei vole tei usil suv toto tei xa misilasil ni moletin xil tangan lave anien te tetelien na natneli*

*Luk 14:15-24*

<sup>1</sup> Melele xa Iesu da tamu e vangit vloh te Nim Eo, xi dei vole ak mun mi moletin xil bit,

<sup>2</sup> “Hi xa be suv toto e meulien na moletin nan xil nggoni suv toto tei xa, vatei, misak mesen anien te tetelien tei na natneli.

<sup>3</sup> Xi misil slev nan xil laba tangan lakes ngan xil xa suv toto ak tesilasil ve xil ngamu tangan limei e anien ak. E moletin xil ak labit linamei ti.

<sup>4</sup> “Ma suv toto ak misil slev sav nan xil e biteni mi xil bit, ‘Ha muhiteni mi ngan xil xa natesilasil ve xil muhit, “!Mumei! Inou nasak mesen anien holu ngamu. Labas buluk savan xil e sulut buluk xil mun xa lakaio kuhi be te anien ak. Reitin, holesok xil vus te anien te tetelien ak mese tuei di. Ma mutemanon mumei.” ’

---

✧ **21:44:** Aes 8:14 ✧ **21:44:** Dan 2:34-35,44-45 ✧ **21:46:** Mat 14:5; 16:14; 21:11,26; Luk 7:16; 24:19; Sion 4:19; 9:17

<sup>5</sup> “E moletin xil ak lanem male ni raen tang, e laba sung di lapol ni polien nae xil. Tei be naho nan, e tei mun ba pol e sitoa nan.

<sup>6</sup> E moletin tesav xil ladal xat slev nan xil ak, labas purun xil e lamu vin xil.

<sup>7</sup> E melele xa suv toto ak milongeong usili, ien mikat xa mikat. Misak ni, misil moletin te vaeen nan xil laba lamu vuol ni ngan xil xa latehas vin slev nan xil, e ladin taon nae.

<sup>8</sup> “Di, suv toto ak biteni mi slev sav nan xil bit, ‘Anien te tetelien meses tuei di. E ngan xil xa natesilasil ve xil, meulien nae tapin ti tengan lamei lava ni.

<sup>9</sup> Ma ha muhe suse xil te taon e musilasil ni moletin xil vus xa mukamet xil tengan mei lia anien te tetelien ak.’

<sup>10</sup> Misak ni xil labe suse xil e lakes viton moletin xil vus xa lakamet xil, ngan xil xa labos e ngan xil xa lasa. E nim xa anien te tetelien da en polu kuhi ni moletin xil.

<sup>11</sup> “Ngan xil xa lamei e tetelien ak, lasing kuhi ni eising xil te tetelien. E melele xa suv toto bemei tengan vapus ti ngan xil xa lamei, xi miketeh e mikamet moletin tei xa tasing ni ti eising te tetelien.

<sup>12</sup> Ma suv toto ak be visali e misisi bit, ‘?Tuxoli, omei e nim ak midep vari xa otasing ni ti eising te tetelien?’ E moletin ak dat votei, e takil ti naha xa ihitani.

<sup>13</sup> “Misak ni, suv toto biles e misemae ni moletin te polien nan xil bit, ‘Muvar viton hen e len xil, e mukuvun rati ihe hale e ha ita nga e ut te malux-oluk. E rute ak moletin xil ti limuis e ti lingas

luhexil ve longpangasien nae xil.’ ”☆

14 Di, Iesu misep kor usil vole ak bit, “Reitin, Hi misilasil ve moletin xil holu tangan lamei visali, e xil vahis tang iaxa bosei xil tangan liti visali.”

*Farasi xil lasis Iesu usil rin te takis  
Mak 12:13-17; Luk 20:20-26*

15 Melele xa Farasi xil lalong vole xil xa Iesu di biteni ba xat xil, xil laba di lalang ni mesal tova xa likila lital xati ixo en ve sepinien nan xil.

16 Misak ni, lasil rut moletin nae xil del rut Siu sav xil mun xa ladi rin na suv toto Herod Antipas laba. Xil labe visal Iesu e labiteni mini labit, “Titsa, xamem makila xa xouk obe hisit moletin tei xa moletin sav xil likila liling nenesien nae iti en. E makila mun xa xouk di opispisi mi moletin xil ni suse te reitinen xa Hi ien bei tangan moletin nan xil lihusili. Xouk di osepini mi moletin xil vus nggoni ngan xa xil vus lapin tang, tave ti neta xa labe eilep xil mu movotei xil tang.

17 Ma, usa ti nenemien nam mi xamem usil rin ak. ?Rae na Mosis maen ni tangan Siu xil ti lixal takis iha mi suv toto te hal Rom, mu tamaen ni ti?”

18 E Iesu pus kil nenemien tesa nae e bit rilomun ni mi xil bit, “!Xamim mubos nggot hilibemim tang! ?Veneh ma di musak pis nou?”

19 Musa mani tova xa di langgal takis ni.” Melele xa lasa ni mini

20 xi misis xil bit, “?Valnao visi vari iaxa da en? ?E his visi iaxa de mani ak?”\*

---

☆ **22:13:** Mat 8:12; 13:42,50; 24:51; 25:30; Luk 13:28      \* **22:20:** Mani ak, valnao suv toto te hal Rom iaxa da en e ladis en labit, “Ngan ak be nat Okastas xa be Hi.”

<sup>21</sup> Xil labit rilomun ni mini labit, “Neta xalu vus xa ludi en be na Sisa, suv toto xa mahulong te hal Rom.”

Ma Iesu biteni mi xil bit, “Xosxa mak, ma momal tang tangan musa naha xa be na Sisa mini, e naha xa be na Hi, musa ni mini.”<sup>✧</sup>

<sup>22</sup> E melele xa lalong sepinien nan, latemanin pupu ni. Ma, labe relingi e laba.

*Satusi xil lasis Iesu usil melele xa moletin xil limea rilomun ra maten*

*Mak 12:18-27; Luk 20:27-40*

<sup>23</sup> E melengien xati nen tak, Satusi xil xa labit moletin misakras vamea rilomun ra maten<sup>✧</sup> labe visal Iesu, e lasisi labit,

<sup>24</sup> “Titsa, Mosis tetis rae ak tehe nar xa tehit, ‘Xosxa moletin tei mat e mistokovein atou nan e horamue nalu tovuol, ma tunali sav ihur mei iteli itel tunau nan. Imak, ma isa horamue mini xa ihur his tunali xa mat ngamu.’ *(Dut 25:5)*

<sup>25</sup> Ma vatei, tua tatei xil latehe lu e he sav (7) lateti visal xamem. Ngan xa tehe muimol teteli tetel atou tei. Di, xi temat e horamue nalu tehe tovuol. Misak ni, tuneli xa tetutou ni mei tehur tunau nan. E xi mun temat, e tuvava nalu tehe tovuol.

<sup>26</sup> Di, sexien nen tak testal mun mi tuneli xa tetutou ni. Ma di, testal mun mi ngan xa tehe tol nen e dit temak tang teha vuma ... tetuxoh ngan xa tehe tasite e tua xil ak.

<sup>27</sup> E tetutou ni holesok xil ak, atou ak mun temat.

<sup>28</sup> ?Ma xosxa mea rilomunen be reitin, melele xa moletin xil vus limea rilomun ra maten, ngan

✧ **22:21:** Rom 13:6-7    ✧ **22:23:** Pol 23:8

xave e tua xil xa labe lu e he sav (7) xiak iaxa ihur atou akihe nan xati, vengan xil vus lateteli tetela?”

<sup>29</sup> Iesu bit rilomun ni mi xil bit, “Xamim di mule ras suse namim vengan xa mutakil kuh ti Vanuvei Eo na Hi mu xeihen nan.

<sup>30</sup> Vengan e melele xa moletin xil limea rilomun ra maten, xil mei lixoni masxaxa xil xa ladi ut nesao, e sexien te tetelien ihe tovuol mun.

<sup>31</sup> ?E veneh ma mutake reitin ti xa moletin xil likila limea rilomun ra maten? ?Mutavuli ti mu naha xa Hi tesepin ni mi xamim? Vengan xi tehit,

<sup>32</sup> ‘Inou **nabe** Hi na Ebrahim, Hi na Aesak, e Hi na Siekob.’ (Eks 3:6) ?Mulonge? Xi **be** Hi na ngan xil xa lameul tamu ladi, e tave na ngan xil ti xa labe tovuol ngamu.”†

<sup>33</sup> E melele xa vanut moletin xil xa eilep xiak lalong pispisien nan xil, xil latemanin ni.✧

*Iesu pispisi usil rae xave iaxa be eilep mak mu mili sen rae sav xil*

*Mak 12:28-34; Luk 10:25-28*

<sup>34</sup> Melele xa Farasi xil lalongeong ni xa Iesu bas vin upang na Satusi xil, xil mei labe vituei e laba lapus Iesu.

<sup>35</sup> Tei e xil xa be titsa tei te rae na Mosis bemei tangan vasak pis Iesu ni sepinien nan xil.

<sup>36</sup> Misak ni, xi misisi bit, “?Titsa, rae xave vari iaxa be eilep mak mu mili sen rae xil vus?”

---

† **22:32:** Neta sav xa Ebrahim, Aesak e Siekob lattemat nousav ngamu e melele xa Hi di tehit sepinien ak mi Mosis, Hi tehiteni xa xi **be** Hi natel. Xi tenaviteni ti xa **tehe** Hi natel. Ma Iesu bit ngan ak pisen ni xa latomeul tamu latodi. ✧ **22:33:** Mat 7:28; 13:54; Mak 11:18

37 E Iesu bit rilomun ni mini bit, “*Temim ihei Iahova xa be Hi namim ixo tinemim tevi, ixo meulien tevi namim, e ixo nenemien tevi namim.*’ (Dut 6:5)✧

38 Rae ak iaxa be eilep mak mu mili sen rae sav xil.

39 E tei mun xa nggoni tang xa be lu nen di biteni bit, ‘*Eheien namim iti e moletin sav xil ixoni ngan taxa eheien namim di e xamim mun tang.*’ (Lev 19:18)✧

40 Holesok xil vus xa di e rae xil na Mosis del Tisen xil na provet xil tetiamu di ngamu e rae xalu ak.”✧

*Iesu misep usil Mesaea xa Hi tehosei  
Mak 12:35-37; Luk 20:41-44*

41 E melele xa Farasi xil ladi vituei tamu dela, Iesu misis xil sung bit,

42 “?Xamim munemi midep usil Mesaea? ?Xi istal ixo vatimol na visi?”

E xil labit rilomun ni mini labit, “Xi istal ixo vatimol na suv toto Deved tetiamu.”✧

43 Ma Iesu biteni mi xil bit, “?Xosxa ngan ak be reitin, veneh ma Ninin na Hi tesa nenemien mi Deved tangan ikes Mesaea ak ni ‘Suv’? Vengan xa xi tehiteni tehit,

44 ‘*Tahova biteni mi Suv navan bit,  
“Utotan inggak e riuk metu,  
ituxoh melele xa niling elu nam xil e hem.”*’  
(Sam 110:1)✧

---

✧ **22:37:** Sos 22:5 ✧ **22:39:** Mat 5:43; 19:19; Rom 13:9; Kal 5:14; Tem 2:8 ✧ **22:40:** Rom 13:10; Mat 7:12 ✧ **22:42:** Sion 7:42  
✧ **22:44:** Pol 2:34-35; 1Kor 15:25; Hib 1:13

<sup>45</sup> Suv toto Deved vari tekes Mesaea ni ‘Suv nan.’ ?E vengan xa tata tei misakras vakes natneli ni ‘suv,’ Mesaea istal ixo vatimol na Deved itep?”<sup>‡</sup>

<sup>46</sup> E moletin xil lasakras lasa rilomun ni sepinien nan. Ma e melele nen ak ba, moletin xil ulixil mikan tangan lasis ti mun neta mini.✧

## 23

*Iesu misel xat titsa xil te rae na Mosis del Farasi xil*

*Mak 12:38-39; Luk 11:43,46; 20:45-46*

<sup>1</sup> Melele xa Iesu da tamu e vangit vloh te Nim Eo na Hi, misepin mi vanut moletin xil del moletin nan xil mun bit,

<sup>2</sup> “Titsa xil te rae na Mosis del Farasi xil ladi tangan laxoles Mosis e lavit kil rae xil na Hi mi moletin xil.

<sup>3</sup> Ma bos xa xamim mulong xat xil e muhusil holesok xil vus xa di labiteni mi xamim tangan mupol ni. E xamim, munapol ni ti sexien xil naxoni ngan xa xil di lapol ni, vengan xil latahusil kuh ti pispisien xil xa di lapispisi ni mi mosav xil.✧

<sup>4</sup> Xil di laling rae xil hao xa meas da xat mar moletin xil. E xil, iexil ti tavei tangan lasa hexil vatutou ni xil tangan lapoe.

<sup>5</sup> “Ngan xil ak, holesok xil vus xa di lapol ni, lapol ni tangan taxa moletin xil ti lapusi e ti lasa merereen mi xil ven.✧ Xosxa mosav xil di labar xat tutut bokis tei di he xa sepinien na Hi da en,

---

<sup>‡</sup> **22:45:** Reitin xa Mesaea ixo vatimol na suv toto Deved, e vengan xa xi tekes Mesaea ni suv, di pisen ni xa Mesaea be eilep mak mu mili, e xos, Mesaea ak teta ngamu tetiamu ni. ✧ **22:46:** Mak 12:34; Luk 20:40 ✧ **23:3:** Mal 2:7-8 ✧ **23:5:** Mat 6:1,5



ma xil sung lapol ni nae eilep mak mu mili.\* Xosxa mosav xil di laling ao xil xa tepepiei di murur e kusut eising nae, xil sung di lapol ni ao nae xil latepiei pilei mu mili.†

<sup>6</sup> E anien xil xa tellep, e nim te pispisienxil mun, xil di lalepis vontoen xil xa bos xa be na ngan xil kestang xa lapo his xil xa latellep.✧

<sup>7</sup> E von posen xil mun, xil iexil bei pupu tangan moletin xil lisemin xil itel merereen e likes xil ni 'titsa.'

<sup>8</sup> "E xamim, linakes xamim ni titsa xil ti vengan titsa namim tei takes, e xamim vus mube tua xil tang.

<sup>9</sup> E munakes ti moletin e ut etan ak ni 'tata' vengan Tata namim tei takes tang, ngan xa de ut nesao.

<sup>10</sup> E linakes ti mun xamim ni 'suv' vengan suv namim tei takes, xi be Mesaea.

<sup>11</sup> Ngan xa di misa tutouen mi xamim nggoni slev namim, xi iaxa mei ihe eilep mak mu ni xamim.✧

<sup>12</sup> Vengan ngan xil xa di lapol ni nenemien nae be nesao, Hi ipol ni xil lihe tan. E ngan xil xa di lapol ni nenemien nae be tan, Hi ipet rat hisxil

---

\* **23:5:** Siu xil vus xa labe malohos di laling sepinien hat (4) xa nggo Vanuvei Eo na Hi di e vangit bokis tei xa hokorong: Eks 13:1-10; 13:11-16; Dut 6:4-9; 11:13-21. Di, labare di vatixil mu hexil melele xa laba tangan lasis. Ngan ak nggusil rae tei na Mosis xa de Dut 6:8. † **23:5:** Siu xil vus xa labe malohos di laso rin ni ao xil xa tepepiei e di lalingi murur e kusut eising nae tangan isak ni xil linem xati xa di langgusil xat Hi kestang ixoni ngan xa rae na Mosis xa de Nam 15:37-41 di misep usili. ✧ **23:6:** Luk 14:7 ✧ **23:11:** Mat 20:26-27; Mak 9:35; 10:43-44; Luk 9:48; 22:26

ihe nesao.✠

<sup>13</sup> “!Isa pupu mi xamim, titsa xil te rae na Mosis del Farasi xil xa di munggusil Hi nggot hilibemim tang! Hi isa pangasien mi xamim vengan xamim iemim ti tavei tangan mupol ni Hi mei vahe suv toto e meulien namim. E melele xa mosav xil iexil bei tangan Hi mei vahe suv toto nae, xamim di musikoe xol xil.

<sup>14</sup> ‡

<sup>15</sup> “!Isa pupu mi xamim, titsa xil te rae na Mosis del Farasi xil xa di munggusil Hi nggot hilibemim tang! Hi isa pangasien mi xamim vengan di munggur xoteh tas e tan tangan taxa mukamet moletin ngan e muviles nenemien nan tangan vahusil xamim. E melele xa biles e nggusil pispisien xil namim, xamim mupol ni mei misa pilei sung mili xamim. E momal tang tangan xi mun ihur pangasien itel xamim e Upang xa misakras vamat.

<sup>16</sup> “!Isa pupu mi xamim xa di musak tangan ti mutiamu ni moletin xil, tave ti neta xa metemim xil bar!✠ Pangasien xa muhuri ihe eilep pupu vengan di mupispisi mi moletin xil mubit, ‘Xosxa moletin tei pol ni hitxatien tei nan e his Nim Eo, hitxatien nan be neta sav tang. E xosxa xi pol ni hitxatien nen e his gol xa di Nim Eo, ma ihur xat hitxatien ak ixeih.’

✠ **23:12:** Siob 22:29; Pro 29:23; Esek 21:26; Luk 14:11; 18:14

‡ **23:14:** Rut uvei na Matiu lateling sepinien ak mun xa de Luk 20:47 e Mak 12:40 xa bit, “!Isa pupu mi xamim, titsa xil te rae na Mosis del Farasi xil xa di munggusil Hi nggo hilibemim tang! *Ve hokanen namim, di muleh holesok xil holu ra tunau xil, e pe met moletin xil, di mupol ni sisen xil xa tepiei. !Ve rin ak, Hi isa pangasien xil xa isa pupu iha xat xamim!*” ✠ **23:16:** Mat 15:14; 23:24; Rom 2:19

17 !Metemim bar e mutalang tova tang! ?Ngan xave be eilep mak mu, gol te Nim Eo, mu Nim Eo na Hi vari xa di misak ni gol ak be eo?

18 E di mupispisi mi moletin xil mun mubit, 'Xosxa moletin tei pol ni hitxatien tei nan e his hor te sanien, hitxatien nan be neta sav tang. E xosxa xi pol ni e his sanien xa lalingi di xati, ma ihur xat hitxatien ak ixeh.'

19 !O, metemim li bar tova tang! ?Ngan xave be eilep mak mu, sanien mu hor te sanien xa di misak ni sanien ak mei be eo?

20 Ma moletin xa di pol ni hitxatien nan e his hor te sanien di pol ni mun e his holesok xil vus xa di xati.

21 E moletin xa pol ni hitxatien nan e his Nim Eo, xi di pol ni e his Hi xa da en.✧

22 E moletin xa di pol ni hitxatien nan e his ut nesao, xi di pol ni e his vontoen te xeihen na Hi e e his ngan xa di dotan da en.✧

23 "!"Isa pupu mi xamim, titsa xil te rae na Mosis del Farasi xil xa di munggusil Hi nggot hilibemim tang! Hi isa pangasien mi xamim vengan di muteong xat tutut rae xil nggoni sexien xa musa taet✧ ni tutut uvei xil te kuken ba mi Hi. E rae xil xa latellep nggoni ngan xil xa di labit mupisen sexien xil te esaeen, te neketen, e mupol ni naha xa momal pe met Hi, xamim mutateong xati ti.✧ Vahos mak mu vahit muteong xat rae xil xa latellep vatel ngan xil xa labe tereli mun.

24 !Tave ti neta xa metemim bar,✧ e di musak tangan mutiamu ni mosav xil! Xamim di musev

---

✧ 23:21: 1King 8:13; Sam 26:8 ✧ 23:22: Aes 66:1; Mat 5:34; Pol 7:49 ✧ 23:23: Lev 27:30 ✧ 23:23: Maek 6:8 ✧ 23:24: Mat 15:14; 23:16; Rom 2:19

kuh oei mamim tangan munamu ti tutut anon tova xa tamese ti, e mutamea sung murom tevi kamel tei xa mahulong xa misa mak mu mili.

<sup>25</sup> “!Isa pupu mi xamim, titsa xil te rae na Mosis del Farasi xil xa di munggusil Hi nggot hilbemim tang! Hi isa pangasien mi xamim vengan munggoni kap e pelet xa di lakas moten ni e hale tang, ✧ e vangite mumu nggoni tinemim xa polu ni nenemien te hokanen e holesok sav xil xa lasa.

<sup>26</sup> !Metemim bar tova tang! ✧ Itiamu, mukas moten vangit meulien namim. Imak, ma hale mun imese.

<sup>27</sup> “!Isa pupu mi xamim, titsa xil te rae na Mosis del Farasi xil xa di munggusil Hi nggot hilbemim tang! Xamim munggoni von tehinen xil xa lapol kuhi ni e lapen kuhi ni mieh. ✧ Ut xa hale, lapusi bos xa bos. E vangite xil polu ni si moletin xil e neta sav xil mun xa misa xa misa pupu.

<sup>28</sup> Usil sexien ak, xamim mumal nggot hilbemim tang, e tinemim, mupolu ni luvosen e sexien tesa xil. ✧

<sup>29</sup> “!Isa pupu mi xamim, titsa xil te rae na Mosis del Farasi xil xa di munggusil Hi nggot hilbemim tang! Pangasien namim isa mak mu vengan xa mupol pilei ni von tehinen na provet xil e di mupilas kuhi ni von tehinen na ngan xil xa lamal pe met Hi.

<sup>30</sup> E di mubiteni mubit, ‘Vahit mateti e melengien na avu namem xil tetiamu, xamem manamos ti natel xil e melele xa latehas vin provet xil ak.’

---

✧ 23:25: Mak 7:4    ✧ 23:26: Sion 9:40    ✧ 23:27: Pol 23:3

✧ 23:28: Luk 16:15

<sup>31</sup> !Iaxai vari! Nggo sepinien xati namim, di mubiteni reitin xa mube vatimol xati na ngan xil xa latehas vin provet xil.✧

<sup>32</sup> E melele xil namim sung, xamim ti mupol vuol ni naha xa avu namim xil tetiamu latepol kokot ni.

<sup>33</sup> “!Xamim mube tetal sasa xil! Reitin, mube vanut tetal sosomen xil xa di mungas vin moletin xil ni vulongomim.✧ ?Mulesae reling pangasien te Upang xa misakras vamat itep vari? !Musakras!

<sup>34</sup> Misak ni, nisil provet xil, ngan xil xa lakilakil kuhi, e titsa xil mun ha lisel xat xamim tangan muhiles ra tesaen xil namim. E xamim, muhas vin rute xil e muti xat xil e eivave xil. E rute ngan xil mun, mumeas purun xil ni ao te xeih xil xa sanute di en e nim te pispisien xil namim.✧ Muhol xil ha mutal xat xil e taon namim xil e e taon sav xil mun.

<sup>35</sup> Isak ni, pangasien ve maten na moletin xil vus xa lamal pe met Hi iti e hemim. Reitin, maten na Ebel✧ xa temal pe met Hi xa avu namim tetiamu tehas rohon ni temat teloh teha tetuxoh maten na provet Sakaraea, nat Berekae, xa avu namim xil latehov vini e hilaep te Nim Eo e hor te sanien, maten nae xil vus iti xat xamim.

<sup>36</sup> Reitin li nabiteni mi xamim, Hi isa pangasien ve maten xil ak iha xat xamim te xosali ak.

<sup>37</sup> “!O moletin xil te hal Serusalem! Xamim iaxa mutehas vin provet xil e mutehov vin eloheoh xil xa Hi tesil xil latemei ve xamim.✧ Melengien xil holu, ieok bei pupu tangan nakes viton xamim e nasikoe xol xamim vaxoni toatou tei xa mikes

---

✧ **23:31:** Pol 7:52 ✧ **23:33:** Mat 3:7; 12:34; Luk 3:7 ✧ **23:34:** Pol 7:52; 1Tes 2:15; Mat 10:23 ✧ **23:35:** Sen 4:8; Hib 11:4 ✧ **23:37:** Pol 7:59; 1Tes 2:15

viton tuten xil e muhin xol xil ni aveoun. E xamim iemim ti tavei.

<sup>38</sup> !Ma xamim mupus ti sung! Hi nasikoe xol xamim ti mun, e imaen Nim Eo namim mei ita hon tang, moletin ti mun nava en.✧

<sup>39</sup> Nabiteni mi xamim, taxeak iha, munapus ti mun nou ituxoh melele xa muhiteni muhit, ‘! *Tuxolxatien iti mi ngan xa di bemei e his Iahova!*’ ” (Sam 118:26)✧

## 24

*Iesu misep usil sakpurunien xil del melele te xeih xil xa ti imei*

*Mak 13:1-31; Luk 21:5-33*

<sup>1</sup> Melele xa Iesu del moletin nan xil di labe reling vangit vloh te Nim Eo, moletin nan xil di lati nim xil xa bos te Nim Eo mini.

<sup>2</sup> Ma Iesu biteni mi xil bit, “?Xamim di mupus holesok xil vus ak? Reitin li nabiteni mi xamim, melengien tei di bemei xa hat xil ak xa latepol ni Nim Eo ak ni navistin xil ti mun. Moletin xil mei lihu lenen xil vus ihe tan.”✧

<sup>3</sup> Di, Iesu be nesao e Vathu te Urvatiei te Olip del moletin nan xil. E melele xa ba dotan, xil kestang lamei visali e lasisi labit, “?Uhiteni mi xamem, holesok xil ak usil Nim Eo istal vilieh vari? ?E naha vari ipisen ni xa xouk umei, e hoxalite te melengien xil xa radi en di bemei sangas?”✧

<sup>4</sup> Iesu bit rilomun ni mi xil bit, “Muxuxou kuhi ve xamim, e munamaen ti moletin mei naluvos xamim.

---

✧ **23:38:** 1King 9:7-8; Ser 12:7; 22:5 ✧ **23:39:** Mat 21:9; Mak 11:10; Luk 19:38 ✧ **24:2:** Luk 19:44 ✧ **24:3:** Mat 24:27,37,39; 13:39,40,49; 28:20

<sup>5</sup> Vengan moletin xil holu limei e hisok e lihiteni lihit, 'Inou nabe Mesaea!' Ma liluvos moletin xil holu.✧

<sup>6</sup> Mulongeong ni xa vaeen xil xa tellep di bemei, e muhur longeongen mun usil vaeen xil xa di rute xil xa be sotin. E munatemanin ni ti. Holesok xil ak iaxa mei istal itiamu, e nave hoxalite te ut etan ti mu.

<sup>7</sup> Ut tei ivae itel ut tei mun, e kantri xil lihas tan ni kantri sav xil.✧ Ut xil hao e ut etan, mae kekaten ihas moletin xil e lul holu ilil.

<sup>8</sup> E tave ti neta xa holesok xil ak mei isa itiamu ni melele xa Hi mei ihe suv toto na moletin xil, ngan ak nave hoxalite ti mu. Ixoni melele xa atou tei milong rohon ni mar pangasien xa di pisen ni xa, nave nousav ti, iling tuvava nan.

<sup>9</sup> "Ti, xil mei lital xat xamim e lisa rat xamim muha tangan ha lisa pangasien mi xamim e lihas vin xamim.✧ Moletin xil te kantri xil vus iexil iat pangas xamim vengand di munggusil xat nou.

<sup>10</sup> E melele nen ak, moletin xil hao likavitou ra neketen nae e limaen rat tua nae xil lihe he elu nae xil e iexil ti iat xil mun tang.

<sup>11</sup> E provet te luvosen xil hao mei listal e liluvos moletin xil holu.✧

<sup>12</sup> E vengan sexien te tesaen mei ihe holu mak mu, eheien na moletin xil holu nati ti mun e mosav.

<sup>13</sup> E ngan xil xa lisoh ixeh e neketen nae ituxoh hoxalite te holesok xil vus ak, Hi iteh meulien e xil.✧

---

✧ **24:5:** Mat 24:11,23-24; Sion 5:43; 1Sion 2:18 ✧ **24:7:** 2Kron 15:6; Aes 19:2 ✧ **24:9:** Mat 10:17,23; Sion 16:2; Mat 10:22; Sion 15:18 ✧ **24:11:** Mat 24:5,24 ✧ **24:13:** Mat 10:22; Rev 7:14

14 E melele xa longeongen usil Hi xa mei ihe suv toto na moletin xil ha ituxoh rute xil vus e ut etan tangan moletin xil vus lakilakil ni, ☆ e melele nen ak vari, ihe hoxalite te holesok xil vus.

15 “Xamim mupus sepinien na Hi xa texo provet Daniel mei istal ihe reitin xa bit, *‘Xil liso neta tei xa be muis pupu ite vangit Nim Eo xa isak ni namese ti mun pe met Hi.’* (Dan 11:31) (Xouk xa di obuli sepinien ak, bos tangan ukil kuh koute teni.)

16 E melele xa mupusi, ngan xil xa ladi Sudea litemanon lilesae ha lixus liti e vathu xil.

17 Xosxa moletin tova di mingel e hale, mesal ihe tovuol tangan vatilomun vahe nim e vahur neta tova nan. ☆

18 E xosxa moletin tei di pol e naho, xi nava ti mun tim tangan vahur eising tova nan.

19 E melele nen xil ak, isa pupu mi atou xil xa ladi ni tuvava xil e ngan xil mun xa di latunat ni tuvava xil.

20 Musis mi Hi tangan melengien xa ti mulesae en nave an tesa ti mu nave Sabat ti,

21 vengan longpangasien xil te melengien tesa xil ak isa ili melengien sav xil vus te ut etan: e melele xa Hi tepeas ni ut etan miloh mei duxoh xosali. E hisit melengien xil ak ihe tovuol mun e melengien xil mun xa ti imei itutou. ☆

22 E Hi teta xoteh melengien tesa xil ak mei be tamure mu vengan xi di minem usil ngan xil xa tehosei xil labe nan. Vengan vahit napol ni ti namak, moletin ti mun nameul.

23 “E melele nen ak, xil lihiteni lihiti, ‘!Mupus ti! !Ngan ak be Mesaea xa Hi tehosei!’ Mu lihiteni

☆ 24:14: Mat 28:19; 10:18

☆ 24:17: Luk 17:31

☆ 24:21: Dan

12:1; Soel 2:2; Rev 7:14



lihiti, 'Mupus ti mu! Xi iaxa da iaxor!' E xamim, munake reitin ti e sepinien xil ak.✧

24 Vengan Mesaea te luvosen xil e provet te luvosen xil mun limei. E melele xa limei, lipol ni merekel xil e holesok xil xa tellep xa isak ni moletin xil limesep pupu ven. Xil lipol ni tangan liluvos moletin xil holu lihusil xil.✧ Nahe di lisak tangan lalihi rerat ngan xil mun xa Hi tehosei xil labe nan.

25 Ma muteong kuhi ni sepinien xil ak, vengan, inou, nabit usil holesok xil hao ngamu mi xamim xa mei istal.

26 "Ma xosxa moletin tei mei ihiteni mi xamim ihiti, 'Mesaea da nga xor e uruvuol,' munaha ti rute ak. E xosxa lihiteni mi xamim lihiti, 'Mesaea xi tak, dat vangit nim ak,' munake reitin ti en.✧

27 Vengan, melele xa inou, Nat Moletin, nitilomun nimei, moletin xil vus lipus kila✧ ixoni melele xa lapus an milangas e miehen teni nggur vuol ni tilang hat nggo rin tei e ist ba duxoh rin mun e wes.

28 Moletin xil vus lipus kil rute xa Nat Moletin itilomun en vengan xa imei itel pangasien holu. Reitin, lipus kila ixo hisit sexien xa di lale kil rute xa neta tei mat da en e melele xa lapus vanut angelu xil ladi ut tei.\* ✧

29 "E melele xati xa melengien tesa xil ak ivus, 'Eai imei imaluxoluk

---

✧ **24:23:** Mat 24:5,11; 1Sion 2:18 ✧ **24:24:** Dut 13:1-3; 2Tes 2:9-10; Rev 13:13-14 ✧ **24:26:** Luk 17:23-24 ✧ **24:27:** Mat 24:37,39; 1Kor 15:23; 1Tes 2:19; 3:13; 4:15; 5:23; 2Tes 2:1,8; Tem 5:7,8; 2Pit 3:4,12; 1Sion 2:28 \* **24:28:** Sepinien xati teni bit, "voltsa," tuman tei xa mahulong xa di langga lakapis xol neta tei xa mat. ✧ **24:28:** Luk 17:37

*e aveti namem ti mun.'* (Aes 13:10)✧  
*'Hitu xil likiri ra tilang hat,*  
*e holesok xil mun xa di nesao,*  
*Hi imulul ni xil.'* (Aes 34:4)✧

<sup>30</sup> “Reitin, e melele xati nen ak, neta tei istal e tilang hat xa ipisen ni xa inou, Nat Moletin, di namei. E moletin xil vus te ut etan ti lites xil mun tang melele xa lipusi. Xil lipus *'Nat Moletin imei etan itel momah xil te tilang hat.'* (Dan 7:13)✧  
 Xi imei itel xeihen, e minehinen te xeihen nan ihe eilep.

<sup>31</sup> Xi ihui amaru nan ixeih tangan vasa rerat masxaxa nan xil. E xil lihe rute xil vus e ut etan, lixo rin tei ha lihe rin tei mun, e lileh viton moletin xil vus xa Hi tehosei xil labe nan.✧

<sup>32</sup> “Xamim muhur pispisien ixo vatit fik. Melele xa lite xil miso rohon ni ute xil xa be neta hu, xamim mukila xa melele te an te tin di bemei.

<sup>33</sup> Usil sexien nen tak, melele xa mupus holesok xil ak mei istal, mukila xa mei rilomunen navan di bemei sangas. Reitin, da ngamu e puiteh.

<sup>34</sup> Reitin li nabiteni mi xamim, holesok xil ak mei istal e melele xa moletin xil te xosali ak limeul tamu liti.✧

<sup>35</sup> Nabiteni reitin vengan xa neta sav xa ut etan itel tilang hat mun lalikesae e melengien tei, sepinien navan misakras vakesae vatova.”✧

*Iesu pispisi ni xa moletin tovuol xa wakil melengien xa Nat Moletin itilomun en*  
*Mak 13:32-37; Luk 17:26-36; 12:41-48*

---

✧ **24:29:** Esek 32:7; Soel 2:10,31; 3:15; Rev 6:12 ✧ **24:29:** Hag 2:6,21; Rev 6:13 ✧ **24:30:** Sak 12:10,14; Rev 1:7; Mat 16:27; 26:64  
 ✧ **24:31:** Mat 13:41; Aes 27:13; 1Kor 15:52; 1Tes 4:16; Dut 30:4; Sak 2:6 ✧ **24:34:** Mat 16:28 ✧ **24:35:** Mat 5:18; Luk 16:17

<sup>36</sup> Iesu biteni mi moletin nan xil bit, “Moletin tovuol xa wakil melengien xati xa inou, Nat Moletin, nitilomun en. ✧ Reitin, masxaxa xil xa ladi ut nesao, e inou mun, Nat Moletin, matakil ti. Hi Tamer kestang mikil haoa xati teni.

<sup>37</sup> Mei rilomunen navan, Nat Moletin, ixoni melengien xil na Noah tetiamu. ✧

<sup>38</sup> Vengan, e melele nen xil ak, tetiamu ni ngan xa oei xa mahulong temei, moletin xil di lateanien e di latemun, tiramue xil e atou xil di lateteli ba tetuxoh melele xa Noah tehe vangit tuturil. ✧

<sup>39</sup> Xil latnakil ti vari naha xa mei istal ba tetuxoh melele xati xa oei xa eilep temei e mei tehas xil vus latelel. Ixo rin tak, moletin xil litemanin ni mei rilomunen navan, Nat Moletin. ✧

<sup>40</sup> E melele nen ak, moletin lu ti lalipol e naho tei takes, e Hi mei ihur rat tei xalu ihe visali e ut nesao, e teimun isin ni e ilingi ita.

<sup>41</sup> Reitin, atou lu ti lalipol ni anien, e Hi ihur rat tei xalu iha visali e ut nesao, e teimun isin ni e ilingi ita.

<sup>42</sup> “Ma, muxuxou kuhi ve xamim, vengan mutakil ti melengien eah iaxa Suv namim itilomun en. ✧

<sup>43</sup> E mukila xa xosxa moletin tei, xa nim man da, mikil melele xati xa moletin te kanen imei en, xi mikila ita nga e iketeh xole tangan moletin te kanen namei ti e nim man. ✧

<sup>44</sup> Ma muvue xat xamim. Vengan, usil sexien

---

✧ **24:36:** Pol 1:7; 1Tes 5:1,2    ✧ **24:37:** Sen 6:9-12    ✧ **24:38:** Sen 6:13-7:24; 2Pit 3:6    ✧ **24:39:** Mat 24:27,37; 1Kor 15:23; 1Tes 2:19; 3:13; 4:15; 5:23; 2Tes 2:1,8; Tem 5:7,8; 2Pit 3:4,12; 1Sion 2:28  
 ✧ **24:42:** Mat 25:13    ✧ **24:43:** Luk 12:39-40; 1Tes 5:2; 2Pit 3:10; Rev 3:3; 16:15

nen tak, inou, Nat Moletin, nitilomun nimei e melele tei xa moletin xil linakil ti ixoni moletin te kanen.

<sup>45</sup> “?Visi iaxa be moletin te polien xa be metisou kuhi e di miteong xat rae na suv nan? Xi be ngan xa suv nan milingi be vat na moletin te polien sav xil e tim san tangan ti isa anien mi xil e melele xati teni.

<sup>46</sup> Tuxolxatien iti mi moletin te polien xa, melele xa suv nan itilomun imei, ikameti xa xi di pol ni polien nan xil.

<sup>47</sup> Reitin li nabiteni mi xamim xa suv nan ipet rat moletin te polien ak ihe nesao tangan ti ilaxat holesok sav nan xil mun.✧

<sup>48</sup> “E xosxa moletin te polien ak, vatin isa, ma ti ihteni mi xi mun tang iht, ‘Suv navan namei ti mok.’

<sup>49</sup> Ma iha ti ihas pangas moletin te polien sav xil mun, e ti ianien e ti imun itel vat munien xil.

<sup>50</sup> E suv nan itilomun imei e melele tei xa moletin te polien ak nakil ti.

<sup>51</sup> E melele xa suv nan imei, ihas pangasi, e ikuvun rati ha ite von longpangasien itel ngan xil xa di langgusil Hi nggot hilibexil tang. E xil ti limuis e ti lingas luhexil ve longpangasien nae xil.”✧

## 25

*Iesu dei vole tei usil rut atul maxoe xil xa latavue xat xil ti ve meien na suv nae*

<sup>1</sup> Melele xa Iesu di tamu misepin mi moletin nan xil usil rin xa ti livue xat xil ve meien nan, xi dei vole ak mi xil bit, “Melele xa Hi mei ihe suv toto

---

✧ **24:47:** Mat 25:21,23 ✧ **24:51:** Mat 8:12; 13:42,50; 22:13; 25:30; Luk 13:28

na moletin xil imak: Vatei, atul maxoe he xalu (10) laba tangan lapus tetelien tei. E melele xa ut da maluxoluk, laleh laet nae xil e laba tangan lavisu mi tiramue xa iteli e lihusili lihe rute xa tetelien ita en. ☆

<sup>2</sup> Xil lim (5), vatixil tovuol, e xil lim (5) iaxa langgur vati.

<sup>3</sup> Ngan xil xa vatixil tovuol laleh laet nae, e latahur ti mun oel vatel xat xil.

<sup>4</sup> E ngan xil xa langgur vatixil, xil vus lapin e valihe xil xa oel di en del xat laet nae xil.

<sup>5</sup> E vengan xa tiramue xa iteli tamei ti mu vamanon, atul maxoe xil ak, vexil memel, ma lapat.

<sup>6</sup> “Maxani, e hilaep te vongien, xil lalong moletin xil di lakekei ni labit, ‘!Xi bemei! !Ngan xa iteli di bemei! !Mei rava ravisu mini e rihusili riha!

<sup>7</sup> “Melele xa atul maxoe xil ak lalonge, latamea e lapol kuhi ni laet nae xil.

<sup>8</sup> E ngan xil xa vatixil tovuol labiles lasis ngan xil xa langgur vatixil labit, ‘Musa ti oel li mi xamem, vengan laet namem sangas vamat xiak.’

<sup>9</sup> “E ngan xil xa langgur vatixil labit, ‘E-e, masakras li. Vengan xa oel namem tapin ti tangan vahe laet namim, ti, e vahe namem mun. Muha tang e sitoa nen, e ha muxal ti namim.’

<sup>10</sup> “E melele xa rut atul maxoe xil ak laba tangan laxal ti oel nae, tiramue xa iteli mei mistal. Ma atul maxoe xil xa latevue xat kuh xil langgusili ba labe nim xa anien te tetelien ☆ da en. Di, lakoe xol puiteh teni.

11 “E dutou ni, atul maxoe sav xil ak mun mei lastal. Xil lamei visal nim te tetelien e lakei be nesao labit, ‘!Suv, suv! !Sah puiteh li mi xamem!’”☆

12 “E tiramue xa miteli bemei e bit rilomun ni mi xil bit, ‘Nabiteni reitin li, inou natakil ti vari xamim.’”☆

13 Di, Iesu misepin kor e vole ak bit, “Ma, muvue xat kuh xamim e munapat ti, vengan mutakil ti melele xati xa inou nitilomun en.”☆

*Iesu dei vole usil eilep tei xa miling nenesien nan de moletin te polien nan tol (3) tangan lilaxat kuh naha xa tesa ni mi xatel*

*Luk 19:11-27*

14 Iesu de vole te mun mi moletin nan xil bit, “Melele xa Hi mei ihe suv toto na moletin xil imak: Vatei, eilep tei misak xat holesok nan xil tangan vahe rute tei xa be sotin.☆ Di, mikes viton moletin te polien nan tol (3) e miling xatel tangan latilaxat holesok nan xil

15 pipin ni metisouen natel. Mi tei, eilep ak miling gol mani be taosen lim (5000) di e hen. Mi tei mun, miling gol mani be taosen lu (2000) di e hen. E mi ngan xa be tol nen, miling gol mani be taosen tei (1000) di e hen.\* Bus di, eilep ak ba sung.

16 “Melele xa eilep ak ba, vatei takes, ngan xa nggur gol mani be taosen lim (5000) ba pol sorin ni mani ak ba vuma ... bas xoles gol mani taosen lim (5000) mun mei del xat ngan xa da ngamu.

17 Usil sexien tak, ngan xa tehur gol mani tehe taosen lu (2000), xi mun ba pol sorin ni e bas xoles gol mani be taosen lu (2000) mun.

---

☆ **25:11:** Luk 13:25,27    ☆ **25:12:** Mat 7:23    ☆ **25:13:** Mat 24:42; Mak 13:35; Luk 12:40    ☆ **25:14:** Mak 13:34; Luk 19:12-13

\* **25:15:** Gol mani ak, tei nggoni 1000 vatu.

18 E moletin te polien xa tehur gol mani xa tehe taosen tei (1000), xi ba, minggil vul, e midihin soson mani na suv nan di en.

19 “Melengien xil hao mei mitavi, e eilep natel dilomun e mikes viton xatel tangan valong kuhi xa latepol ni naha tetel mani xil xa telingi teti heatel.✧

20 Moletin te polien nan xa tehur gol mani tehe taosen lim (5000) bemei del xat taosen lim (5000) mun e biteni bit, ‘Suv, oteling gol mani tehe taosen lim (5000) teti e heok. E taxeak, pus ti. Natepol sorin ni e natehas xoles taosen lim (5000) mun mei del xati.’

21 “Melele xa suv nan pusi, biteni mini bit, ‘!Bos pupu! Xouk obe moletin tei te polien xa bos e nenesien navan di e xouk. E vengan xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’✧

22 “Di, moletin te polien nan xa tehur gol mani tehe taosen lu (2000) bemei e biteni bit, ‘Suv, oteling gol mani tehe taosen lu (2000) teti e heok. E taxeak, pus ti. Natepol sorin ni e natehas xoles taosen lu (2000) mun mei del xati.’

23 “Melele xa suv nan pusi, biteni mini bit, ‘!Bos pupu! Xouk obe moletin te polien tei xa bos e nenesien navan di e xouk. E vengan xa di olaxat kuh holesok xil xa tereli xa natelingi teti e hem, nilinguk sung mei ulaxat holesok navan xil xa holu. Amei pus hosien itel suv nam.’✧

24 “Di, moletin te polien nan xa tehur gol mani tehe taosen tei bemei visali e biteni mini bit, ‘Suv,

---

✧ 25:19: Mat 18:23    ✧ 25:21: Mat 25:23; Luk 16:10; Mat 24:47

✧ 25:23: Mat 25:21; Luk 16:10; Mat 24:47

inou nakila li xa xouk obe moletin te xeih tei xa di oleh huiei xil ra vatiei xil xa tave xouk ti olihi, e di oleh anien mun xa mosav xil tang latelihi teti e naho sam xil.

<sup>25</sup> Uluk mikan ni xouk, ma ba nadihin mani nam de vul tei. Pus ti mu, mani xil vus nam xiak.’

<sup>26</sup> “Melele xa suv nan pusi mak, misepin nggeih mini bit, ‘!Xouk obe moletin te polien tesa tei xa obe mah tova tang! Xouk okil kuhi xa inou nabe moletin te xeih tei xa di naleh huiei xil ra vatiei xil xa tave nou ti nalihi, e di naleh anien mun xa mosav xil tang latelihi teti e naho savan xil.

<sup>27</sup> Ma, vahit vahos mak mu xa ova oling mani navan vate bangk tova tangan, melele xa natilomun namei, nakila ma namur rat rilomun ni e vatin vata xati.’

<sup>28</sup> “Di, eilep ak biles pus moletin te polien sav nan e biteni mini bit, ‘Hur rat gol mani ra moletin te polien xai, e ha ulingi ite he ngan xa nggur gol mani taosen he xalu (10,000) ngamu.

<sup>29</sup> Vengan ngan xil xa di lapol del xat naha xa de hexil ngamu, lisa ti mun mi xil tangan isak ni hexil mei ipolu mu. E ngan xil xa latapol ni ti neta ni ngan xa de hexil ngamu, tave ti neta xa holesok nae tereli tang, lileh rerati ihe reling xil.✠

<sup>30</sup> Ma ha mukuvun rat moletin te polien tesa ak ihe hale, ha ite rute xa maluxoluk itel xat ngan xil xa ti limuis e ti lingas luhexil ve longpangasien nae xil.’ ”✠

### *Iesu misep usil Melengien te Lepisien*

---

✠ **25:29:** Mat 13:12; Mak 4:25; Luk 8:18      ✠ **25:30:** Mat 8:12; 13:42,50; 22:13; 24:51; Luk 13:28



31 Iesu biteni mun mi moletin nan xil bit, “Melele xa Nat Moletin† itilomun en, minehinen te xeihen istal en e imei itel xat masxaxa xil vus. Ti, itotan e voninen te xeihen e ilepis moletin xil.✧

32 E melele nen ak, moletin xil te kantri xil vus mei lihe vituei e rute tei takes. Xil mei lisoh pe meten, e xi iseti xil lihe vanute lu. Xi ipol ni ixoni moletin tei xa di milaxat sipsip xil xa di miseti nani xil reling sipsip san xil.✧

33 Ngan xil xa langgoni sipsip xil, iling xil liti e rin metu. E ngan xil xa langgoni nani xil ha liti e rin meil.

34 “Ti, xi isepin mi xil nggoni suv toto nae. Ihiteni mi ngan xil xa ladi e rin metu ihit, ‘!Mumei, xamim xa tuxolxatien na Tata navan di e xamim!✧ Mei muleh holesok xil xa xi tesak mesen ni ve xamim melele xa tepeas ni ut etan.✧

35 Vengan xa melele xa mae teat nou, mutesa anien minou; melele xa meruru teat nou, mutesa oei minou natemu ni; e melele xa natemei natexoni ngan halesav tei, mutehur pilei nou natemei e tim samim xil.✧

36 Reitin, melele xa eising navan tehe tovuol, xamim mutesing xol nou; melele xa natemesei, xamim mutelaxat kuh nou; e melele xa natete nim te xeih, xamim mei mutesao ni nou.’

37 “Ti, ngan xil xa lamal pe met Hi xa liti e rin metu lihith rilomun ni mini lihith, ‘?Suv, vilieh vari iaxa matepusuk xa mae teatuk e matesa anien

---

† **25:31:** Nat Moletin be his tei xa Iesu tehuri tangan vasep usil meien nan. ✧ **25:31:** Dut 33:2; Sak 14:5; Mat 16:27; Siud 14; Mat 19:28; Rev 3:21; 20:11 ✧ **25:32:** Esek 34:17 ✧ **25:34:** Luk 22:30 ✧ **25:34:** Luk 12:32 ✧ **25:35:** Aes 58:7

minuk; mu meruru teatuk e matesa oei minuk tangan omu ni?

<sup>38</sup> ? Vilieh vari iaxa matepusuk otexoni ngan halesav tei e matehur pilei xouk otemei e tim samem; mu eising nam tehe tovuol e matesing xolok?

<sup>39</sup> ? E vilieh mun iaxa matepusuk otemesei e matelaxatuk; mu otete nim te xeih e matehat matesao ni xouk?’

<sup>40</sup> “Ma, suv toto ak ihiteni mi xil ihit, ‘Reitin li nabiteni mi xamim, holesok xil vus xa mutepol ni mi tuak xil ak, tave ti neta xa xi tehe movotei tei tang, e pe metok, lehit ngan xa mutepol ni minou vari tang.’<sup>☆</sup>

<sup>41</sup> “Ti, ihiteni mi ngan xil xa liti e rin meil ihit, ‘!Xamim, ngan xil xa Hi tesa halesil mi xamim, muhe reling nou! !Ha muhe Upang xa misakras vamat vatova xa Hi tesak mesen ni ngamu tangan ihe vonine Temat itel masxaxa nan xil!’<sup>☆</sup>

<sup>42</sup> Vengan melele xa mae teat nou, mutnasa ti anien minou; melele xa meruru teat nou, mutnasa ti oei minou namu ni;

<sup>43</sup> e melele xa natemei natexoni ngan halesav tei, mutnahur pilei nou ti namat e tim samim xil. E melele xa eising navan tehe tovuol, mutnasing xol nou ti; melele xa natemesei, xamim mutnalaxat kuh nou ti; e melele xa natete nim te xeih, xamim mutnasao ni nou ti.’

<sup>44</sup> “Ti, moletin xil ak lisisi lihiti, ‘?Suv, vilieh vari iaxa matepusuk xa mae mu meruru teatuk, mu otemei texoni ngan halesav tei, mu eising nam

---

<sup>☆</sup> **25:40:** Pro 19:17; Mat 10:42; 18:5; Mak 9:41    <sup>☆</sup> **25:41:** Mat 7:23; Mak 9:48; Siud 1:7; Rev 20:10

tehe tovuol, mu otemesei, mu otete nim te xeih e matnatutou ni xouk ti?’

<sup>45</sup> “Ma, xi ihiteni mi xil ihit, ‘Reitin li nabiteni mi xamin, holesok xil vus ak, xosxa mutnapol ni ti mi tuak xil ak, tave ti neta xa xi tehe movotei tei tang, e pe metok, lehit ngan xa mutnapol ni ti minou vari tang.’

<sup>46</sup> “Ma xil vus xa latamal ti pe meten, Nat Moletin iso rerat xil vus ha liti rute xa longpangasien nae xil misakras vavus vatova. E ngan xil xa lamal pe meten ha lihur meulien sal.”✧

## 26

*Vat na Siu xil lalang ves suse tangan lavas vin Iesu vaxo en*

*Mak 14:1-2; Luk 22:1-2; Sion 11:45-53*

<sup>1</sup> Melele xa Iesu pispisi ni holesok xil ak mi moletin nan xil bus, xi biteni mi xil bit,

<sup>2</sup> “Nggoni ngan taxa mukila ngamu, melengien lu sutang di, ti, ripol ni Anien te Tavien.✧ E melele nen ak vari, limaen nou, Nat Moletin, nihe he elu navan xil tangan ha liti xat nou e eivave.”✧

<sup>3</sup> E melele taxa Iesu di misepin, e tim xa eilep sa Kaeafas xa be vatixar na pris xil, vat xil na pris xil del elda na Siu xil lamei vituei.

<sup>4</sup> Xil di lalang ves suse tangan latal xat xuxus ni Iesu e lavasi vamat vaxo en.

<sup>5</sup> Ma labiteni labit, “Rinapol ni ti e melengien te Anien te Tavien vengan, maxani, moletin xil linavae mi xil mun tang.”

---

✧ **25:46:** Dan 12:2; Sion 5:29   ✧ **26:2:** Eks 12:1-27   ✧ **26:2:** Mat 20:18-19; 27:26; 15:15; Luk 24:7,20; Sion 19:16

*Iesu ba ni anien tei e atou tei pisen merereen mini  
Mak 14:3-9; Sion 12:1-8*

<sup>6</sup> E melele xa Iesu da tamu e metimal te hal Betani, xi ba di ngganien e tim sa Saemon xa, tetiamu, mesien leporsi teat tenben.

<sup>7</sup> Di, atou tei bemei nim e nggur valit vokon tei xa lapol ni valite ni hat hos tei xa lakesi ni alabasta. Vokon ak, von bos xa bos e mani teni mun nggeih. Exi bemei visal Iesu e rute xa dotan da en, e mideh vokon ak ba xat vatin tangan vapisen merereen nan mini.✧

<sup>8</sup> E melele xa moletin na Iesu xil lapusi, iexil nggati e laseputut ni labit, “?!Veneh ma di purun vokon ak mak!?”

<sup>9</sup> Vahos mak mu vahit vaha vapos ni ni mani tova xa eilep. Ti, mani nen mikila vatutou ni hoeo xil.”

<sup>10</sup> E Iesu mikil naha xa di lasep usili, ma biteni mi xil bit, “?Xamim di mubul xat atou ak veneh? Xi pol ni neta tei xa bos pupu minou.

<sup>11</sup> Vengan hoeo xil liti visal xamim vehakut, e inou, nasakras nate visal xamim vahehi.

<sup>12</sup> Melele xa mideh vokon ak ba xat tiei navan, xi di misak mesen nou ve tehinen navan.

<sup>13</sup> Reitin li nabiteni mi xamim, e rute xil vus xa lihithiten longongen hos usil nou en, xil lihith usil naha xa atou ak tepol ni minou. E isak ni moletin xil linem xati ven.”

*Sudas maen ni tangan isa rat Iesu mi vat xil na pris xil*

*Mak 14:10-11; Luk 22:3-6*

<sup>14</sup> Di, Sudas Eskariot, xa be tei e xil xa labe lu e le tei (12) na Iesu, ba pus vat xil na pris xil.

---

✧ 26:7: Luk 7:36-38

15 Xi misis xil bit, “?Xosxa nisa rat Iesu mei ite hemim, ma musa naha minou?” Ma xil labuli silva mani ba duxoh hanutap tei e he xalu mun (30)\* tangan lisa ni mini.✧

16 Ma Sudas maen ni. Di, e melele nen ak ba, xi milang ves suse tangan isa rat Iesu ha ihe hexil ixo en.

*Iesu ngga Anien te Tavien del moletin nan xil*

*Mak 14:12-21; Luk 22:7-13,21-23; Sion 13:21-30*

17 E melengien kokot te Melengien xil te Beret xa Is Tovuol En, moletin na Iesu xil lamei visali e lasisi labit, “?Rute xave iaxa iem bei tangan masak mesen Anien te Tavien en?”✧

18 Iesu bit rilomun ni mi xil bit, “Muhe taon te hal Serusalem xa da iaxor, e mukamet moletin tei e rute ak. Muhiteni mini muhit, “Titsa bit, “Melengien navan bemei sangas. E inou mei nia Anien te Tavien e tim sam itel moletin navan xil.” ’ ’ ”

19 Ma moletin nan xil laba e lapol ni nggoni ngan taxa Iesu tehiteni mi xil. E rute ak, xil lasak mesen Anien te Tavien en.

20 E melele xa meteneai ba minu, Iesu bemei e dotan e von anien en del moletin nan xil xa labe lu e le tei (12).

21 E melele xa di langganien, Iesu bit lelen ni mi xil bit, “Reitin li nabiteni mi xamim, tei e xamim iaxa isa rat nou nihe he elu navan xil.”

22 Melele xa lalonge mak, xil lalonge misa pupu, ma xil kekes di lasis Iesu labit, “?Suv midep li, onemi obit inou?”

---

\* **26:15:** Sak 11:12-13di tesep usil 30 silva mani ak xa texoni 30,000 watu. ✧ **26:15:** Eks 21:32; Sak 11:12 ✧ **26:17:** Eks 12:14-20

23 Iesu bit rilomun ni mi xil bit, “Reitin, tei e xamim vari xa di mungganien vituei del nou iaxa isa rat nou niha.†

24 E be reitin xa inou, Nat Moletin, nimat ixoni ngan xa Vanuvei Eo di misepin ni.☆ !E isa pupu mi ngan xa isa rat nou! Moletin ak, vahos mak mu vahit linapesi ti vengan pangasien xa Hi isa ni mini ihe eilep pupu.”

25 Di, Sudas xa isa rati iha misisi bit, “?Titsa midep, onemi obit inou?”

Ma Iesu bit rilomun ni mini bit, “Ixonin ngan taxa xouk obiteni.”

26 E melele xa di langganien, Iesu nggur beret e memes Hi ven.☆ Di, bul pasi, e melele xa di miseti mi moletin nan xil, xi biteni bit, “Muhuri mua ni. Ngan ak be tiei navan.”

27 Di, Iesu nggur kap xa uaen ba en, memes Hi ven, e melele xa misa ni mi xil, xi biteni bit, “Xamim vus mumu ni.

28 Uaen ak be ra navan xa isak ni hitxatien hu te xeih na Hi mei istal e ihe reitin.‡ Reok xa ileh ve moletin xil holu ihe sanien tei iha mi Hi tangan naketeh ti mun nasa mi xil ve tesaen nae xil.☆

29 Nabiteni mi xamim, ninamu ti mun uaen ak ituxoh melele xa nimu uaen hu itel xamim e rute xa Tata navan be suv toto en.”

---

† **26:23:** Ngan ak isak ni naha xa Sam 41:9 tehiteni tangan istal mei ihe reitin. ☆ **26:24:** Sam 22:7,8,16-18; Aes 53:9 ☆ **26:26:** Mat 14:19; 15:36; Mak 6:41; 8:6; Luk 9:16; 1Kor 10:16 ‡ **26:28:** E Eks 24:6-8, Mosis mitah re buluk e hor te sanien tangan vasak ni hitxatien matu te xeih xa Hi tepol ni tetel mol-Isrel xil mei istal e ihe reitin. Usil sexien nen tak, re Iesu pol ni hitxatien hu te xeih mei istal e ihe reitin xa Hi iteh meulien na moletin xil te ut etan. ☆ **26:28:** Ser 31:31; Sak 9:11; Hib 9:20

30 Melele xa langganien e lakikei ni sisien tei bus, xil lastal e ba labe Vathu te Urvatiei te Olip.✠

*Iesu bit lelen ni xa moletin nan xil lilesae relingi  
Mak 14:27-31; Luk 22:31-34; Sion 13:36-38*

31 Melele xa laduxoh Vathu te Urvatiei te Olip, Iesu biteni mi moletin nan xil bit, “E vongien tak, xamim vus mulesae reling nou✠ ixoni ngan xa Hi tesepin ni e Vanuvei Eo xa bit,

*‘Inou nihas moletin xa di milaxat sipsip xil,  
e sipsip san xil liletasil relingi.’ (Sak 13:7)*

32 E melele xa nimea rilomun ra maten, inou nitiamu ni xamim ha nite Kaleli.”✠

33 E Pita mitamea e biteni mini bit, “!Tave ti neta xa moletin sav xil lilesae relinguk, inou ninave relinguk ti vatova!”

34 Ma Iesu bit rilomun ni mini bit, “Reitin li nabiteni minuk, e vongien tak, melele xa ut nalan ti mu e tuto xil linakorat ti mu, e xouk uhiteni ihe vatol ngamu xa otakil ti nou.”✠

35 E Pita biteni nggeih pilei sung bit, “!E-e, namak ti! !Tave ti neta xa nimat itelak, inou nisakras namiteni xa natakil ti xouk!” E ngan tesav xil mun labiteni nggoni tang.✠

*Iesu misis e ut Ketsemani e miling meulien nan e  
he Hi*

*Mak 14:32-42; Luk 22:39-46*

36 Di, Iesu be rute tei xa lakesi ni Ketsemani del moletin nan xil.✠ Melele xa laduxoh rute ak, xi

✠ **26:30:** Sam 113-118; Luk 22:39 ✠ **26:31:** Mat 26:56; Sion 16:32

✠ **26:32:** Mat 28:7,16 ✠ **26:34:** Mat 26:69-75; Mak 14:66-72; Luk 22:56-62; Sion 18:25-27 ✠ **26:35:** Sion 11:16 ✠ **26:36:** Sion 18:1

biteni mi xil bit, “Mutotan muti tak e ti mutatil nou. Inou nitiamu niha nisis inggaxor.”

<sup>37</sup> Xi nggur Pita del nat Sepeti xalu latonggusili. E melele xa latoba, nenemien na Iesu basi holu e milonge misa pupu.✧

<sup>38</sup> Ma xi biteni mi xatel bit, “Tinok li polu ni nenexoen, e nalonge lehit ngan xa bit vahas vin nou. Muti tak, e ti mutiketeh itel nou.”✧

<sup>39</sup> Di, Iesu mikakao reling xatel vuteili tang, mitingeiril be tan e misis mi Hi bit, “Tata li, xosxa suse sav tova mun da tamu, uhur rat longpangasien ak ihe reling nou li. E onapol ni ti naxoni ngan xa ieok bei, e upol ni ixoni ngan kestang xa xouk iem bei.”✧

<sup>40</sup> Di, xi dilomun be visal xatel e mikameti xa di latopat. Ma xi biteni mi Pita bit, “?Midep xiak? ?Mutsakras mutketeh vatel nou vahe haoa tei takes?”

<sup>41</sup> Mutketeh e ti mutisis tangan mutnamot ti e melele xa sakkpisien xil imei e xamitel. E tinemitel, iemitel bei tangan mutipol ni neta tei xa momal, e vemitel memel.”✧

<sup>42</sup> Di, Iesu dilomun ba e misis bit, “Tata li, xosxa suse sav tovuol e be tangan xa nihur vuol ni longpangasien xil ak, ma upol ni ixoni ngan kestang xa xouk iem bei.”✧

<sup>43</sup> E melele xa Iesu dilomun, mikameti xa termali latopat mun vengan lasakras latohur xat metenoh natel.

<sup>44</sup> Ma xi be reling termali mun, e ba misis be vatol nen ni sisen nan xati tang.✧

---

✧ **26:37:** Mat 17:1; Mak 5:37; 14:33; Luk 8:51; 9:28 ✧ **26:38:** Sam 42:5,11; 43:5; Sion 12:27; 4:9 ✧ **26:39:** Hib 5:7-8 ✧ **26:41:** Mat 6:13; Luk 11:4 ✧ **26:42:** Mat 6:10 ✧ **26:44:** 2Kor 12:8



45 E melele xa Iesu dilomun bemei visal termali, biteni mi xatel bit, “?Di tamu mutopat? ?Di tamu mutongel? !Topus ti! Taxeak be melele xati✧ xa lisa rat nou, Nat Moletin, nihe he moletin tesa xil.✧

46 !Tomea, ratoha! Moletin xa isa rat nou, xi tu xa di bemei iaxor.”✧

### *Ladal xat Iesu*

*Mak 14:43-50; Luk 22:47-53; Sion 18:3-12*

47 Melele xa Iesu di tamu misepin, Sudas, tei e xil xa labe lu e le (12) nan, mistal. Xi bemei del xat vanut moletin xil xa di laleh xat tiei del homenda xil te vaeen. Xil lamei langgusil nenemien na vat xil na pris xil del elda xil na Siu xil.

48 Sudas xa tehein xati tangan isa rat Iesu teling xati tehit, “Moletin xa nipesum ni vin, xi vari iaxa be ngan xa iemim bei. Mumei mutal xati.”

49 Ma Sudas mika mal be visal Iesu, pesum ni vin e bit, “Titsa, bos vongien li.”

50 E Iesu bit rilomun ni mini bit, “Tuxoli, pol ni tang vaxoni ngan xa xouk omei ven.”

Di, vanut moletin xil ak lamei ladal xat Iesu.

51 E moletin tei na Iesu milihi rat tiei te vaeen nan e da xoteh vurang slev tei na vatixar na pris xil.✧

52 E Iesu misel mini bit, “Singin xat tiei nam mun vate voninen, vengan ngan xil xa di labae del tiei, tiei na mosav xil lihas vini.✧

53 Vahit ngan xa ieok vahei, inou nakila nasis Tata navan, ma vatei takes, vasa vanut masxaxa te

---

✧ **26:45:** Sion 12:23; 13:1; 17:1    ✧ **26:45:** Mat 17:22; Mak 9:31; 10:33; Luk 9:44; 24:7    ✧ **26:46:** Sion 14:31    ✧ **26:51:** Sion 18:26  
✧ **26:52:** Sen 9:6; Rev 13:10

vaeen xil lali lu e le (12) xa mahulong tangan mei livae e rin navan. §

<sup>54</sup> ?E vahit napol ni, ma Vanuvei Eo xa bit xati xa holesok xil ak istal imak mei ihe reitin itep?”

<sup>55</sup> Di, Iesu biles pus vanut moletin xil ak e biteni mi xil bit, “?Veneh ma di muleh tiei e homenda xil te vaeen tangan mei mutal xat nou? ?Munemi mubit inou di nadiamu ni moletin xil tangan ha mavae vatel kavmen nar? !E-e! Melengien xil ngasen nadotan nade vangit vloh te Nim Eo e di naspisi mi moletin xil e mutamei ti tangan mutal xat nou. ☆

<sup>56</sup> E holesok xil vus ak mei mistal tangan vasak ni naha xa provet tetis usili e Vanuvei Eo mei vastal vahe reitin.” E melele xa ladal xati, moletin nan xil vus lalesae relingi. ☆

*Langgur Iesu be kot na vat xil na Siu xil*

*Mak 14:53-65; Luk 22:54-55,63-71; Sion 18:13-14,19-24*

<sup>57</sup> Ngan xil xa ladal xat Iesu ladela labe tim sa Kaeafas, xa be vatixar na pris xil. E rute ak, titsa xil te rae na Mosis del elda xil na Siu xil labe vituei ngamu ladi.

<sup>58</sup> E Pita di mika xus e di nggusil vanut moletin xil xa di ladel Iesu laba vuma ... laduxoh vloh te tim sa vatixar ak. E rute ak, Pita be vangit vloh e ba dotan del merketeh xil te nim ak tangan vapus ti xa lipol ni naha mi Iesu.

---

§ **26:53:** E melele nen ak, moletin te vaeen xil te hal Rom labe 6000 xa ladi e vanute tei. Ma Iesu bit masxaxa te vaeen xil ak lili 72,000 xa mikila vakes xil. ☆ **26:55:** Luk 19:47; 21:37; Sion 18:20  
 ☆ **26:56:** Sak 13:7; Mat 26:31; Sion 16:32

<sup>59</sup> Vat xil na pris xil del eilep sav xil mun na Siu xil di lalang ni moletin tova xa mei iluvos xa Iesu pol ni tesaen tei xa likila lihasi imat ven.

<sup>60</sup> E tave ti neta xa moletin holu lapol ni luvosen ba xat Iesu, latakamet ti neta xa lakila lasa rati ha vamat ven.

Di, moletin lu mei lusoh

<sup>61</sup> e lusepin mi kaonsel ak lubit, “Xamel mate-longe xa moletin ak tehiti, ‘Inou nikila nihi len Nim Eo na Hi. Ti, nikili ni mun e melengien tol tang.’ ”<sup>✠</sup>

<sup>62</sup> Ma vatixar mitamea e misis Iesu bit, “?Ma midep? Xouk di olong sepinien xa di laso ni ba xatuk. ?Neta tovuol xa obit oviteni?”

<sup>63</sup> E Iesu dat votei tang.<sup>✠</sup>

Ma vatixar misisi mun bit, “E pe met Hi xa meul, inou nasemae ni xouk tengen usepin ni reitinen. ? Reitin xa xouk obe Mesaea, Nat Hi?”<sup>✠</sup>

<sup>64</sup> Iesu bit rilomun ni mini bit, “Nggoni ngan xa di obiteni. E nabiteni mi xamim xa taxeak iha, mupus ...

*‘Nat Moletin itotan*

*ite ri metu na Hi Suv te Xeihen.*

*!E mupusi imei e ut etan*

*ixo momah xil te tilang hat!’ ” (Sam 110:1; Dan 7:13)*

<sup>65</sup> Melele xa vatixar milong sepinien nan, ien mikat xa mikat, dal papas eising nan e mikei nggeih bit, “?!Mulonge!? !Xi misep purun his Hi vari! ?Veneh ma di ralang ni sepinien tova mun

<sup>✠</sup> **26:61:** Mat 27:40; Sion 2:19; Pol 6:14    <sup>✠</sup> **26:63:** Aes 53:7; Mat 27:12,14; Luk 23:9; Sion 19:9    <sup>✠</sup> **26:63:** Mat 16:16-17

tengan vaha xati? !Xamim vus mulonge xa di misep purun his Hi!☆

<sup>66</sup> ?Munemi midep vari?”

Xil vus labit rilomun ni labit, “! Momal tang tangan imat!”

<sup>67</sup> Di, xil lakusah ba xat valnaon e ladi. E rute ngan xil mun lalevesi☆

<sup>68</sup> e labit, “?! Xosxa obit obe Mesaea xati, uhit pisi, visi iaxa diuk!?”

*Pita biteni be vatol xa takil ti Iesu*

*Mak 14:66-72; Luk 22:56-62; Sion 18:15-18,25-27*

<sup>69</sup> Melele xa Pita di tamu dotan e vangit vloh te nim ma vatixar na pris xil, atuli tei te polien bemei visali e biteni mini bit, “Xouk mun di otehusil Iesu te hal Kaleli.”

<sup>70</sup> E Pita muun xole pe met moletin xil bit, “!Tave reitin ti! Inou natakil ti naha xa di obiteni iaxai.”

<sup>71</sup> Di, Pita mitamea e mikakao ba ve puiteh te vloh. E rute ak, atuli te polien tei mun pusi, ma biteni mi moletin xil bit, “!Moletin ak mun be tei e xil xa di latehusil Iesu te hal Nasaret!”

<sup>72</sup> Ma vatei mun, Pita muun xole e bit, “!Pe met Hi, nabiteni reitin xa natakil ti moletin ak vari!”

<sup>73</sup> Tavehi, moletin xil xa dit lasoh lamei visal Pita e labiteni mini labit, “Xouk vari obe moletin tei nan vengan sepinien nam nggoni ngan Kaleli xil tang.”

<sup>74</sup> E Pita misepin nggeih bit, “!Natakil ti moletin xai vari xa di musep usili iaxai! !Hi isa halesil iha xat nou xosxa sepinien navan be luvosen!”

Vatei takes, tuto tei mikorat.

☆ **26:65:** Lev 24:16; Sion 19:7    ☆ **26:67:** Aes 50:6; 53:5

<sup>75</sup> E melele xa milonge, Pita minem rilomun ni naha xa Iesu tehiteni mini tehit, “Ut nalan ti mu e tuto xil linakorat ti mu, e xouk uhiteni ihe vatol xa xouk otakil ti inou.”✠ Ma milonge misa xa misa e be reling vangit vioh ak, ba di muis nggeih.

## 27

*Sudas ba misar hiraen vengan xa milonge misa ve naha xa tepol ni mi Iesu*

*Mak 15:1; Luk 23:1-2; Sion 18:28-32*

<sup>1</sup> E makoe roroh, vat xil na pris xil del elda xil na Siu xil lamei e nenemien tei takes tangan lakin maten mi Iesu.✠

<sup>2</sup> Ma labar xati e ladela be visal Paelet xa be vat te kavmen te rute ak tangan lasa rati vaha mini.✠

<sup>3</sup> Melele xa Sudas xa tesa rat Iesu pusi xa lamaen ni tangan Iesu vaha vamat, xi biles nenemien nan e misak tangan vasa rilomun ni silva mani xa be hanutap tei e he xalu mun (30) vaha mi vat xil na pris xil del elda xil.✠

<sup>4</sup> Xi bit rati bit, “Inou napol misa pupu, vengan natesa rat moletin ak xa tenapol ni ti neta vasa tangan ha vamat ven.”

E xil labit rilomun ni mini labit, “Xamem mabit munakil ti. Ngan xai be nam sung.”

<sup>5</sup> Ma Sudas mirang lelen mani ak be tan e vangit vioh te Nim Eo, e milesae. Di, ba nggur ao tei e misar xoteh hiraen ni.✠

<sup>6</sup> Melele xa ba, vat xil na pris xil ba lale viton silva mani xil ak e labiteni labit, “Mani ak tamese

---

✠ **26:75:** Mat 26:34; Mak 14:30; Luk 22:34; Sion 13:38 ✠ **27:1:** Mat 12:14; Mak 3:6 ✠ **27:2:** Aes 53:8 ✠ **27:3:** Mat 26:14-15 ✠ **27:5:** Pol 1:18-19

ti vengan xa latexal rat meulien na moletin tei ni. Ma usil rae nar xil, tamal ti tangan raso ni vahe ateli te Nim Eo.”

<sup>7</sup> Lasep usili, ma lamae e nenemien tei. Ma laleh mani xil ak e ba lopus moletin tei xa di pol ni holesok xil ni tan te pili. Del mani ak, xil langgal rat mavulut tan tei rani tangan mei ihe von tehinen tova xa ti litihin ngan halesav xil en.

<sup>8</sup> Ve rin ak, lakes rute ak ni “Tan te Ra’ duxoh xosali.

<sup>9</sup> Ma naha xa Hi tehit lelen ni texo provet Sere-maea mei be reitin xa bit, “*Xil laleh silva mani hanutap tei e he xalu mun (30), xa momal ni mani xa mol-Isrel xil lateling xati tangan lixal rat meulien nan ni.*

<sup>10</sup> *E del mani ak, xil langgal rat mavulut tan tei ra moletin tei xa di pol ni holesok xil ni tan te pili, nggoni ngan xa Hi Suv tesemae ni minou.” (Sak 11:12-13; Ser 19:1-13; 32:6-9)*

*Ladel Iesu ba misoh pe met Suv Paelet tangan lihas vini*

*Mak 15:2-5; Luk 23:3-5; Sion 18:33-38*

<sup>11</sup> E melele xati xa Sudas di misar hiraen, Iesu ba misoh pe met suv Paelet xa be vat te kavmen tete hal Sudea. Di, Paelet misisi bit, “?Midep? ?Be reitin xa xouk obe suv toto na Siu xil?”☆

Iesu bit rilomun ni mini bit, “Nggoni ngan taxa xouk obiteni.”

<sup>12</sup> E melele xa vat xil na pris xil del elda xil na Siu xil lasepin ba xati, xi tavit ti neta tangan vatutou ni rin nan.☆

---

☆ **27:11:** Mat 2:2; 27:29,37; Mak 15:9,12,18,26; Luk 23:37,38; Sion 18:39; 19:3,19,21 ☆ **27:12:** Aes 53:7; Mat 26:63; 27:14; Luk 23:9; Sion 19:9

13 Ma Paelet misisi bit, “?Otalong ti sepinien xil xa di labiteni ba xatuk iaxai?”

14 E Iesu dat votei tang, e tavit rilomun ni ti sepinien nae. Melele xa suv Paelet pus sexien nan, mēsep pupu ven.

15 Be sexien matu tei na suv Paelet xa, e me-  
lengien xati te Anien te Tavien, xi di maen molet  
in tei xa molet in xil labosei tangan ha ven imase ra  
nim te xeih.

16 E melele nen ak, vatxeih tei tete nim te xeih,  
hisen Barabas xa molet in xil lakil kuhi mak ve  
sexien tesa xil xa xi di tepol ni.

17 Ma melele xa suv Paelet pusi xa vanut molet  
in xil ak mei ladi vituei, misis xil bit, “?Ngan xave  
iaxa iemim bei tangan nimaen ni ha ven imase:  
Barabas mu Iesu xa lakesi ni Mesaea?”

18 Xi misis xil mak vengan xa pus kila xa vat xil  
na pris xil latesa rat Iesu mini vengan di lanem  
misa ni tang.

19 E melele xa suv Paelet di tamu dotan e von  
koten nan, atou nan misa sepinien tei mini bit,  
“Onapol ni ti neta naha xat molet in ak, vengan xi  
momal tevi. Xosali, nanexo pupu ve metuveen tei  
xa natepusi usili.”

20 E vat xil na pris xil del elda xil na Siu xil  
lasi petine vanut molet in xil ak tangan lasis Paelet  
vamaen Barabas ha ven imase e ihas Iesu imat.

21 Paelet ba misis vanut molet in xil ak vatei mun  
bit, “?Ngan xave e xalu iaxa iemim bei tangan  
nimaen ni ha ven imase?”

Ma xil vus lakei ba ni labit, “!Barabas!”✧

22 Ma Paelet misis xil mun bit, “?Xosxa imaxai,  
ma nipol ni naha mi Iesu xa lakesi ni Mesaea?”

E xil vus lakei be nesao labit, “!Ti xati e eivave!”✠

<sup>23</sup> Di, Paelet misis xil mun bit, “?Veneh? ?Xi pol ni naha misa?”

E lakei nggeih pilei sung labit, “!Ti xati e eivave!”

<sup>24</sup> Melele xa Paelet pusi xa misakras vahiles nenemien nae e sangas lapol ni vaeen, xi po oei e mikas hen pe met moletin xil vus. E melele xa di pol ni, xi biteni mi xil bit, “Taxeak, nakas rat ra te maten na moletin ak ra heok, vengan napusi xa xi tapol ni ti neta vasa tangan ha vamat ven. !Ma xosxa imat, ren iti e hemim sung!”✠

<sup>25</sup> E vanut moletin xil ak labit rilomun ni mini labit, “!Bos tang, ren iti e hemem itel horamue namem xil mun!”✠

<sup>26</sup> Ma, nggusil eheien nae, Paelet maen Barabas ba ven mase. E mi Iesu, xi misemae ni tangan moletin te vaeen nan xil ha limeas pangasi ni ao te xeih xa sanute di en, ti, litela ha liti xati e eivave.

*Moletin te vaeen xil lapol pepamen ni Iesu*

*Mak 15:16-20; Sion 19:2-3*

<sup>27</sup> Melele xa lameas pangas Iesu bus, moletin te vaeen xil na Paelet ladela labe vangit vioh te nim mae xa mahulong e lakes viton moletin te vaeen sav xil vus xa ladi vituei tangan lamei.

<sup>28</sup> Xil ladal rat eising na Iesu e lasing xole ni kaliko tei xa pili nggoni ngan na suv toto xil.✠

<sup>29</sup> Di, lapol pepamen ni nggoni ngan xa be suv toto tei. Langgil xat vatluvoluv tei ni ao tei xa sanute xil tepiei di en, e lasili xol vatin. Laling liei tei de hen metu, e di latingeiril pepamen pe meten nggoni ngan xa di lasa merereen nae mini.

✠ **27:22:** Pol 3:13; 13:28 ✠ **27:24:** Dut 21:6-9; Sam 26:6 ✠ **27:25:** Esek 33:5; Pol 5:28 ✠ **27:28:** Luk 23:11



E melele xa di lapol ni, labiteni mini labit, “!O suv toto na Siu xil, xamem di mamerere ni xouk!”✧

<sup>30</sup> Di, lakusah ba xati, lalihi rat eitingil ak rani, e labas vatin ni.✧

<sup>31</sup> Melele xa lapol pepamen ni bus, langgur rat kaliko te pili ak be relingi, e lasing xole ni eising nan mun. Di, ladela ba tangan ha liti xati e eivave.

*Ladi xat Iesu e eivave*

*Mak 15:21-32; Luk 23:26-43; Sion 19:17-27*

<sup>32</sup> Melele xa moletin te vaeen xil ladel Iesu laba, xil labisu ni moletin tei e suse, hisen Saemon te hal Saerin. Lamei visali e langgeih xati tangan vapo eivave na Iesu.

<sup>33</sup> Di, ladel Iesu ba labe nesao e Vathu Kolkota, xa koute teni be ‘Valvat Moletin.’

<sup>34</sup> E rute ak, lasa uaeen mi Iesu xa labilesi del neta tei xa mikon.✧ E melele xa Iesu mu pisi, misin ni.

<sup>35</sup> Di, moletin te vaeen xil ak ladi xati e eivave. E melele xa murur da en, xil di laso daes tangan vapisen ni xa visi e xil iaxa ileh mavulut eising xil na Iesu.✧

<sup>36</sup> E rute ak, xil ladotan e di laketeh xole.

<sup>37</sup> E eivave nan, ladi xat tisen tei de nesao ni vatin xa bit mesen rin xa ladi xati ven. Tisen ak ladisi labit, ‘Ngan ak be Iesu, suv toto na Siu xil.’✧

<sup>38</sup> E melele nen ak, lateti xat moletin lu xa lutepol tesa luteti e eivave lu mun. Tei tete rin metu, e tei tete rin meil.✧

---

✧ **27:29:** Mat 2:2; 27:11,37; Mak 15:9,12,18,26; Luk 23:37,38; Sion 18:39; 19:3,19,21 ✧ **27:30:** Aes 50:6 ✧ **27:34:** Sam 69:21 ✧ **27:35:** Sam 22:18 ✧ **27:37:** Mat 2:2; 27:11,29; Mak 15:9,12,18,26; Luk 23:37,38; Sion 18:39; 19:3,19,21 ✧ **27:38:** Aes 53:12

39 Melele xa Iesu murur de eivave, moletin xil xa di lakakao langgo visali di lakuvun vatixil e di langue xati✧

40 labit, “!Ei, xouk xa otehiteni otehit uhu len Nim Eo na Hi, ti, ukili ni mun e melengien tol tang, bos mak mu tangan uteh meulien e xouk mun tang! !Xosxa obe Nat Hi reitin, amei etan reling eivave xai!”\* ✧

41 Usil sexien nen xil tak, vat xil na pris xil, titsa xil te rae na Mosis, del elda na Siu xil mun lapol pepamen ni Iesu.

42 Xil labiteni mini labit, “!Mupus ti mu! Xi di teteh meulien e moletin sav xil, e misakras vateh meulien e xi mun tang. !Xosxa be reitin xa xi be suv toto na mol-Isrel xil,✧ bos xa, taxeak tang, imei etan ra eivave ak! Xosxa imak, ma xamem muke reitin en sung.

43 Xi miling nenesien nan e Hi e tehiteni tehit, ‘Inou nabe Nat Hi.’ Ma bos, xosxa Hi ien bei moletin xai, ma mei ihur rati.”✧

44 E usil sexien nen tak, moletin tesa xalu xa lateti xat xalu luteti e rin, xalu mun lusep pepamen ba ni.

*Maten na Iesu*

*Mak 15:33-41; Luk 23:44-49; Sion 19:28-30*

45 E piniae, maluxoluken mei da xol ut xil ngasen e dat mak duxoh haoa tol (3).✧

46 E melele xa haoa xatel ak mei lattavi, Iesu mikei nggeih nggo sepinien xati nan xa be

---

✧ **27:39:** Sam 22:7; 109:25; Tang 2:15 \* **27:40:** Ngan ak misak ni naha xa Sam 22:7-8 tehiteni mei mistal be reitin. ✧ **27:40:** Mat 26:61; Mak 14:58; Sion 2:19-20; Mat 4:3,6; 26:63; Luk 4:3,9

✧ **27:42:** Sion 1:49; 12:13 ✧ **27:43:** Sam 22:8; Sion 5:18; 10:36; 19:7 ✧ **27:45:** Amos 8:9

Arameak bit, “!Ilae! !Ilae! ?Lama sabaktani?” (Sam 22:1) Koute te sepinien ak be, ‘!Hi navan! !Hi navan! ?!Veneh ma ostokovein nou!’

<sup>47</sup> Melele xa rut moletin xil xa lasoh ladi lalonge, xil labit, “?Mulonge? Xi di mikes provet Ilaetsa iaxai.”

<sup>48</sup> Vatei takes, tei e xil miloh ba, nggur mavulut kaliko tei, e miterir ni be uaen xa mikon. Di, milingi de kusut liei tei e mei misa ni be nesao tangan Iesu vavisi.✧

<sup>49</sup> E rute ngan xil mun labiteni labit, “Veter mu, ratiluvoluv tamu e rapus ti. ?Ilaetsa imei etan mei iteh meulien en, mu namei ti?”

<sup>50</sup> Di, Iesu mikei nggeih vatei mun, milihi kor ni votiang, di, mat.

<sup>51</sup> E melele nen ak vari, kaliko xa mettel xa lalihi dakoe xol ut eo tei e Nim Eo, mesel be rin lu,✧ nggo kusute nesao bemei duxoh kusute etan. E lul tei milil, hat xil mahoe

<sup>52</sup> e misak ni von tehinen xil lamahoe e mangang dit mak. E moletin na Hi xil holu xa latelel lateti en, xil lamea rilomun ra maten.✧

<sup>53</sup> Xil labe reling von tehinen nae xil e lakakao. (E melele xa Iesu temea rilomun ra maten, moletin xil holu latepus moletin xil ak e hal Serusalem xa be taon eo na Hi.)

<sup>54</sup> Melele xa vat na moletin xil te vaeen del moletin nan xil xa di lateketeh xol Iesu lalong lul ak e lapus holesok xil ak testal, ulixil mikan pupu. Xil labiteni labit, “!Reitin li, ngan ak tehe Nat Hi vari tang!”

---

✧ 27:48: Sam 69:21 ✧ 27:51: Eks 26:31-35; Hib 10:20 ✧ 27:52: Esek 37:12

<sup>55</sup> E tatit atou vutei xil lasoh ladi nga sotin vuteili ra eivave, e di lapus holesok xil xa di mistal. Tatit atou xil✧ ak di latetutou ni Iesu e Kaleli e latehusili mun latemei e Serusalem.

<sup>56</sup> E xatel tol xa latemos e atou xil ak tehe Meri te hal Makdela; Meri, nine Temis xal Siosep; e nine horamue na Sepeti xalu.

*Laling tiei na Iesu de vangihat te tehinen tei  
Mak 15:42-47; Luk 23:50-56; Sion 19:38-42*

<sup>57</sup> Sangas ut vama luxoluk e Sabat mun di bemei sangas.✧ Ma moletin tei be visal suv Paelet, hisen Siosep. Xi te metimal te hal Aramatea e holesok nan holu. Xi mun be tei e xil xa di tehusil xat Iesu.

<sup>58</sup> Melele xa ba misoh pe met Paelet, xi misisi tangan vamaen tiei na Iesu mini. Ma Paelet mis-ema e ni moletin nan xil te vaeen tangan ha lipo rati e lisa ni mini.

<sup>59</sup> Ma Siosep ba poe e pis xole ni kaliko te mieh tei xa memese.

<sup>60</sup> Di, poe e ba milingi de vangihat te tehinen nan xati xa lateseh moten rohon ni tang.✧ Di, midivin hat tei xa eilep mei dakoe xol puiteh te vangihat ak e be relingi ba.

<sup>61</sup> Meri te hal Makdela del Meri tei mun ludotan ludi nga sotin vuteili ra rute ak, momal ni puiteh te vangihat ak.✧

*Moletin te vaeen xil laketeh xol vangihat te tehi-  
nen xa tiei na Iesu da en*

<sup>62</sup> Melele xa ut milan e Sabat, vat xil na pris xil del Farasi xil ba lapus suv Paelet.

---

✧ **27:55:** Luk 8:2-3 ✧ **27:57:** Dut 21:22-23 ✧ **27:60:** Aes 53:9; Pol 13:29 ✧ **27:61:** Mat 27:56; 28:1; Mak 15:40,47; 16:1; Luk 24:10; Sion 19:25

<sup>63</sup> Xil lamei visali e labiteni mini labit, “Suv, manem xati xa melele xa vat luvosen ak temeul tamu teta, xi tehiteni tehit, ‘Melengien tol mei itavi, e inou nimea rilomun ra maten.’<sup>☆</sup>

<sup>64</sup> Ma usemae ni moletin te vaeen nam xil ha liketeh xol kuh vangihat te tehinen nan ha ituxoh melele xa melengien tol ak mei itavi. Vengan xosxa onapol ni ti, moletin nan xil likila ha likan ni tiei nan. Ti, likila lihithiteni xa xi mea rilomun ra maten. E xosxa holesok xil ak mei istal, ma luvosen kor ak mei isa pilei sung ili luvosen xa tetiamu melele xa xi tehit xi be Mesaea na Hi.”

<sup>65</sup> Melele xa Paelet milonge mak, xi maen ni e biteni bit, “Bos ngamu. Muleh tatit moletin tova te vaeen, e ha liketeh xol vangihat ak ihusil sexien xa xamim iemim bei.”

<sup>66</sup> Ma laba vituei del moletin te vaeen xil ak, e labilit xol hat xa mahulong xa dakoe xol puiteh teni ni tan tepili. Di, laling tatit moletin te vaeen xil ak tangan xil liketeh xole.

## 28

### *Iesu mea rilomun ra maten*

#### *Mak 16:1-10; Luk 24:1-12; Sion 20:1-10*

<sup>1</sup> Sabat bus. Di, ut milan e Sande, Meri te hal Makdela del Meri sav mun<sup>☆</sup> luba tangan ha lalosao ni vangihat te tehinen na Iesu.

<sup>2</sup> Vatei takes, lul tei milil nggeih vengan masx-axa tei na Hi Suv nggo ut nesao bemei etan. Xi mei midivin rat hat xa tetakoe xol puiteh, e dotan da en.<sup>☆</sup>

---

<sup>☆</sup> **27:63:** Mat 12:40; 16:21; 17:23; 20:19; Mak 8:31; 9:31; 10:34; Luk 9:22; 18:33; 24:7    <sup>☆</sup> **28:1:** Mat 27:56,61; Mak 15:40,47; Sion 19:25

<sup>☆</sup> **28:2:** Mat 27:51; 27:60; Mak 15:46

<sup>3</sup> Masxaxa ak, tenben minehin pupu nggoni an xa milangas, e eising nan xil mieh xa mieh.✠

<sup>4</sup> Melele xa moletin te vaeen xil lapusi, ulixil mikan pupu e lexil malili. Lakiri labe tan e iexil bon pupu, lasakras mun lapol ni ti neta.

<sup>5</sup> E masxaxa ak biteni mi atou xalu ak bit, “! Ulimil nakan ti! Nakila xa di mullang ni Iesu xa lateti xati e eivave.

<sup>6</sup> E xi tara ti mun inggak. Reitin, xi temea rilo-mun ngamu ra maten nggoni ngan taxa tehiteni.✠ Lumei ha lupus ti rute xa lateling tiei nan teta en.

<sup>7</sup> Taxeak tang, multemanon ha mulhiteni mi moletin nan xil mulhit, ‘Iesu mea rilomun tuei ra maten e xi itiamu ni xamim ha ite Kaleli.✠ Xamim ha mupusi e rute ak.’ Ngan ak be sepinien xa Hi misil nou tengan mei nihiteni mi xamil.”

<sup>8</sup> Ma rumali lube reling vangihat e luloh temanon luba tengan ha lalihithiteni mi moletin xil na Iesu. Ulixalu mikan, e tave ti neta xa mak, iexalu polu ni sien.

<sup>9</sup> Melele xa di tamu luba, vatakes, Iesu bisu mi xalu e biteni mi xalu bit, “!Bos makoe! Tomat na Hi iti mi xamil.” Melele xa lupusi, lumei visali, lumot ludal xat len xalu, e lusa merereen nalu mini.

<sup>10</sup> Di, Iesu biteni mi xalu bit, “Ulimil nakan ti. Ha mulhiteni mi tua navan xil e neketen tengan lihe Kaleli, e ha lipus nou en.”✠

*Moletin te vaeen xil laluvos labit moletin na Iesu xil mei lakan ni tiei nan*

---

✠ **28:3:** Mat 17:2; Mak 9:3; Luk 9:29; Pol 1:10    ✠ **28:6:** Mat 12:40; 16:21; 17:23; 20:19; Mak 8:31; 9:31; 10:34; Luk 9:22; 18:33; 24:7  
 ✠ **28:7:** Mat 26:32; 28:10,16; Mak 14:28; Sion 21:1-23    ✠ **28:10:** Mat 28:7,16; Mak 14:28; Sion 20:17; 21:1-23

11 Melele xa atou xalu ak di tamu luba, rut moletin te vaeen xil xa di lateketeh xol vangihat ak ladilomun labe Serusalem e ba labit vuol ni holesok xil xa testal mi vat xil na pris xil.

12 Ma vat xil na pris xil lasepin del elda xil na Siu xil e lamei e nenemien tei. Ma langgal moletin te vaeen xil ak ni mani tei xa eilep

13 e labiteni mi xil labit, “Xamim ha muhithiteni muhit, ‘Melele xa matepat vovong, moletin na Iesu xil latemei e hilaep te vongien, e mei latekan ni tiei nan.’”

14 Ma xosxa longeongen teni ituxoh suv Paelet, xamem iaxa musepin e rin namim tengan musikoe xol xamim e xi nasa ti pangasien mi xamim ven.”

15 Ma moletin te vaeen xil ak laleh mani e ba lapol ni nggoni ngan xa xil latehiteni mi xil. Ma longeongen ak mikapis e rute xil vus xa Siu xil ladi en e miloh bemei duxoh xosali.

*Iesu mei mistal mi moletin nan xil*

*Mak 16:14-18; Luk 24:36-49; Sion 20:19-23; Pol 1:6-8*

16 Ma moletin na Iesu xil xa labe tei e le tei (11) xa lateti, xil labe Kaleli e ba labe vathu tei xa Iesu tehiteni ngamu mi xil.

17 E rute ak, iaxa xil lapus Iesu. E melele xa lapusi, lamot mini. E rut moletin nan xil latake reitin kuhi ti mu en.

18 Di, Iesu bemei visal xil e biteni mi xil bit, “Tata navan miling holesok xil vus xa di ut nesao e ut etan di e heok.”

---

✧ **28:13:** Mat 27:64 ✧ **28:18:** Dan 7:14; Mat 11:27; Sion 3:35; 13:3; 17:2; Efes 1:20-22; Plp 2:9-10

<sup>19</sup> Ma muha ve moletin xil te kantri xil vus e mupol ni xil mun mei lihe moletin navan xil. E melele xa mei lihusil nou, xamim mubaptaes ni xil e his Hi Tamer, e his Hi Natneli, e his Hi Ninin Eo. ☆

<sup>20</sup> E mupispisi mi xil tangan lilong xat holesok xil vus xa natesemae ni mi xamim. E inou, nite visal xamim vehakut ☆ ha ituxoh hoxalite te melengien xil xa radi en.”

---

☆ **28:19:** Pol 1:8    ☆ **28:20:** Hag 1:13; Mat 18:20; Sion 14:23



**Vanuvei Eo e sepinien Vatlongos na  
mol-Vatimol xil niutestamen e rute te  
oltestamen**  
**Portions of the Holy Bible in the Southeast Ambrym  
Language of Vanuatu**  
**Des portions de la Sainte Bible dans le Sud-Est  
Ambrym Langue de Vanuatu**

copyright © 2015 Wycliffe Bible Translators, Inc.

Language: Southeast Ambrym (Ambrym, Southeast)

Dialect: Central

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-06

---

PDF generated using Haiola and XeLaTeX on 18 Apr 2025 from source files dated 31 Aug 2023

d6322831-f65b-57c1-8673-8099ea7771d7